


O Le Liahona

Na Latou Iloaina o Ia—O Auala e Mafai ai Foi ona E Iloaina, i. 14

O Le Su'e, Ave, ma le Aoao Atu o le Galuega o Talafaasolopito o Aiga, i. 22

O Auala e Valu e Taulima ai pe a Tuua e se Tagata o le Aiga le Ekalesia, i. 28

I le Mavae ai o le Toe Faaipoipoina: Auala na Avea ai ni Aiga se Lua ma se Aiga se Tasi, i. 36





“Ua e iloa ea le uiga o le laau sa vaai i ai lou tamā?

“Ma sa ou tali atu ia te ia, ua ou fai atu: loe, o le alofa lea o le Atua, ua faamaligi ifo lautele o ia lava i loto o le fanauga a tagata; o lea, o le mea lea ua silisili atu ona manaomia i mea uma.”

1 Nifae 11:21–22



O SAVALI

- 4 **Savali a le Au Peresitene Sili: Tulaueleele Saogalemu i Taimi o Faafitauli**
Saunia e Peresitene Dieter F. Uchtdorf
- 7 **Savali a Faiaoga Asiasi: O Le Faaiipoipoga ua Faauuina e le Atua**

TALA FAAALIA

- 14 **Pipii Mau i le Ai Uamea**
Saunia e Elder Daniel L. Johnson
E fa ni vaega i le ala i le laau o le ola. O le fea o vaega e te fia auai ai?
- 18 **O Le Tusi Ofoofogia a Mamona**
Saunia e John L. Sorenson
O le a sili atu ona e talisapaia le Tusi a Mamona pe a e malamalama i huitau na feagai ma Mamona i lona tuufaatasisiga.

22 **O Le Olioli o le Galuega o Talafaasolopito o Aiga**
Saunia e Elder Quentin L. Cook
Tatou te puipuia lo tatou faasinomaga paia a o ave la tatou faamuamua i le aiga ma le galuega o talafaasolopito o aiga.

28 **Pe a Tuua e se Tamaitiiti le Ekalesia**
Saunia e Robin Zenger Baker
E tiga pe a tuua e se tagata o le aiga le Ekalesia. E mafai ona fesoasoani manatu nei.

32 **Taitaia o se Talanoaga Anoa Faalevaega**
Saunia e Dustin West
E mafai ona e liliua talanoaga o le talalelei i ni avanoa lelei e aoao ai e ala i le faaaogaina o mataupu faavae nei.

36 **Toefaaipoipoina: O Se Malaga i le Onosai ma le Alofa**
Saunia e Heidi Eljarbø Morrell Andersen
O le tuu faatasi o ni aiga se lua e manaomia ai le faaluaina o le alofa ma le faaluaina o le onosai.

MATAGALUEGA

- 8 **Tusigāmanatu o le Konafesi o Oketopa 2015**
- 10 **Tatou te Talanoa ia Keriso: Faamagaloina o Lau Tane Muamua**
Taofia le igoa
- 12 **Ataata: O Le Lesona i le Laau o le Sanitolo [Santol]**
Saunia e Irene Taniegra
- 13 **Auaunaga i le Ekalesia: Sa Ma Filifili e Auauna Atu**
Saunia e Irmgard Meissner
- 40 **O Leo o le Au Paia o Aso e Gata Ai**
- 80 **Seia Tatou Toe Feiloai: Maoae Moni**
Saunia e Peresitene Howard W. Hunter

I LE FAAVAA

Luma: Ata na vali e Joseph Brickey. Faavaa pito i luma i totonu: Ata na pueina e Kevron2001/iStock/Thinkstock. I totonu o le faavaa i tua: Ata na pueina e Cody Bell.



50

- 44 O a ni Mea e Mafai ona Aoao mai e le Tusi a Mamona ia i Tatou e uiga i le Fiafia?**
Saunia e Hank R. Smith
O loo i ai ni taiala manino e mafai ona tatou mulimuli ai e maua ai le fiafia moni.
- 50 O Mafuaaga e Taua ai le Faauuga o le Inisitituti**
Saunia e Matthew Porter Wilcox
O vasega fou o maatulimanu e fa o le a fesoasoani i talavou matutua e faalolotoina lo latou faatuatua.



65

- 52 Pepa Lautele o I Ai se Savali: Mafaufau i ni Sini Tetele**
- 53 O Le A Tuputupu Ae Lo Outou Faatuatua**
Saunia e Elder Neil L. Andersen
- 54 O Lou Potu Faamalolo**
Saunia e Sara N. Hall
O le tausaga sa sili ona faigata o lou olaga, sa avea ma tausaga sa sili ona lelei o lou olaga.
- 56 O Lou Lumanai: O Le Fuafuaga lava ia e Matagofie**
E mafai ona e amata fatuina se lumanai manuia i le aso!
- 60 Fesoasoani e ala i le Agaga Paia**
Saunia e Elder Chi Hong (Sam) Wong
Sa otometi ona faailoga sese e le polofesa ia tali a tagata aoga uma, ae o lau tali sa sao, e faafetai ai i le fesoasoani a le Agaga Paia.
- 62 Fesili ma Tali**
E manatu nisi o au uo, o le alu i le lotu e maumau ai le taimi. E mafai faapefea ona ou fesoasoani ia latou iloa, e mafai ona avea o se faamanuiga maoae?
- 64 Tali mai Taitai o le Ekalesia: Auala e Maua ai le Olioli**
Saunia e Elder Dallin H. Oaks
- 65 O Lou Aafiaga Faafaifeautalai na Toeitiiti Lava a Misi**
Saunia e Anne Laleska
Ou te lei manatu e valaaulia Brenda i le lotu seia oo ina valaaulia o ia e se isi tagata i la latou lotu.



Vaai pe mafai ona e mauaina le Liahona o loo natia i le lomiga lenei. Faaiteite: Aumai i fafo au meafaigaluega e faaaoga i laupapa.



72

- 66 O Tali mai i se Aposetolo: E mafai faapefea ona ou faia le Aso Sa o se aso faapitoa?**
Saunia e Peresitene Russell M. Nelson
- 67 Musika: A Ou Faalogo ma Lou Loto**
Saunia e Sally DeFord
- 68 O Tamaiti o E Tutu Maualuga: Faasoaina Atu o Tulaga Faatonuina**
Saunia e Hilary Watkins Lemon
- 70 Oa o le Molimau**
Saunia e Leonardo Rodrigues
Sa iloa e Sabrina e tuputupu ae lana molimau pe a ia faasoaina atu.
- 72 Tusitusiga Paia mai le Lalolagi Tuai ma le [Lalolagi] Fou**
Faafetaui mau mai le Tusi a Mamona i perofeta i le lalolagi atoa.
- 74 Toa o le Tusi a Mamona: Sa Agaga Tatalo Enosa**
- 75 E Mafai Ona Ou Faitauina le Tusi a Mamona**
- 76 Tala o le Tusi a Mamona: Ua Sopoia e le Aiga o Nifae le Vasa**
- 79 Itulau e Valivali: E Taua o Tatou Aiga**

O Le Lomiga Faamaonia Faa-Samoa a le Ekalesia
a Iesu Keriso o le Au Paia o Aso e Gata Ai

Susuga a le Au Peresitene Sili: Thomas S. Monson,
Henry B. Eyring, Dieter F. Uchtdorf

O Le Korama a Aposetolo e Toafefulua:

Russell M. Nelson, Dallin H. Oaks, M. Russell Ballard,
Robert D. Hales, Jeffrey R. Holland, David A. Bednar,
Quentin L. Cook, D. Todd Christofferson, Neil L. Andersen,
Ronald A. Rasband, Gary E. Stevenson, Dale G. Renlund

Faatonu: Joseph W. Sitati

Assistant Editors: James B. Martino, Carol F. McConkie

Fautua: Brian K. Ashton, Randall K. Bennett, Craig A.
Cardon, Cheryl A. Esplin, Christoffel Golden, Douglas D.
Holmes, Larry R. Lawrence, Carole M. Stephens

Pule Faatonusili: David T. Warner

Faatonusili o le Lagolago mo Aiga ma

Tagata o le Ekalesia: Vincent A. Vaughn

Faatonusili o Mekasini a le Ekalesia: Allan R. Loyborg

Pule o Mea Tau Pisinisi: Garff Cannon

Pule Faatonutonu: R. Val Johnson

Pule Faatonutonu Lagolago: Ryan Carr

Lagolago o Lomiga: Megan VerHoef

Au Tusiitisi ma Faatonutonu: Brittany Beattie, David
Dickson, David A. Edwards, Matthew D. Flitton, Lori
Fuller, Garrett H. Garff, LaRene Porter Gaunt, Jill Hacking,
Charlotte Larcabal, Mindy Anne Leavitt, Michael R. Morris,
Sally Johnson Odekirk, Joshua J. Perkey, Jan Pinborough,
Richard M. Romney, Paul VanDenBerghe, Marissa Widdison

Pule Faatonusili Tusiata: J. Scott Knudsen

Faatonusili Tusiata: Tadd R. Peterson

Au Mamau: Jeanette Andrews, Fay P. Andrus, Mandie M.
Bentley, C. Kimball Bott, Tom Child, Nate Gines, Colleen
Hincley, Eric P. Johnsen, Susan Lofgren, Scott M. Mooy,
Mark W. Robison, Brad Teare, K. Nicole Walkenhorst

Faatonu o le Puletaofia ma Fatufatuga:

Collette Nebeker Aune

Pule i le Gaosiga: Jane Ann Peters

Au Gaosi: Connie Bowthorpe Bridge, Julie Burdett,
Katie Duncan, Bryan W. Gyi, Denise Kirby, Ginny J. Nilson,
Gayle Tate Rafferty

Tailolomi: Jeff L. Martin

Faatonusili Lolomiga: Craig K. Sedgwick

Faatonusili o le Tufatufaga: Stephen R. Christiansen

Mo le okaina o mekasini, alu i le store.lds.org po o le
Faletusi Tutotonu i Pesega. Telefoni 64127. Totogi o le
Mekasini: \$0.55 (Samoa) i le kopi. Totogi mo le Tausaga
Atoa \$6.60 (Samoa).

Auina atu tusitusiga ma faafesili i luga o le

imtoneti i le liahona.lds.org: pe meli mai i le *Liahona*,
Rm. 2420, 50 E. North Temple, Salt Lake City, UT 84150-
0024, USA; po o le i-meli: liahona@ldschurch.org.

O Le *Liahona* (o lona uiga i le Tusi a Mamona o le "tapasa"
po o se "faatonuala") e lomia i le faa-Alepania, Aminia
(Sasae), Pisilama, Palekeria, Kempupotia, Sepuano, Saina,
Kalaotia, Siekisolovakia, Tenimaka, Take, Iglisi, Esitonia,
Fiti, Finelani, Farani, Siamani, Eleni, Hanikeri, Initu, Iselani,
Intonesia, Italia, Iapani, Kiripati, Korea, Lativia, Litunia,
Malakasa, Masela, Monokolia, Nouei, Polani, Potukale,
Romania, Rusia, Samoa, Saina (ua faafaigofeina), Silovenia,
Sipaniolo, Suetena, Swahili, Tagaloka, Tahiti, Tai, Toga,
lukureini, Urutu, ma Viatenama. (E esese lava gagana.)

© 2016 Puletaofia e le Intellectual Reserve, Inc. Ua taofia
aia taatu uma. Lomia i le lunaita Setete o Amerika.

E mafai ona kopi tala ma ata o le *Liahona* mo le toe
faaogaina i lotu po o le aiga ae ia le faia ai ni pisinisi. E le
tatau ona kopi ni tala po o ni ata pe afai o faasa mai i le
laina o loo ta'ua ai le e ona lea faatufugaga. Auina atu fesili
e uiga i le puletaofia i le Intellectual Property Office, 50 East
North Temple Street, Salt Lake City, UT 84150, USA; i-meli:
cor-intellectualproperty@ldschurch.org.

For Readers in the United States and Canada:

February 2016 Vol. 40 No. 2. O LE LIAHONA (USPS 311)
Samoa (ISSN 1045-0947) is published monthly by The
Church of Jesus Christ of Latter-day Saints, 50 East North
Temple, Salt Lake City, UT 84150. USA subscription price
is \$10.00 per year; Canada, \$12.00 plus applicable taxes.
Periodicals Postage Paid at Salt Lake City, Utah. Sixty days'
notice required for change of address. Include address label
from a recent issue; old and new address must be included.
Send USA and Canadian subscriptions to Salt Lake
Distribution Center at address below. Subscription help
line: 1-800-537-5971. Credit card orders (Visa, MasterCard,
American Express) may be taken by phone. (Canada Post
Information: Publication Agreement #40017431)

POSTMASTER: Send all UAA to CFS (see DMM 707.4.12.5).
NONPOSTAL AND MILITARY FACILITIES: Send address
changes to Distribution Services, Church Magazines,
P.O. Box 26368, Salt Lake City, UT 84126-0368, USA.

Manatu mo Afiati Faaleaiga

*O leni lomiga o loo aofia ai tusiga ma gaoioiga e mafai ona faaoga mo afiati faaleaiga.
O ni faaitaiga nei se lua.*



"O Le Olioli o le Galuega o Talafaasolopito o Aiga,"

itulau 22: Ua valaaulia i tatou e Elder Cook ia amata ona tatou faia galuega talafaasolopito o aiga e ala i le faia o se "Faatasiga mo le Gafa o le Aiga." Mo la outou afiati faaleaiga, mafaufau e faaoga le FamilySearch.org e faamaumau ai faamatalaga, tala ma ata o lou aiga. Ua folafola mai e Elder Cook e faapea, "afai e te vaavaai i tala atu o noataga o le olaga nei ma le olaga faitino, ma fesoasoani ia i latou o e e le mafai ona fesoasoani ia i latou lava, o le a faamanuaina oe i le vavalalata ma le olioli sili atu i lou aiga, faatasi ai ma le puipuiga faalelagi lea e tuuina mai ia i latou o e faamaoni i Lana galuega."

"Oa o le molimau,"

itulau 70: Ina ua iloa e Sabrina o lana molimau o se oa taua, sa manao o ia e faasoa atu i tagata uma. Mafaufau e fesoasoani i lou aiga ia iloa "oa [o a latou lava] molimau" i le talanoaina pe aisea latou te fiafia ai i le talalelei a Iesu Keriso, pe faapei o latou lagona latou te maua ai, po o le, pe faapefea ona faaoga i o latou olaga i aso taitasi. Atonu e te tuu atu i tagata taitoatasi e faamaumau ana tali i nei fesili, e ala i le tusia i lalo pe e ala i le faaoga o se masini pueleo. Mafaufau e tuu atu i tagata taitoatasi e filifili se tagata i le vaiaso lenei e mafai ona latou faasoa atu i ai le oa o a latou molimau.

I LAU GAGANA

O loo maua le *Liahona* ma isi mea e faaoga a le Ekalesia i le tele o gagana i le languages.lds.org.

Asiasi i le [facebook.com/liahona.magazine](https://www.facebook.com/liahona.magazine) e sue ai manatu mo afiati faaleaiga, fesoasoani mo lesona o le Aso Sa, ma anotusi e mafai ona e faasoa atu i uo ma aiga. [Faaliliutusi: o le itulau o le Facebook o loo maua i le gagana Peretania, Sipaniolo, Potukale, o lea e mafai ona e aofia ai pe tapeese le laina lea pe a manao ai.]

AUTU I LE LOMIGA LENEI

E tau mai e numera le itulau muamua o le tusiga.

Agaga Paia, 32, 60, 65

Aiga, 7, 22, 36, 41, 44, 66, 79

Alofa, 10, 36

Aoao atu, 32

Auauna atu, 13, 66, 68, 80

Faaiipoipoga, 7, 36

Faamoemoe, 28, 54

Faataitaga, 62, 68, 80

Faatuataua, 4, 12, 28, 41, 54, 64

Faigata, 4, 10, 12, 28, 54

Galuega, 44, 56

Galuega faafaifeautalai, 13, 40, 41, 42, 65, 68, 70

Galuega faalemamalumu, 13, 22, 28, 44, 54

Iesu Keriso, 4, 10, 12, 14

Inisitituti, 50

Molimau, 40, 43, 70

Olioli, 22, 44, 64

Onosai, 12, 36

Sapati, 62, 66

Sauniuniga, 56

Suesue i tusitusiga paia, 10, 14, 54

Talafaasolopito o aiga, 22

Tapuai, 62, 66

Tatalo, 28, 54, 74

Tusi a Mamona, 14, 18,

43, 44, 60, 70, 72, 74,


75, 76

Tusitusiga Paia, 10, 14,

18, 72

Upu o le Poto, 68

Usiusitai, 12, 44, 64, 68



**Peresitene
Dieter F. Uchtdorf**

Fesoasoani Lua i le Au
Peresitene Sili

TULAELEEELE SAOGALEMU I TAIMI O FAAFITAULI

E lei leva atu na ma i ai ma lou toalua o Harriet, i se malae vaalele e matamata i le tulaeleeele o vaalele matagofie. Sa o se aso savili, ma sa malosi le tofaatautau o savili matamataita faasaga i vaalele na agai mai, lea sa mafua ai ona tifatifa ma gatete ia vaalele taitasi i le taimi e latalata mai ai.

A o ma matauina le tauiviga i le va o le natura ma masini, sa toe foi lou mafaufau i au lava aoaoga avevaalele ma mataupu faavae sa ou aoaoina iina—ma mulimuli ane, aoaoina atu i isi pailate aooga.

Sa masani ona ou tau atu ia i latou, “E aua le taumafai e ivi ma mea faatonutonu o le vaalele i le taimi o faafitauli. “Ia to’a pea; aua le faavevesia. Ia taulai atu lau vaai i le laina ogatotonu o le auala o vaalele. Afai e te aluese mai lou auala manaomia ua oo mai, ia vave fai faasa’oga ae ia faaeteete. Faalagolago i le gafatia o lau vaalele. Lele pea seia uma le faafitauli.”

Ua malamalama pailate ua i ai le potomasani, e le o taimi uma e mafai ai ona latou pulea mea e tutupu e siomia ai i latou. E le mafai lava ona latou tapeina le faafitauli. E le mafai ona latou faanimoa le timu po o le kiona. E le mafai ona latou taofia le agi a le savili pe suia lona alasavili.

Ae ua latou malamalama foi o se mea sese le fefe i le faafitauli po o savili malolosi—ae maise lava o le le mafai ona faia o se mea. O le auala e tulaeleeele saogalemu ai pe afai e oo i ni tulaga le lelei, o le tumau i le ala sa’o ma le auala e sese ai i le atoatoa e mafai ai.

A o ou vaavaai atu i le faiga mulimuli o le taunuu mai o lea vaalele ma lea vaalele, ma toe manatua ai mataupu faavae na aoaoina mai tausaga na avea ai a’u o se pailate, sa ou manatunatu pe le o i ai se lesona i lenei mea mo o tatou olaga i aso taitasi.

E le o taimi uma e mafai ai ona tatou pulea afā e tuu mai e le olaga i o tatou ala. O nisi taimi e le ogatasi ai fuafuaga e pei ona tatou mananao ai. Atonu tatou te lagonaina le luluina ma le lelea solo i faafitauli o le le fiafia, masalosalo, fefe, faanoanoa po o mamafatu o le mafaufau.

I le aluga o na taimi, e faigofie lava ona lofituina i mea uma ua sese, ma fai ai o tatou faafitauli ma totonugalemu o o tatou mafaufauga. O le faaosoosoga o le, ia taulai atu i tofotofoga o loo tatou feagai, nai lo o le Faaola ma la tatou molimau o le upumoni.

Ae peitai, e le o le auala sili ona lelei lena e uia i o tatou luitau i le olaga.

E pei ona le tausisi le tulimatai atu a se pailate ua potomasani i le matagi, ae i le ogatotonu o le auala o le vaalele ma le vaega tonu e tulaeleeele ai, e faapena foi ona tatau ona tausisi lo tatou tulimatai atu i le ogatotonu o lo tatou faatuatua—o lo tatou Faaola, Lana talalelei, ma le fuafuaga a lo tatou Tama Faalelagi—ma i la tatou sini aupito taua—ia toe foi atu ma le saogalemu i lo tatou taunuuga faalelagi. E tatau ona tatou faalagolago i le Atua ma ia avea le tumau i le ala o le avea ma soo o le taulaiga o a tatou taumafaiga. E tatau ona tumau le taulai atu o o



tatou mata, loto, ma mafaufau i le ola ai i le ala ua tatou iloa e tatau ona tatou [ola ai].

O le faaali atu o lo tatou faatuatua ma le faalagolago i le Tama Faalelagi e ala i le tausia ma le fiafia o Ana poloaiga, o le a aumaia ai ia i tatou le fiafia ma le mamalu. Ma afai tatou te tumau i le ala, o le a tatou sao mai

soo se faaaitaui—e tusa lava po o le a le malosi e foliga mai ai—ma toe foi atu ma le saogalemu i lo tatou aiga faalelagi.

E tusa lava pe lagilelei ia lagi e siomia ai i tatou, pe tumu foi i ao taufaamata’u, ae i le avefa ai ma soo o Iesu Keriso, tatou te saili mualua i le malo o le Atua ma Lana

amiotonu, ma le iloa afai tatou te faia faapea, o isi mea uma tatou te manaomia, o le a iu lava ina maua (tagai i le Mataio 6:33).

Se lesona o le olaga ina a taua!

O le tele o lo tatou taulai atu i o tatou faaaitaui, o tatou tauiviga, o tatou masalosaloga, ma mea tatou te matatau ai, o le a atili faigata ai ia mea. Ae o le tele o lo tatou taulai atu i lo tatou taunuuga mulimuli faalelagi ma i olioliga o le mulimuli i le ala o le [avefa ma] soo—o le alofa i le Atua, auauna atu i lo tatou tuaoi—o le sili atu foi lea ona lelei o le tatou tumau i taimi o fatiatama’i ma faaaitaui.

Uo pele, e tusa lava pe o le a le sua o le uu o savili e siomia ai i tatou i lo tatou olaga i le tino, o le a ofoina mai e le talalelei a Iesu Keriso i taimi uma le ala e sili ona lelei i se tulauele-elega saogalemu i le malo o lo tatou Tama Faalelagi. ■

AOAO ATU MAI LENEI SAVALI

Ua fautua mai Peresitene Uchtdorf ia i tatou e “faalagolago i le Atua ma ia avefa le tumau i le ala o le avefa ma soo ma taulaiga o a tatou taumafaiga.” Mafaufau e fai atu ia i latou e te aoaoina, pe na faapefea ona tumau lo latou taulai atu “i lo tatou taunuuga mulimuli faalelagi, ma i olioliga o le mulimuli i le ala o le avefa ma soo” i taimi na latou feagai ai ma tofotofoga. Atonu e te valaaulia i latou e mafaufau i ni auala e mafai ona latou taulai atu ai i a latou molimau, ma i a Keriso i taimi faigata, ma ia filifili ma le agaga tatalo pe faapefea ona faatino se na manatu se tasi pe sili atu i o latou olaga.



O Se Faavae mo La'u Molimau

Saunia e Jennifer Weaver

I na ua 16 o'u tausaga, sa tu mai sa'u uo i lo matou fale faatasi ma ni faifeautalai. I totonu o le masina talu ona fai le lesona muamua, na faapea ona taliina ai ma le manino a'u fesili uma. Sa ou lagonaina le molimau mai o le Agaga Paia i le moni o savali e uiga i le Toefuataiga. Sa le'i faapei o se isi lava mea na ou lagonaina, ma sa ou iloaina sa moni ia mea uma.

Ae peitai, sa ou oo i le faateteleina o le teena ma le tetee nai lo o se isi lava taimi muamua. Sa ou lagonaina le tuuatoa-tasi, vaivai, ma le le mautonu. Afai sa ou faia le mea sa'o, aisea la na ou fetai ai ma le tele o faigata? Sa le mafai ona ou malamalama pe faapefea ona avea o'u tofotofoga mo o'u manuia. Na aoaoina a'u e faifeautalai ia anapogi ma tatalo, e oo lava i le ogatotonu o se aso aoga. Ina ua oo ina faigata

tele ia mea, sa sasaa atu lo'u loto ma sa vave ona [ou] lagona le faamafanafanaga a le Agaga.

Sa tumu le vaiaso o lo'u papatisoga i tofotofoga. Na faamata'u mai lo'u pule e tuli a'u pe afai ou te faamisia lo'u papatisoga ae ou faigaluega e sui mo se isi tagata, sa iu ina ou nofo i le falema'i ona o fatumaa, ma sa fai mai o'u matua ou te aluese ma lo latou aiga. Faatasi ai ma le anoano o mea sa le oo i ai lo'u malosii, na pau lava le mea sa mafai ona ou faia, o le liliu atu i le Alii.

O na tofotofoga taitasi uma na iu lava ina avea ma o'u manuia. Sa fesoasoani ou te aoao ai e uiga i aoaoga faavae o le talalelei, lea na tuuina mai ai ia te a'u se faavae mo la'u molimau.

E alala le tusitala i Idaho, ISA.

TAMAITI

O le a la Taialina i Tatou i le Aiga

P e a tatou mulimuli i le faataiga a lesu Keriso, e pei lava o le mulimuli i se ala sa'o e tau atu ai ia te la! E mafai ona tatou saogalemu ma fiafia, e pei lava o le vaalele e tulaualeele saogalemu i le auala o vaalele. Taiala le vaalele i le ala lavelave ia toe foi atu i le auala o vaalele!



Ia suesue ma le agaga tatalo lenei savali ma saili ia iloa mea e faasoa atu. E faapefea ona faateleina e le “O Le Aiga: O Se Folafolaga i le Lalolagi” lou faatuatua i le Atua, ma faamanuia ai i latou e te puipuia e ala i faiaoga asiati? Mo nisi faamatalaga, alu i le reliefsociety.lds.org.

O Le Faaipoipoga ua Faauuina e le Atua

O loo faaauau pea e perofeta, aposetolo, ma taitai ona “tautino [mai] ma le faamaoni, o le faaipoipoga i le va o se alii ma se tamaitai, ua faauuina e le Atua, ma o le aiga o le totonuga-lemu lea o le fuafuaga a Lē Fofoa.”¹

Ua saunoa mai Elder D. Todd Christofferson o le Korama a Aposetolo e Toasefululua: “O se aiga e fausia i luga o le faaipoipoga o se alii ma se tamaitai e maua ai se faatulagaga sili mo le fuafuaga a le Atua ia lausiusi. . . .

“ . . . E leai se tasi o i tatou po o se isi lava e mafai ona suia lenei faatulagaga paia o le faaipoipoga.”²

Na saunoa Bonnie L. Oscarson, peresitene aoao o Tamaitai Talavou, fai mai: “O tagata uma, e tusa lava po o a o latou tulaga faaleulugalii pe fia le aofai o le fanau, e mafai ona avea ma e puipuia le fuafuaga a le Alii o loo faamatala mai i le folafolaga o le aiga. Afai o le fuafuaga lea a le Alii, e tatau foi ona avea ma a tatou fuafuaga!”³

Sa faaauau le saunoaga a Elder Christofferson: “O nisi o outou e le o maua faamanuiaga o le faaipoipoga



ona o ni mafuaaga e aofia ai le leai o ni tagata e mafai ona [faaipoipo i ai], tosina atu i le itupa e tasi, faaletonu o le tino po o le mafaufau, pe na o le fefe foi lava nei toilalo. . . . Pe atonu foi sa e faaipoipo, ae ua faamutaina lena faaipoipoga. . . . O nisi o outou o e ua faaipoipo e le mafai ona fanuina ni fanau. . . .

“Ae peitai, . . . e mafai e tagata uma ona saofaga i le faataunuuna o le fuafuaga paia i augatupulaga taitasi.”⁴

Mau Faapoipo

Kenese 2:18–24; 1 Korinito 11:11; Mataupu Faavae ma Feagaiga 49:15–17.

FAAMATALAGA

1. “O Le Aiga: O se Folafolaga i le Lalolagi,” *Liahona*, Nov. 2010, 129.
2. D. Todd Christofferson, “Aisea e Faaipoipo ai, Aisea e Fai ai se Aiga,” *Liahona*, Me 2015, 52.
3. Bonnie L. Oscarson, “O Tagata e Puipuia le Folafolaga o le Aiga,” *Liahona*, Me 2015, 15.
4. D. Todd Christofferson, “Aisea e Faaipoipo ai, Aisea e Fai ai Aiga,” 52.
5. Larry M. Gibson, “Fulfilling Our Eternal Destiny,” *Ensign*, Fep. 2015, 21–22.
6. David A. Bednar, “E Taua le Faaipoipoga i Lana Fuafuaga e Faavavau,” *Liahona*, Iuni 2006, 54.



Faatuatua, Aiga, Toomaga

Tala Mai E o Soifua

Sa manatua e uso Larry M. Gibson, o le sa avea ma fesoa-soani muamua i le au peresitene aoao o Alii Talavou, le taimi na fai atu ai Shirley, o le ua avea ma ana ava i le taimi nei, e faapea:

“‘Ou te alofa ia te oe aua ou te iloa e sili atu lou alofa i le Alii nai lo o au.’ . . .

“O lena tali na taia ai lou fatu. . . .

“ . . . [Ma] sa ou manao ia ona lagona i taimi uma, e sili atu lou alofa i le Alii nai lo o isi lava mea uma.”⁵

Na aoao mai Elder David A. Bednar o le Korama a Aposetolo e Toasefululua e faapea: “O le Alii o Iesu Keriso o le vaega aupito taua i se sootaga o le feagaiga i le faaipoipoga. . . . [Vaai faalemaufau e faapea], ua tuu le Faaola i le tumutumu o [se] tafatolu, ma se tamaitai i le tasi tulimanu o le faavae ae o se alii i le isi tulimanu o le faavae. la mafaufau lea po o le a le mea e tupu i le sootaga i le va o le alii ma le tamaitai ao laua agai malie atu taitoatasi ma ‘o mai ia Keriso’ ma taumafai ina ia ‘faaatoatina ina ia te la’ (Moronae 10:32). Ona o le Togiola ma e ala mai i le Togiola, e valalata ai le o mai faatasi o le alii ma le tamaitai.”⁶

Mafaufau I le Mea Lenei

O faapefea ona ou taumafai toatasi ma agai malie atu e “o mai ia Keriso”?

TUSIGĀMANATU O LE KONAFESI O OKETOPA 2015

“O le mea ua fai atu ai A’u o le Alii ua Ou fai atu ai; . . . pe i lo’u lava leo po o i le leo o a’u auuauna, ua tutusa lava” (MF&F 1:38).

A o e suesueina le konafesi aoa ia Oketopa 2015, e mafai ona e faaaogaina nei itulau (ma Tusigāmanatu o le Konafesi i lomiga i le lumanai) e fesoasoani ai ia te oe e suesue ma faaaoga aoaoga talu ai nei a perofeta soifua ma aposetolo ma isi taitai o le Ekalesia.

MATAUPU FAAVAE UA FAAMAMAFAINA



Faamamaluina o le Sapati

“O le faamamaluina o le Sapati o se faailoga o le amiotonu lea o le a manuia ai ma faamalolosia aiga, e faafesootai atu ai i tatou i lo tatou Fofoa, ma faateleina ai le fiafia. E mafai ona fesoasoani le Sapati e tava-vaese ai i tatou mai mea faalavelave, e le talafeagai pe le mama. E mafai ai

ona tatou i ai i le lalolagi ae le o ni o le lalolagi. . . . O le tausia moni o le aso Sapati o se sulufaiga lea mai afa o lenei olaga. O se faailoga foi o lo tatou tuuto atu i lo tatou Tama i le Lagi.”

Elder Quentin L. Cook o le Korama o Aposetolo e Toasefululua, “Toa le Tai ma Sitaili Faa-Bristol: Ia Agavaa Mo le Malumalu—i Taimi Lelei ma Taimi Leaga,” *Liahona*, Nov. 2015, 41-42.

FOLAFOLAGA FAAPEROFETA



Na te Talisapaia la Outou Auuaunaga

“Po o le a lava lou valaauga . . . , atonu e i ai taimi e te manatu ai e le o silafia oe e le Tama Faalelagi. E mafai ona e tatalo ia e iloa Lona finagalo, ma faatasi ai ma se manaoga faamaoni e faia *soo se mea* Na te poloaiina oe e fai, o le a e maua lava se tali.

“O le a faatagaina oe e le Tama Faalelagi e te lagonaina o loo Ia silafia oe, Na te talisapaia lau auuaunaga, ma ua oo ina e agavaa mo le faafeiloaiga mai le Alii lea e te matua manao e faalogo i ai: ‘Le auuauna lelei e ma le faamaoni; ua e faamaoni i nai mea iti, ou te tofia oe e pule i mea e tele: ulufale maia i le fiafia o lou Alii’” (Mataio 25:23).

Peresitene Henry B. Eyring, Fesoasoani Muamua i le Au peresitene Sili, “E Le o Tuulafoaiina i le Galuega,” *Liahona*, Nov. 2015, 82.

Mo Tagata Matutua Nofofua

O mea nei sa saunoa i ai ni failauga se toatolu e uiga i le nofofua:

- “O le taimi nei o se *vaega* o le faavavau. E le amata pe a tatou oti! O le faatuatua ma le faamoemoe o le a pupula ai ou mata i le fiafia ua tuuina i ou luma i le taimi nei.” —Peresitene Dieter F. Uchtdorf, “O Se Taumafanafana Faatasi ma Aunty Rosa Matua,” 19.
- “O le isi mafatiaga tiga tele o le tulaga o le tuuatoatasi. O i latou e mafatia i lenei tulaga e tatau ona manatua na oo foi lo tatou Faaola i lenei ituaiga o tiga ma, e ala

i Lana Togiola, ua Ia ofo mai ai le malosi e onosaia ai.” —Elder Dallin H. Oaks, “Faamalosia e Ala i le Togiola a Iesu Keriso,” 63.

- “Ia onosai. Faatali i le Alii. Ou te molimau atu e silafia e le Alii ou manaoga ma e alofa ia te oe mo lou tuuto faamaoni atu ia te Ia. E i ai Sana fuafuaga mo oe, pe i lenei olaga po o le isi. Faalogo i Lona Agaga. . . . I lenei olaga po o le isi, o le a faataunuaina Ana folafolaga.” —Elder Robert D. Hales, “Fetaiai ma Luitau o le Lalolagi i Lenei Vaitaimi,” 46.



AUSIAINA O TULAGA FAATONUINA A LE ALII

“Uso e, ua sisi ae e Satani se faatosinaga faapei o Korioa i o tatou aso ma le matua faamanuina. . . . O a ni ana meafaigaluega? O tusi o talafatu o le alofa faatuu-nanau, o ata faasolo o TV, o fafine faaipoipo ua fesootai ma uo tama tuai i ala faasalalau faagafesootai, ma ponokalafi. . . . E le mafai ona tatou taaalo ma u fanafana a Satani ae le mu ai. . . .

“A tatou aofia ai i le matamata, faitau, pe oo i soo se mea e le tusa ai ma tulaga faatonuina a lo tatou Tama Faalelagi, e faavaivaia ai i tatou. Pe tatou te laiti pe ua matutua, afai o mea o loo tatou tilotilo i ai, faitau, faalogologo i ai, pe filifili e fai e le tusa ai ma tulaga faatonuina o le Alii i le *Mo Le Malosi o le Autorialavou*, ona togi lea i fafo, tape, saei, ma ato le faitotoa.”

Linda S. Reeves, fesoasoani lua i le au peresitene aoao o le Aualofa, “O Le Mana o Folafolaga e Tausia,” *Liahona*, Nov. 2015, 10.

TALA MAOAE MAI LE KONAFESI

O le a se mea e sili ona tosina ai lo tatou mafaufau nai lo se tala maoae? O tala nei e fa mai le anoanoai o tala na faasoaina i le taimi o le konafesi:

- O le a le aoaoga a Chloe ma lona nofoa ia i tatou e uiga i le alofa ma le tausia o poloaiga? —Tagai Carole M. Stephens, “Afai Tou te Alofa Mai ia te Au, Ia Outou Tausi i Au Poloaiga,” 118.
- O a ni auala e mafai ona tatou, faapei ai o le tama o Pablo, e fesoasoani i a tatou fanau ia malamalama i le talalelei? —Tagai Bradley D. Foster, “E Leai se Taimi ua Vave Tele ma E Leai Foi se Taimi ua Tuai Tele,” 50.

Ina ia faitau, matamata, pe faalogologo i lauga o le konafesi aoao asiasi i le conference.lds.org.

FAAMAGALOINA O LA'U TANE MUAMUA

Taofia le igoa

O le suesue i le faataitaiga a Keriso e uiga i le alofa ma le faamagalo atu, sa fesoasoani i le faatoilaloina o le tiga na ou lagonaina ina ua tatala la'u faaipoipoga.

I na ua tupu ia te a'u se tulaga ou te le'i masani ai, o le feagai ma se teteaga ou te le'i manao i ai, sa ou oo i le tiga ma le teenaina lea ou te le'i oo muamua lava i ai. Sa 40 ma ona tupu tausaga o lo'u matua, [ma] tuua toatasi e faauma le tausiga o la'u fanau talavou, [sa] i ai sa'u galuega tumau, ma togoti le mokesi. Sa ou lagonaina le lofituina, vaivai, ma le popole, ae na matele lava i le faatumulia i le tiga aupito sili ona matuitui ua ou oo i ai.

Ona o lo'u faavae i le talalelei ma lo'u naunau e ola amiotonu, sa ou iloaina ai, e tatau lava ona ou faamagalo atu i la'u tane muamua. Sa ou iloaina sa taua le aua ne'i ou faitio e uiga ia te ia i luma o tamaiti, ae o le a faapefea ona te'a ma a'u na lagona o le teenaina lea sa ou fia tagi ee ai i le ita?

O aso fai soo i taimi ou te ita ai, ou te liliu atu ai i tusitusiga paia, e saili le taitaiga mai le Agaga. Sa ou sailiili ma le filiga i le ao ma le po.

Sa manaomia ona ou iloa po o le a se mea e mafai ona ou faia i lenei fetaulaigaala e le masani ai lo'u olaga, e mulimuli i le faataitaiga a le Faaola, e faalogo ma usitai i Lana valaau e mulimuli atu ia te Ia.

A o ou suesue i tusitusiga paia, sa ou tusia i lalo uiga auaumama taitasi o Iesu Keriso, na ou manao e atiina ae i lo'u lava olaga. Sa ou faamau-mauina aoaoga mai tala ma faataoto ia na Ia faasoa mai i le taimi o Lana auunaga faaletino. Sa ou tusia mea na tautala mai i lo'u loto e uiga i le faamagalo atu. Sa ou tusia ma le

maelega i lau api ia faigata ma tofotofoga na feagai ma le Alii ma auala na Ia faatoilaloina ai.

I le aluga o taimi na ou iloaina ai o Ona tiga, sa sili atu ona ogaoga nai lo o a'u, ae sa Ia faamagaloina i latou o e sa faatiga ia te Ia. O Ia o se faataitaiga atoatoa. O lena tamai api, ua tumu i lesona mai le soifuaga o le Alii, na avea ma se punavai o le malosia tele ia te au. Sa avea ma au maea faaola. O le mulimuli ai i Lana faataitaiga, sa ou naunau ai e onosai i ou tofotofoga i le lelei ou te mafaia ai. Sa ou naunau e agai i luma mai i ou tiga.



FAAMAGALO ATU: O LE UTE O LE TALALELEI

“O se agaga o le faamagalo atu ma se uiga faaalua o le alofa ma le agaalofa ia i latou o e atonu na faia ni mea sese ia i tatou, o le aano tonu lea o le talalelei a Iesu Keriso. E manaomia e i tatou taitoatasi lenei agaga. E manaomia e le lalolagi atoa. Na aoaoina mai e le Alii. Sa la faataitaia [i se ala] e leai se isi lava [tagata] ua ia faataitaia.”

Peresitene Gordon B. Hinckley (1910–2008), “Ao Outou e Ao ona Faamagalo Atu,” *Liahona*, Nov 1991, 2.



Sa aoga! O lenei la i ni nai tausaga mulimuli ane, ua faamanuiaina au i le i ai o se sootaga lelei ma lau tane muamua. E ui lava ua toe faaipoipo o ia, ae ua lelei lava ma ua leai se tiga o le ma sootaga i le avea o ni matua i le ma fanau. E ala i le mulimuli i le faataitaiga a Keriso o le le faitioina o ia, sa ou faatoilaloina ai lagona le lelei o le tiga ma le teenaina. Ua mafai ona ou alofa!

Oka se lesona ina a taua na ou aoaoina i le taimi o lenei tofotofoga ogaoga. Ou te faafetai mo le faataitaiga atoatoa a lo'u Faaola. O Ia o lo'u papa ma lo'u faavae. Ma ou te le lagonaina lava le tuua na o a'u. O loo i ai ia te a'u Lona alofa, Lana Togiola, Lana faataitaiga atoatoa, ma le alofa ma faamanuiaga a se Tama Faalelagi peleina. ■

E MAFAI FAAPEFEA ONA FESOASOANI LE SUESUEINA O TUSITUSIGA PAIA IA I TATOU I TAIMI O TOFOTOFOGA?

"E mafai e mau ona faatoafimalieina se agaga vevesi, tuu atu le filemu, faamoemoe, ma se toefuataiga o le talitonuina o gafatia o se tagata e faatoilalo ai luitau o le olaga. Ua i ai ia i latou se mana malosi e faamalolo ai luitau faalelagona pe afai o i ai le faatuatua i le Faaola" (Richard G. Scott, "O Le Mana o Tusitusiga Paia," *Liahona*, Nov. 2011, 6).

Mafaufau e fai le mea na faia e lenei tuafafine ina ia manumalo ai i lona tofotofoga: suesue i tusitusiga paia e vaavaai mo uiga auaumama o le Faaola ma isi tagata faamaoni. O a latou faataitaiga e mafai ona fesoasoani ia te oe i ou luitau po o fesili. Afai ua e iloa le autu e te mana'o e suesue—mo se faataitaiga, "Tumau," "Faamagalo Atu", po o le "Onosai"—e mafai ona fesoasoani le Taiala i Tusitusiga Paia e fautuaina atu ni nai mau e amata ai.

O LE LESONA I LE LAAU O LE SANITOLO [SANTOL]

Saunia e Irene Taniegra

E pei uma lava i tatou o le fualaauaina o le sanitolo i se afa.

I le aso 23 o Iuni, 2009, sa aafia ai le Atua Filipaina i se afa fulifao. I lena aoauli, sa tuu mai ai se lapataiga i la matou eria mo se matagi matua malosi. O le taimi atoa na totoe o lena aso seia oo lava i le po, sa matou faalogoina ai se mea o sasa mai i le tumutumumu o le matou fale. Ina ua fesili mai lou atalii po o le a lea mea, sa ou fai atu ia te ia, o le matou laau sanitolo o loo sasa e le savili.

Sa ou salamo i lou le tauina o fua suamalie o le sanitolo i se aso na muamua atu, e pei ona sa ou fuafua-ina. Ae na fai mai lou tina ia te au, e lei pula ia fua ma ia tuu ai pea.

I le 5:00 i le vaveao, sa ou alu ai i fafo e vaai i le laau, ma le popole i ou vaai i fua uma o le laau i luga o le eleeele. Sa le mafai ona ou vaai i totonu o le laau—sa pogisa lava fafo—ae na ou vaai i ni fua laiti se fa o paepae solo i lo matou tuafale.

O se itula mulimuli ane, sa ou toe asiasia ai le laau. Sa ou vaaia ma le fiafia le tele o fua lapopoa, sasameamata o loo tautau pea i lala. O le taeina mai o fua na toulou, na ou matauina ai o le lua o ia fua, sa i ai ni vaega eena mamai i le pito i lalo. O le isi sa i ai ni togitogi uliuli na suia ai lona lanu, ae o le fua mulimuli sa ese lava ona foliga ma tonatonā.

Sa ou faapea ua toulou fua lapopoa atu, ma mamafa; sa faaluaina lo latou lapopoa nai lo fua sa ou taeina. Ae sa i ai lava latou iina: sa tautau pea ma le saogalemu i le laau.

A o ou mafaufau e uiga i le mea na tupu, na ou faapea ai, e tai pei uma lava i tatou o ituaiga fua e lua o le fualaauaina o le sanitolo—o fua na toulou ma fua sa tautau ai pea. E mafai foi ona tatou pauu pe a featofai i tatou e tofotofoga matagia o le olaga, pe afai tatou te le o pipii mau i le laau o le ola, o lo tatou Faaola o Iesu Keriso (tagai i le 1 Nifae 8:10; 11:8–9, 20–23).

O fua ia na toulou mai le matou laau o le sanitolo sa vaivai i faamai, sa le mafai ai ona tatalia le savili. O fua na tumau pea i luga o le laau, sa faasao-ina ona sa maloloina ma malosi. Afai tatou te le tausia i tatou lava ia malolosi faaleagaga

ma maloloina lelei—aoao mai tusitu-siga paia ma perofeta soifua, tausia o poloaiga, auauna atu i isi—tatou te ono pauu foi pe a aumai e le fili ana au e faasagatau ia i tatou.

O le taimi lava na le toe faaoga ai e fualaauaina mu'amu'a le malosiaga o le laau o le sanitolo, na gata ai foi ma lo latou tuputupu a'e. E faapena foi i le taimi tatou te o ese ai mai ia Keriso, o le vine moni, e gata ai foi lo tatou alualu i luma faaleagaga (tagai i le Ioane 15:1; 1 Nifae 15:15).

O nisi foi taimi e tatau ai ona tatou lolo atu i le savili. O tofotofoga o vaega o le olaga faitino, ma o se agaga lotomaulalo e fesoasoani tatou te talia ai le finagalo o le Atua i taimi faigata. O le lotomaulalo e fesoasoani tatou te salamo ai i a tatou agasala, faamagalo atu i isi, ma galo ai tiga [o le loto].

E au faatasi ma le lotomaulalo ia le onosai. Afai tatou te onosai i o tatou tofotofoga, afai tatou te taofi pea mo sina taimi umi atu i lo tatou faatuatua, o le a mafai ona oo mai tali o loo tatou sailia. Mulimuli ane, o le a vavao ai e le Faaola le matagi. O le a oo mai le toafilemu ma le laveaiga. Afai e tumau lo tatou usiusitai ma le faamaoni, e leai se mea e mafai ona tuueseeseina i tatou mai le alofa o le Atua (tagai i le Roma 8:38–39). ■

E alala le tusitala i San Jose, Filipaina.



SA MA FILIFILI E AUAUNA ATU

Saunia e Irmgard Meissner

Sa tauivi lou toalua ma le kanesa, ae sa ma'ua taliaina e aunoa ma le faalotolotolua le valaau e auauna atu i le Malumalu o Frankfurt Siamani.

I le aso 12 o Tesema, 1994, sa ma maua ai se valaau i le telefoni mai le Aai o Sate Leki. Sa faapea mai se leo agalelei, sa fia saunoa mai Peresitene Thomas S. Monson, a'o auauna ai i le taimi lena o se Fesoasoani Lua i le Au Peresitene Sili, ia i ma'ua.

“Ua finagalo le peresitene o le Malumalu o Frankfurt Siamani e valaau oe e avea ma ona fesoasoani ae o lou faletua e avea ma se fesoasoani i le faatina o le malumalu,” o le saunoaga lea a Peresitene Monson i lo'u toalua o Gerhard. Ona faailoa mai lea e Peresitene Monson ni atugaluga e uiga i le soifua maloloina o lo'u toalua.

E 11 tausaga o tauivi Gerhard ma le kanesa o sela papa'e o le toto. E ui lava i lena luitau, sa valaauina lava i ma'ua e le Alii, ma sa ma'ua tali atu ioe e aunoa ma le faatali.

Ina ua ou faamavae mai la'u galuega e saunia e auauna atu, sa fesili

mai lo'u pule, “Pe mafai ona ou taofia oe pe a ou siia lou totogi?”

“Leai, e tatau ona ma o,” sa ou tali atu ai, ma ta'u atu ia te ia, sa ma folafola atu i le Alii o le a ma auauna atu i se misiona. “Sa ma fuafuaina e auauna atu mo ni tausaga se lua, ae ou te le iloa pe o le a ola pea lo'u toalua i lena taimi.”

Ina ua faia se siaki masani a Gerhard a'o le'i atoa se lua vaiaso mulimuli ane, sa fai mai le fomai ia te ia, “Nofu iinei; e maualuga lava le tulaga lamatia e te oti ai [pe a e alu].”

Sa faateteleina le faaletonu o le tulaga o lona soifua maloloina. Sa matuai o ma faanoanoa lava, ma sa le mafai ona ma iloa, pe o le a faapefea ona faataunuu lo ma'ua valaaua, ae sa tumu i ma'ua i le faatuatua, faamoemoe, ma le faamautinoaga. Sa ma'ua tuu atu mea uma i aao o le Alii. Afai na i ai Sana galuega mo i

ma'ua, o le a Ia faia foi se auala mo i ma'ua e faataunuu ai.


I le aso 2 o Ianuari, 1995, sa ma'ua o ai i le ma misiona. Na faafuasei ona ou iloaina ia mea na ou tuua: o lo'u tina, la'u fanau, fanau a la'u fanau, la'u galuega, lo'u fale, ma la'u togalaau. Ae o le aso na sosoo ai sa ma'ua saunia e auauna atu i le Malumalu o Frankfurt, lea na avea ai se po pogisa o se aso fou matagofie mo i ma'ua. O mea uma sa popole ai i le olaga i aso uma, sa o ese atu ma i ma'ua.

I lenei nofoaga paia sa ma maua ai le alofa, malamalama, faamoemoe, fiafia, talitonuina, mafanafana, saogalemu, puipuiga, ma le filemu lea e susulu mai i lo tatou Faaola. A o ma'ua auauna atu, sa ma feiloai ai i tagata lelei mai le tele o atunuu. E ui ina eseese gagana sa latou tautatala ai, ae sa fusia i matou i le gagana o le alofa. O le ma auaunaga i le malumalu na ma matuai fiafia ai lava.

O le agaga o le malumalu ma le malosi o le Atua na sapaapaia ai si o'u toalua mo masina e 26. I se tasi aso a'o lei leva ona faamalolo i ma'ua mai lo ma valaaua i le malumalu, sa alu ai Gerhard i le falema'i mo lona togafitiga masani. O le taimi la lenei, sa taofi ai o ia iina e fomai. I ni nai masina mulimuli ane, sa toe foi atu ai o ia i lona aiga i le lagi.

Pe a ou toe tepe i tua, ou te mafaufau i na tausaga o auaunaga i le malumalu o se meaalofa mai le lagi—o le auauna atu faatasi ma lo'u toalua i le maota o lo tatou Tama agaalofa, a'o ma faataunuuina la ma'ua folafolaga e auauna atu faatasi i se misiona. Ou te faafetai ma lo'u loto atoa mo lena aafiaga. ■

E alala le tusitala i Bavaria, Siamani.



ATA NA TUSIA E BEN SOWARDS



Saunia e Elder
Daniel L. Johnson
O Le Fitugafulu

PIPII MAU I LE AI UAMEA

O le faaauau pea ona suesue i tusitusiga paia, e fesoasoani ia i tatou ia tumau ai le taulai atu o o tatou mata, mafaufau, ma loto i le Faaola, ma a o tatou faaaoga ma ola i aoaoga o loo maua i tusitusiga paia, e faapea ona avea atili ai i tatou e faapei o Ia.

I le taimi o la latou malaga i le vao, na feala ae Liae ma lona aiga i se tasi taeao ma maua ai i luga o le elelee “se polo lapotopoto sa uiga ese lava lona gaosiga.” Sa i ai ni ona vae se lua, o le tasi [vae] sa faasino “ai le ala e tatau ona [latou] o ai” (1 Nifae 16:10).

O le Liahona, po o le polo, na tuuina mai ai foi “se tusitusiga fou” lea na tuuina atu ai ia i latou le “malamalamaaga e uiga i ala o le Alii.” O lenei tusitusiga sa “suiia mai lea taimi i lea taimi, e tusa ma le faatuatua ma le filiga sa [latou] tuu atu i ai” (tagai i le 1 Nifae 16:28–29).

Ua uma ona i ai ia Liae ma lona aiga ia papatusi apameamea, lea sa i ai i tusitusiga ma valoaga a ni perofeta o le Feagaiga Tuai. O papatusi apameamea ma le Liahona na faia mai ai a latou tusitusiga paia, ma sa faamoemoe ia faaauau pea ona suesue ma usitai i ai le nuu o Liae. Afai sa latou faia lena mea, sa latou agai i luma i la latou malaga; ae afai e leai, sa latou nonofo ai lava i le vao, ma sa mafatia ai i le fiaaai ma le fia feinu.

O le a le mea sa taumafai le Alii e aoao mai ia i latou—ma i tatou—e ala i le ola o le Liahona?

O se tasi o faamoemoega autu o tusitusiga paia, o le fesoasoani lea ia tatou iloa, malamalama, ma avea e faapei o le Faaola (tagai i le 3 Nifae 27:27). O le faifaipaea o le suesueina o tusitusiga paia, e fesoasoani e tumau ai ona taulai atu o tatou mata, mafaufau, ma loto ia te Ia. A o tatou faaaogaina ma ola i aoaoga o loo maua i tusitusiga paia, e faapea ona tatou avea atili ai e faapei o Ia. A o tatou avea atili e faapei o Ia, e faapea ona avea i tatou ma tagata tausinio mo le ola e faavavau (tagai i le Ioane 5:39).

Miti a Liae

I le miti po o le faaaliga vaaia a Liae, e fa ni vaega o tagata sa faailoa mai ai. O vaega muamua e tolu na ulufale atu i le ala na tau atu i le laau o le ola. O le faitotoa i le ala o le papatisoga (tagai i le 2 Nifae 31:17–18), o lona uiga la, o loo tatou talanoa e uiga i tagata o le Ekalesia i nei vaega muamua e tolu.

O le a ou le talanoa i le vaega lona fa—o i latou ua o atu sao i le fale tele ma le ateatea. Ae peitai, a o tatou mafaufau i isi vaega e tolu, atonu e te manao e fai se iloiloga o lou lotoifale e iloa ai le vaega o loo e i ai, ma fesili ifo ia te oe lava, po o fea le vaega e te fia auai ai.

Vaega 1

“Ma sa ou vaai i motu o tagata e lē masino, o le toatele o i latou sa fetaomi mai i luma, ina ia latou maua le ala e tau mai i le laau lea sa ou tu ai i ona tafatafa.

“Ma sa oo ina latou o mai i luma ma amata ona savavali i le ala e tau mai i le laau.

“Ma sa oo ina alu ae se puao o le pogisa; ioe, o se puao tele lava o le pogisa, sa oo ina lē iloa ai e i latou o e na amata ona savavali i le ala, lo latou ala, ma latou feseseai ai, ma leiloloa” (1 Nifae 8:21–23).

O le mea moni sa lei faitau pe suesue tagata o le vaega lenei i tusitusiga paia, faalogologo pe matamata i le kona-fesi aoao, faitau le *Liahona*, po o le auai i sauniga i Aso Sa, lea e ofo mai ai e nei mea uma le afitoga a le Atua. O le mea lena, ua leiloa ai lo latou ala.

Vaega 2

“Ma sa oo ina ou vaai i isi o fetaomi mai i luma, ma sa latou o mai ma fepiiti i le pito o le āi uamea; ma sa latou





INA IA MAUA LE FAATUATUA

“Ina ia maua ma faatumauina le faatuatua tatou te manaomia, e taua lo tatou faitauina ma suesueina ma le mafaufau loloto ia tusinga paia”

Perisitene Thomas S. Monson,
“Ia Avea ma se Faaitaiga ma se Malamalama,” *Liahona*,
Nov. 2015, 87.

fetaomi mai i luma e ala mai i le puao o le pogisa, ma fepiiti i le āi uamea, seia oo lava ina latou oo mai ma aai i le fua o le laau. . . .

“Ma ina ua uma ona latou totofo i le fua sa latou mamā, ona o i latou o e sa faatauemu mai ia te i latou; ma sa latou pauu ese atu ai i ala faasaina ma ua leiloloa” (1 Nifae 8:24, 28).

Ia matau o le vaega lenei sa maua ma pipii i le ai uamea. Sa latou pipii ai pea seia oo ina latou tau atu i le laau o le ola ma aai i ona fua. Ae sa latou maasiasi i le talalelei a Iesu Keriso, ma le toe tulai atu i le Faaola, ma na faasalaveia e faatosinaga, faaosoosoga, ma oa o le lalolagi. Ona leiloloa ai foi lea o i latou.

O le ki e malamalama ai i nei fuaiupu o le fuaitau “fepiiti i le ai uamea.” Ou te faatusaina le upu *fepiiti* i se aafiaga o le “tuelima paepae”. Afai sa e alu i se tietiega vaapau i vaitafe aave, e te manatua ai, o le mau tele o lau pipii i le vaapau na suia ai le lanu o ou tuelima i le paepae. Ma, ina ua e oo mai i vai malū, o le a lau mea na fai? *Na faamamulu ese [ou lima]*.

I le tulaga o le talalelei, e mafai ona tupu lenei mea pe a talosagaina oe e saunia se lauga, po o le, pe a e feagai ma se faalavelave, e pei o se maliu i le aiga po o le motusia o se mafutaga. E te saili i lauga o le konafesi aoao e seasea lava ona e faalagologo i ai, po o le sue i tusinga paia lea e masani ona e faatamala i ai. E te sailia le taitaiga ma le lagolago faaleagaga ona o lou vaivai faaleagaga. Ma, e uma loa le faalavelave, *e faamamulu loa!* E te toe tuuina tusinga paia i luga o le fata, toe foi i mausa tuai o le seāseā [e] alu i le Lotu, ma lafoai tatalo i aso uma—seiloga foi e oo mai le isi faalavelave e sosoo ai, po o le aafiaga i vai aave. I se isi faaupuga, na pau le taimi e te liliu atu ai i le Faaola mo se fesoasoani, o le taimi e tulai mai ai se manaoga e matua manaomia nai lo le faia o se mea e faauuau pea.

O tagata o lenei vaega ua papatisoina, ma o le toatele atonu ua faauuina i le perisitua, maua sauniga o le malumalu, auuana atu faamisiona, ma faaipoipoina i le malumalu. Ae peitai *ua latou faamaamulu!* Ua latou le toe faitauina *pea lava pea* ia tusinga paia, pauu atu i ala faasaina, ma ua leiloloa.

O le mea e faafetai ai, o le tele o talavou matutua ma faifeautalai ua maea misiona, e tumau faamaoni i upumoni o le talalelei na latou aoaoina ma faasoa atu. O loo tau-lai atu foi o latou olaga i le Faaola e ala i le suesueina o tusitusiga paia ma tatalo i aso taitasi. Matou te faafetai mo i latou ma lo latou faamaoni. O i latou o le lumanai o le Ekalesia ma matua i le lumanai o i latou o e o le a tauavea le Ekalesia agai i luma.

Vaega 3

“Faauta, sa vaai [Liae] i isi motu o tagata o fetaomi mai i luma; ma sa latou o mai ma fepiiti i le pito o le āi uamea; ma sa latou fetaomi mai i luma i lo latou ala, ma piimau pea i le āi uamea, seia oo ina latou o mai i luma ma faapauu i lalo ma aai i le fua o le laau” (1 Nifae 8:30).

Ia matau le fuaitau “piimau pea i le āi uamea.” O le vaega leni sa faitau *pea lava pea* i tusitusiga paia. Sa *faaauau pea* ona latou taulai atu i le Faaola.

O tusitusiga paia o mea aupito taua ia e mafai ona tatou suesue i ai. E tatau ona manatu i ai e sili atu le taua i lo o le kemisi, fisiki, tausitusi, siva, musika, taaloga, po o soo se isi lava suesuega po o gaoioiga faalelalolagi.

Amata aso uma i tusitusiga paia. O le tatalo ma le suesue i tusitusiga paia e o faatasi lava. O i laua o ni soa e le mavavaeeseina. O le tatalo e le aunoa, o le a taitai atu ai oe i tusitusiga paia, ma o le faaauau pea ona suesue i tusitusiga paia o le a taitai atu ai oe i le tatalo. O ia mea uma e lua e te taulai atu ai i le Faaola, ma mafai ona e maua ai faaaliga ma le toafilemu lea e na o le “piimau pea i le ai uamea” e oo mai ai. O le tatalo ma le suesue i tusitusiga paia o le a taitai atu ai oe i le malumalu. O le a latou faia ina ia e manao e tausi ia paia le aso Sapatu. O le a latou fesoasoani ia te oe e aloese ma faatoilalo ia faaosoosoga a le fili.

Ou te manao nei e tatau mai o outou mafaufau i le fuaitau “latou o mai i luma ma *faapauu i lalo* ma aai i le fua o le laau.” O se vaega taua e malamalama ai i leni fuaitau o loo maua i le 1 Nifae mataupu 11:

“Ma sa oo ina ua uma ona ou vaai i le laau, sa ou fai atu i le Agaga: Ua ou vaai ua e faaali mai ia te au le laau ua pele i mea uma.

“Ma sa fetalai mai o ia ia te au: O le a le mea ua e manao i ai?”

“Ma sa ou fai atu ia te ia: Ia ou iloa lona uiga.”

Ma sa oo ina fetalai mai o ia ia te au, “Vaai ia!” Ona vaai lea o Nifae i le faaaliga vaai i le Taupou o Maria, o le na

faailoa mai e le agelu “o le tinā lea o le Alo o le Atua.”

O le isi, sa vaai Nifae ua sapaapapai e Maria se tamameamea—i ona lima—“o le Tamai Mamoe a le Atua.”

Ia matau ane le fuaiupu e 24: “Ma sa ou vaai, ma sa ou iloa atu le Alo o le Atua ua femaliuai i totonu o le fanauga a tagata; ma sa ou vaai i le toatele ua *faapauu i lalo* i ona vae ma tapuai atu ia te ia” (tagai i le 1 Nifae 11:9–24; ua faaopoopo le faamamafa).

O le laau ua faatusa i le alofa o le Atua, e pei ona faaali mai e ala i Lona Alo, o Iesu Keriso (tagai i le 1 Nifae 11:21–22). O i latou i le Vaega 2 o e sa taunuu atu i le laau sa lei faapauu i lalo, pei ona sa faia e i latou i le Vaega 3. Mata e mafai ona [tatou] i ai i le afioaga o le Alo o le Atua ae [tatou te] le iloa? E na o lou faitau lava i le Feagaiga Fou e iloa ai le tali. E tolu tausaga na auauna atu ai le Faaola, aoao atu ma fai vavega, ae e toaititi lava na iloa o Ia mo le tagata sa i ai o Ia.

Sailiili i Tusitusiga Paia

Fesili ifo ia te oe lava i fesili nei.

- O a ni mea e mafai ona ou faia, ia mautinoa ai e faaauau pea ona ou pipii mau i le ai uamea, a faapea, ou te taunuu atu i le laau o le ola, o le a ou iloa le Faaola ma faapau i lalo ma tapuai atu ia te Ia?
- O a ni mea e mafai ona ou faia ia tumau ai le taulai atu o ou mata, mafaufau, ma le loto i le Faaola?
- O a ni mea e mafai ona ou faia ina ia aveva atili ai e faapei o le Faaola?

O le tali i fesili uma e tolu o loo maua i tusitusiga paia. Ua fetalai mai le Faaola, “E suesue outou i tusi; aua ua outou manatu tou te maua ai le ola e faavavau: o tusi foi ia o loo molimau ia te au” (Ioane 5:39). Afai e te faatofu oe lava i tusitusiga paia i aso taitasi o lou olaga, o le a e maua le malosi e tetee atu ai ni solitulafono matuia; ae e sili atu le taua, o le a faapea ona e iloa ai le Faaola. O le a mafai ona taulai atu ou mata, mafaufau, ma le loto ia te Ia.

A o faapea ona e iloa Iesu Keriso, faaoga Ana aoaoga, ma mulimuli i Ana faataitaiga, o le a aveva oe e faapei o Ia. A o aveva oe e faapei o Ia, o le a aveva oe ma tagata tausinio e ola e faavavau i Lona afioaga. ■

Mai se lauga o le faigalotu, “Faaauau Pea Ona Pipii Mau i le Ai Uamea,” na tuuina atu i le Iunivesite o Polika Iaga–Idaho i le aso 12 Me, 2015. Mo le lauga atoa i le faaPeretania, asiasi i le web.byui.edu/devotionalsandspeeches.

O LE TUSI OFOFOGIA A Mamona


Saunia e John L. Sorenson

Polofesa Malolo Faamamaluina o Suesuega e Faatatau i Tagata,
lunivesite o Polika laga

Sa faataunuuina e Mamona le galuega faigata o le oototoga o talafaamaumau a sa Nifae i se ala mataalia ma le ofoofogia.

I na ua vaai atu Mamona na toetoe a faaumatiaina lona nuu o sa Nifae, sa ia galue loa e “tusia se oototoga laitiiti” o a latou talafaamaumau (Mamona 5:9). O lenei galuega faatino sa amata i le nofoaga mulimuli lea sa tolauapi ai sa Nifae ona faatoa latou faapotopoto mulimuli ai lea i le lauelelele o Kumora.

O ituaiga olaga sa onosaia e sa Nifae, sa matuai leaga lava; sa sulufai solo tagata ma le le iloa po o fea e maua ai ni meaai, lavalava, ma malutaga. O le tusiga o tusitusiga a Mamona, atonu na faasalafa atu i le fa tausaga o le vaitau o tapenapenaga mo le taua faaii lea na loto i ai le taitaiu sa Lamana, ae po o le a lava le mea e tupu, na maea le oototoga ma tanumia ai faaputuga o faamatalaga taua i le Mauga o Kumora ao lei taitai tupu le fetauaiga mulimuli (tagai i le Mamona 6:6).





E manino lava o le faiga o le Tusi a Mamona sa o se taumafaiga fita, ae maise lava ona o tulaga “o le taimi o le taua” lea sa galue ai Mamona, faapea ma ona tiute faaopoopo i le faatonuina o ana autau ao latou tapena mo le taua mulimuli. Ma e faigofie lava ona malamalama, e le faapea ua aunoa le tusiga faaiu ma ni le atoatoa.¹

Tapulaa o le Galuega a Mamona

Mafaufau i nisi o mea na faatapulaa ai le feagai o Mamona mai le ausiaina o lona faamoemoe:

1. O le telē o lana faamaumauga fou, o le a matuai faatapulaaina lava. O le tusi na tatau ona faigofie ona feaveai ina ia mafai ona ave e Moronae i se nofoaga saogalemu.
2. O le tusiga faitino e ao ona sauniaina ina ia i ai pea i ni seneturi se tele.
3. Mai ituaiga tusitusi atonu sa mafai ona faaaoga e Mamona, sa na o le tasi le ituaiga sa fetau le puupuu e ofi ai i le tusi.
4. O tala faamatala sa tatau ona talafeagai le umi, faamaoni i mea moni o le talafaasolopito o loo i faamaumauga sa ia aoteleina, ma faaupu i se faiga sa ia manatu e taugamalie.
5. Sa puupuu le taimi atofaina o le galuega. Sa sili laitiiti atu lava ma le tolu tausaga le umi na tuu ia Mamona e fai uma ai le ootoga ma le tusiga o le silia ma le 600 tausaga o talafaasolopito. Atonu sa leai sona taimi e faitau uma ai faamaumauga na teuina ia sa na taulimaina, ma e mautinoa lava le leai o se taimi mo le siakiina ma le toe faasao-saoina o le tusiga.

Faatasi ai ma nei mea uma na taofiofia ai, na faapefea ona filifili e Mamona po o a faamatalaga e faaaofia [i le tusi] ae o a faamatalaga e aveese?

I nisi o itu, o lana ausiaga musuia i le gaosiga o le Tusi a Mamona, sa pei lava le faateia ma le maoae o le ausiaga na faia mulimuli ane e Iosefa Samita i le faaliliuga o le faamaumauga i se taimi puupuu.

Filifilia o se Faiga o le Tusitusi

O loo taua mai i le tusiga o le Tusi a Mamona ni nai manatu i le faigata i le au tusiupu ona faamanino mai a latou faamatalaga (tagai i le Iakopo 4:1;

Mamona 9:33; Eteru 12:23–25, 40). Na fai mai Mamona, “E tele mea o i ai, ia e le mafai ona matou tusia, e tusa ma la matou gagana” (3 Nifae 5:18). E mautinoa lava o le uiga lenei o “La matou gagana” e faatatau i le faiga o le latou tusitusi, ae le o le latou gagana tautala. Ua tau mai foi e Moronae ia i tatou e faapea, semanu e leai se “le atoatoa” (Mamona 9:33) pe ana latou faaaogaina le tusiga faaEperu, o se faiga faa-alafapeta.

O “faailoga” sa faaaoga e tusi ai sa taua e tusi talafaa-solopito a sa Nifae o le “faa-Aikupito ua sui” (Mamona 9:32). O lenei faiga, sa faia mai i le “poto o tagata Iutaia ma le gagana a tagata Aikupito” (1 Nifae 1:2). O faaailoga faa-Aikupito sa faaaoga i nisi o taimi i Palesitina anamua e tusi ai faaleoga o upu faa-Eperu.² Mai le faataitaiga o faailoga i le “the Anthon Transcript,”³ lea sa foliga mai o se kopi o faailoga mai papatusi sa faaliliuina e Iosefa Samita, e manino lava sa lei faia tonu i tusitusiga faa-Aikupito na faaaoga i aso uma i le taimi oLiae. E tai foliga lava i faailoga o le tusilima faa-Aikupito [hieratic Egyptian], o se faiga tuai atu, o faailoga fesui, o loo faaaogaina lava e i latou pe a latou faaaogaina pulumu ma vaitusi nai lo o le vaneina i luga o papa.

Sa sili atu le puupuu ma malamalama gofie o le faiga faafaailoga nai lo le tusiga i le alafapeta faa-Eperu, ae e sili atu ona le manino, aua o se vaega tele o faailoga sa faatusa i ai fasiupu po o upu atoatoa, ma faigata (ua taua i aso nei o logokalama [logograms]) nai lo o le faiga o faaleoga lea e maua ai upu e pei ona i ai i se alafapeta. O le uiga o logokalama [logogram] taitasi na tatau lava ona taulotoina. O lenei le manino atonu sa avea ma se vaega o le faaifitauli o “le tuuga o a matou upu” (Eteru 12:25) lea na taua e Moronae.

O se mafuaaga faaopoopo o le “le atoatoa” atonu ona sa matele lava i le faaaogaina o le faailoga faa-Aikupito e tusi faatusilima ai, o lona faaaogaaga e vane ai se faamaumauga i luga o papatusi metala, e mafai ona faauiga e faapea, o sasi laiti i le lima o se tagata vane faamaumauga ae leai se “titina” lelei e fai ai faasaoga, e iu ina sese ai le faitauina o faa-faailoga.

Seti e Tele o Faamaumauga

E le gata i papatusi tetele a Nifae, sa faaaogaina foi ni faamatalaga faaopoopo i ni taimi faapitoa i le fatuina o faamatalaga faamatala a Mamona. Sa ia taua i ni nai taimi

lona faalagolago i “lana [Alema] lava talafaamaumau” (Alema 5:2; mataupu e 7, ulutala; 35:16). Sa ia faaaogaina foi “talafaamaumau a Helamana,” ma “ona atalii” (faatomuaga i le tusi a Helamana), ma tatou te faitau ai foi i le “talafaamaumau a Nifae” (3 Nifae 5:10).


O nisi taimi sa faalagolago ai foi Mamona i isi uluai tusitusiga, o nisi o na uluai tusitusiga e lei manino ona ia faailoa mai. Atonu o nisi o talafaamaumau faaopoopo e aofia ai:

- Le anotusi o le lauga maoae a le Tupu o Peniamina (Mosaea 2:9–Mosaea 5).
- O le talafaamaumau i papatusi a Senifa (Mosaea 9–22).
- O le talaiga a Alema i Saraemila, Kitiona, ma Meleka, lea o loo faamatala e ia lava (Alema 5, 7, ma le 8).
- O le tala i aafiaga a Alema ma Amoleka i Amonaea (Alema 9–14).
- O le faamatalaga auiliili o le galuega a atalii o Mosaea ma a latou soa i totonu o sa Lamanā (Alema 17–27).
- O aoaoga a Alema i ona atalii o Helamana, Sepulona ma Korianetona (Alema 36–42).

Sa faaaofia ai foi e Moronae lona faaliliuga ma le faamatalaga o le talafaasolopito a Eteru o sa Iareto, sa saunia ma tuuina i le faaiuga e Moronae e fai ma tusi a Eteru, faapea foi ma vaega o aoaoga ma tusi mai lona tama o Mamona (Moronae 7–9).⁴

O talafaamaumau paia e sili ona taua sa teuina i luga papatusi ina ia mautinoa ai e oo atu lava i le faava-vau o i ai; o tala e teuina i luga o nisi mea e maaleale, sa latou manatu, o le a le mafai ona faitauina pe a umi se taimi o tuu (tagai i le Iakopo 4:2). O le faaaogaaga o kopi o tusitusiga paia i luga o pepa mo le faaaogaina i aso uma, ua tau faaataata mai e ala i le mu o na [kopil] sa umia e tagata liliu mai a Alema i Amonaea (tagai i le Alema 14:8; faatusatusa i le Mosaea 2:8; 29:4; ma le Alema 63:12). O papatusi apamemea sa le faigofie ona gaosi (tagai i le Mamona 8:5) ma togitogia, o lea sa utiuti ai le sapalai.

O le faaaogaina o mea eseese sa ia maua, sa tusia ai e Mamona lana talafaasolopito “e tusa ai ma le poto ma le malamalama [na] tuu mai e le Atua” ia te ia (Upu a



Mamona 1:9). O le fesoasoani faalelagi o nisi taimi sa tuusao ma patino, e pei o le taimi na faatonuina ai e le Alii o ia, ia aofia ai se faamatalaga umi atu o aoaoga a Iesu i sa Nifae (tagai i le 3 Nifae 26:6–12), peitai e leai se faailoaga ua tuuina mai e faapea, na faaali atu ia te ia ia faamatalaga faaopoopo o le talafaasolopito.

“Ma Ua Faapea Ona Tatou Vaai Ai”

E i ai nai taimi na fai mai ai Mamona, o lana ototoga e le mafai ona aofia ai le sili atu ma se vaega itiiti o faamatalaga talafaasolopito na maua i papatusi lapopoa a Nifae (tagai i le Upu a Mamona 1:5; 3 Nifae 5:8; 26:6; tagai foi i le Iakopo 3:13–14; 4:1). Na faapefea la ona, ia faia lana filifiliga o faamatalaga e faaoga?

O le mea autu sa ia faaogaina e fai ai ana filifiliga sa faafia ona faaalua mai i lana tusi. O le faamoemoega, ina ia mautinoa o ana tagata faitau, ae maise lava o e nofoia i le lumanai ia le nuu o le folafolaga o Amerika, ae maise lava o e e tupuga mai ia Liae, ia malamalama i le taua mo i latou o le folafolaga ma le valoaga na tuuina mai ia tama Liae: “O le tulaga e oo i ai la outou tausiga o au poloaiga, o le aoutou manuia i le laueleele” (Iaroma 1:9). O le mea moni, o le faamatalaga *le lelei* a Amaronae e uiga i le saunoaga lauiloa a Liae lea na sili ona taulai atu i ai Mamona: “O le tulaga e oo i ai la outou *le* tausiga o au poloaiga tou te *le* manuia i le laueleele” (Ominae 1:6; faaopoopo le faamamafa).

O lesona a Mamona ua faaalua ai le eseese tele i le va o le lelei ma le leaga. O le nuu o loo i ai ilana talafaamaumau ua faamamafa mai ai le usiustai ma le mama i le tasi itu ma le lotomaaa amioleaga i le isi itu. Ua ia faamatalaina tagata faatautala o ni tagata amioleaga ma ua tata i ai o latou tau-nuuga; ua ia faamatalaina tagata totoa o ni tagata tauleleia i le toetoe lava i itu uma. O tagata e le lelei tele pe leaga tele, e seāseā ona tauaina. Sa manao Mamona ia le i ai se fesili i mafaufau o ana au faitau, o le lelei ma le leaga e matuai eseese lava (mataupu uma a Mamona lava ia e uiga i lena eseese i le Moronae 7:5–19). E mautinoa lava sa faaopoopo

e Mamona nisi o ana lipoti i ana faauigaga patino musuia. O lenei ituaiga o tusiga e masani ona iloogofie i le faaogaina o se fuaitau e pei o le “ma ua faapea ona tatou vaai ai” (mo se faaitaiga, i le Alema 42:4, 7, 14; Helamana 3:23–31; 6:34–40).

Sa tuuina mai e Mamona ma Moronae la laua talafaamaumau “puupuū” i a laua au faitau i le lumanai o se ituaiga talafaasolopito faamalamalama tulaga ese. Sa laua tusia le la talafaamaumau mo le lalolagi, e le pei o le tusiga o le talafaasolopito e se tusi talafaasolopito, ae o se savali lelei mamana na faamoemoaina e aoa ai le au faitau i lesona sa aoaoina e tamalii e toalua, e ala i auunaga umi ma le faigata i o laua tagata ma i le Atua. Sa laua faaogaina ia punaoa sili ona lelei sa maua, i le auuala sili ona faamanuiaina sa la iloa ona [faaoga ai]. O le galuega ma le tuuto ua faamaonia i le galuega sa laua faia, ua faamanuiaina ai tagata uma i o tatou aso.

Ou te matuai faafetai tele ia te i laua. ■

FAAMATALAGA

1. Mo se faaitaiga, o nai sasi laiti (e tutusa ma “mea sese i le sipelaga o upu” i aso nei) atonu sa i ai i “mea sese” ia na taua e Moronae i le itulau autu o le Tusi a Mamona e faapea “o sese ia o tagata.” E aofia ai le lipoti sese e uiga i le mauaina o le aai o Nifaea (Alema 51:26; e eseese ma le Alema 59:5) ma se mea sese lea na faapea mai, o lea lava mea na tupu [o le mauaina o le aai o Nifaea], i se tasi o fuaitau sa tupu i le tausaga lona 26 o le nofoaiga a faamasino (Alema 56:9) ma le isi i le tausaga lona 28 (Alema 53:22–23). O pona faapena e iloa ai le itu faaletagata o le galuega o le tusi talafaasolopito, e ui, e le tata ona i ai se faafitauli ogaoga e tulai mai ia i tatou i le faitauina o le tala.
2. Tagai i le, John A. Tvedtnes and Stephen D. Ricks, “Jewish and Other Semitic Texts Written in Egyptian Characters,” *Journal of Book of Mormon Studies*, vol. 5, nu. 2 (1996), 156–63; ma le John A. Tvedtnes, “Linguistic Implications of the Tel-Arad Ostraca,” *Newsletter and Proceedings of the Society for Early Historic Archaeology*, nu. 127 (1971).
3. Tagai i le B. H. Roberts, *New Witnesses for God*, 3 vol. (1909), 2:93–104.
4. Mo nisi faamatalaga e uiga i puna eseese o talafaamaumau, tagai i le “O Se Faamalamalama Puupuū e uiga i le Tusi a Mamona” i le Tusi a Mamona.





O LE OLIOLI O LE Galuega o Talafaasolopito o Aiga

Ua faamanino mai e le folafolaga a Elia e faapea, ua i ai ia i tatou taitoatasi se matafaioi i augatupulaga na muamua atu ia i tatou ma tupulaga e mulimuli mai ia i tatou.

Ia aua lava nei galo o talafaasolopito o aiga—ma sauniga o le malumalu ua mafai ona faia ai—o se vaega taua o le galuega o le faaolataga, ma o le auai ai i lenei galuega paia mo e ua maliliu, e faamanuia ai olaga o e o loo soifua. E faamallosia ai lo tatou faatuatua i le, ma le tuuto atu i le talalelei, e fesoasoani tatou te tetee atu ai i faaosoosoga, e aumai vavalalata faatasi ai o tatou aiga, ma faamalolosia ai a tatou uarota ma siteki.

Ou te manao e faamamafa atu le “su’e, ave, ma le aoao” o le galuega o talafaasolopito o aiga. O le *su’e*, o lona uiga ia faaoga le uepisaite a le FamilySearch po o le *O Lo’u Aiga: O Tala e Aumaia Faatasi ai i Tatou* tamaitusi¹ e su’e ai le igoa o le tasi pe sili atu foi o ou tuua po o a latou fanau. Ona *ave* lea o nei igoa i le malumalu, po o le faasoa atu [o na igoa] i isi ina ia mafai ona latou ave. (Afai e mafai, ia o i le malumalu o se aiga.) O le mea mulimuli, *aoao* lou aiga ona aoao lea o isi ia faia foi lena mea.

O le fuafuaga a lo Tatou Tama e faatatau i aiga, ua faatusaina i se laau tele. Ina ia ola ma tupu le laau, e manaomia ai uma ona aa ma lala. E faapena foi le tatau ona tatou fesootai atu i o tatou aa—o tatou matua, matua o matua ma isi tuua—faapena foi i o tatou lala—o a tatou fanau, fanau a fanau, ma isi fanau. O loo faaoga e ni nai mau faagaetia le talafaatusa o se laau ma aa ma lala e faatusa i le aiga (tagai i le Isaia 11:1; Iakopo 5).



Saunia e Elder
Quentin L. Cook

O Le Korama
a Aposetolo e
Toasefululua



Faatasi ai ma Mose, sa faaali atu Elia i le Faaola ma Peteru, Iakopo, ma Ioane i le Mauga o Liua i le taulotoaiga o taimi.

O Le Misiona a Elia

Na valoia e le perofeta o Malaki, i le tusi mulimuli o le Feagaiga Tuai, se taimi o le a toe foi mai ai i le lalolagi ia Elia le perofeta “a o lei oo mai le aso o Ieova e sili ma le matautia . . . [e] faaliliuina loto o matua i fanau, ma loto o fanau i o latou matua, nei ou alu atu ma ou taia le nuu i le faafanoga” (Malaki 4:5–6).

Ina ua faaali mai le agelu o Moronae i le [taulealea] e 17 tausaga le matua o Iosefa Samita i le 1823, na ia sii mai nei lava fuai-upu e tasi mai le Malaki ae na eseese lo latou tuuina mai. Na fai mai Moronae i lena po o Setema:

“Faauta, o le a ou faaali atu ia te outou le Perisitua, e ala i le lima o Elia le perofeta, ae lei oo mai le aso tele ma le matautia o le Alii.

“. . . Ma o le a ia totoina i loto o fanau folafolaga na faia i tamā, ma o le a liliu atu loto o fanau i o latou tamā. Afai e lē faapea, o le a faaumatia atoa le lalolagi i lona afio mai” (Iosefa Samita—Talafaasolopito 1:38–39).

E faafa ona ta’u mai e le agelu o Moronae ia upu a Malaki i le taulealea o Iosefa.

Vaai faalemafaufau pe ana faapea, na pau le mea sa tatou iloa e uiga i lenei perofeta maoae, o mea ia sa iloa e Iosefa Samita mai i le Tusi Paia. Mai lena tusi o tusitusiga paia ua tatou iloa ai, sa soifua Elia i se vaitaimi o le atuatuva, toetiiti lava 900 tausaga a o lumanai le soifua mai o Keriso. O le au amioleaga e toalua o Aapo ma Isabela, sa nofotupu i le amioleaga o se tupu ma se masiofo i Isaraelu, sa uunaia le mataupu o le tapuai i le atua sese o Paala ma le fasiotia o perofeta a le Alii, faapea ai ma isi tagata.

O Elia o se perofeta maoae. E taliaina e le au Kerisiano ma le au Iutaia i le lalolagi atoa le tala ia Elia i le Feagaiga Tuai.

Ua tusia i tusitusiga paia le ala na faasaoina faavavega ai le soifua o Elia, ma le ala na ia faasaoina ai se fafine ua oti lana tane mai le oge, ma faatu mai lana tama tama mai le oti (tagai i le 1 Tupu 17). O loo faamatala e Elia le ala na faamautinoa atu ai ia te ia e “se leo filemu ma le itiiti” e faapea, sa le na’o ia i lona tuuto atu ia Ieova (tagai i le 1 Tupu 19:4–14). Mulimuli ane, na liuaina Elia ma aveina atu i le lagi e aunoa ma le tofo i le oti (tagai i le 2 Tupu 2:7–12).

E na o faaaliga i onapo nei, na faaali mai ai le matafaioi atoa a Elia. O ia le perofeta mulimuli na umiaina le mana faamau o le Perisitua Mekisateko a o lei oo i le vaitaimi o Iesu Keriso. Faatasi ai ma Mose, sa faaali atu o ia i le Faaola ma Peteru, Iakopo, ma Ioane i le Mauga o Liua i le tau-lotoaiga o taimi (tagai i le Mataio 17:1–4; Mareko 9:2–5). I le avea ma se elemene taua o le Toefuataiga, sa faaali mai ai Elia ia Iosefa Samita ma Oliva Kaotui i le 1836 i le Malumalu o Katelani. O iina, sa ia toe fuatai mai ai ki o le mana o faamauga, o le taimi lenei mo faamauga o aiga i lenei tisipenisione, o le faataunuuga o le valoaga a Malaki (tagai i le MF&F 110:13–16). Ona na auina mai Elia i lenei tisipenisione, ua avanoa ai le atoatoaga o le faaolataga i e o soifua ma e ua maliliu.

O le misiona a Elia ua faafaigofieina e le mea ua ta'ua i nisi o taimi o le agaga o Elia, lea na aoao mai e Peresitene Russell M. Nelson, o le Peresitene o le Korama a Aposetolo e Toasefululua, o “se faamaoniga o le Agaga Paia e molimau mai i le natura paia o le aiga.”² O le pogai lena e masani ai ona tatou ta'ua faaaliga a le Agaga Paia e faatatau i le talafaasolopito o aiga ma galuega faalemalumalu o le agaga o Elia.

O i latou o e ua maliliu muamua atu ia i tatou, tatou te faitau i le Mataupu Faavae ma Feagaiga e faapea “o i tatou e aunoa ma i latou e lē mafai ona faaatoatoaina; pe mafai foi ona faaatoatoaina i latou e aunoa ma i tatou” (MF&F 128:18). O le a le uiga o lenei mea? Tatou te maua le tali i tusitusiga paia:

“Ma o lenei, o'u uso e, ma tuafafine pele e ma alofaina, tuu mai ia te a'u e tauina atu ia te outou o mataupu autu nei e faatatau i e ua maliliu ma e o ola e lē mafai ona tatou ala māmā atu ai i luga, e faatatau i lo tatou olataga. *Ona o lo latou olataga ua tatau ma taua tele mo lo tatou olataga*, e pei ona faimai Paulo e faatatau i tamā—e faapea e lē mafai ona faaatoatoaina o i latou e aunoa ma i tatou—pe mafai foi ona faaatoatoaina i tatou e aunoa ma o tatou tagata maliliu” (MF&F 128:15; faaopopo le faamamafa).

“O lo latou olataga ua tatau ma taua tele mo lo tatou olataga” o le faaolataga o le aiga atoa o tagata e felagolagoma'i ma fesootai—e pei o a'a ma lala o se laau tele.

Fai se Faatasiga mo le Gafa o le Aiga

O fuafuaga ma faamoemoega faaleaiga e tatau ona i ai i le pito i luga o a tatou lisi o mea e ave i ai le faamuamua. O le a latou puipuia lo tatou taunuuga paia. Mo le amataina e aiga o a latou galuega o talafaasolopito o aiga, ou te luitiina i

latou e fai le mea ou te ta'ua o se “Faatasiga mo le Gafa o le Aiga.” E tatau ona avea lenei mea o se taumafaiga faifai pea. E mafai e tagata uma ona aumai i nei faatasiga ia talafaasolopito, tala, ma ata o le aiga o loo i ai, e aofia ai meatotino faapelepele a matua o matua, ma matua. O le tamaitusi *O Lo'u Aiga* e mafai ona faaaogaina e fesoasoani e faamau-mau ai faamatalaga, tala, ma ata o le aiga, lea e mafai ona sii atu i le Gafa o le Aiga i luga o le FamilySearch.org.

Ae peitai, o lenei taumafaiga e le mafai ona faia i le na o se taimi se tasi. E manaomia ai le maelega i le olaga atoa. Mo i latou o loo sailia ni auala e sili atu ona aoga e faamamalu ai le aso Sapati o se aiga, o le faanatinatia o lenei galuega paia o se auala lelei lea [e faamamalu ai].

O le nofoaga autu o talafaasolopito o aiga o le aiga. E tatau ona tatou fesoasoani i o tatou tagata talavou e atiina ae se fiafia i lenei galuega. O le toatele o o tatou tagata talavou ua uma ona faaliliuina o latou loto i o latou matua. E fiafia o tatou tagata talavou e aoao e uiga i olaga o tagata o aiga—po o fea na latou o mai ai ma pe na faapefea ona latou ola. O nisi e matuai fiafia lava i le galuega, o lea e galo ai ia i latou le taimi ma e faanoanoa pe ua oo i le taimi e faamuta ai.



E fiafia tagata talavou i tala ma ata, ma o le taimi nei ua faifogie ona latou maua le tomai faatekinolosi e faasao ai na mea e manatua i le Gafa o le Aiga i luga o FamilySearch.org. E mafai ona latou su'ea tagata o le aiga o loo manaomia sauniga o le malumalu e ala i se aafiaga fou faatoa faamatuu mai o le “record-hinting [talafaamaumau-faaiteitei]” i luga o le FamilySearch.org.³

O nei talafaamaumau e faaiteite mai i tagata o aiga, ua mafai ona tupu ona o taumafaiga faasinoupu [indexing] a tagata o le Ekalesia i le lalolagi atoa. O nei talafaamaumau—ma e faitau miliona i latou—o le a fesoasoani e te maua ai tuua e toatele o e atonu e lei sosooina atu i lou aiga, ma o e e manaomia ona faataunuu sauniga mo i latou i malumalu. O isi talafaamaumau mai le lalolagi atoa ua i ai le tekinolosi faaiteite i luga o uepisaite ua aofia ai le, Ancestry.com, Findmypast.com ma le MyHeritage.com, lea e mafai ona faaaoga fua e tagata uma o le Ekalesia.

E ui o le nofoaga autu o talafaasolopito o aiga o le aiga, ae o le a faaauau pea ona tuuina atu e le Ekalesia ia nofoaga autu o talafaasolopito o aiga, lea e mafai ai e aiga ona



maua faatasi o latou tuua, ma mafai ona faaaoga le Initoneti pe afai e le faigofie ona maua i le fale.

O tagata agavaa uma o le Ekalesia o vaitausaga 12 ma luga atu, e mafai ona maua se pepa faataga o le malumalu e faatapulaa ona faaaoga, e faataunuu ai papatisoga mo e ua maliliu pe a uma se faatalanoaga ma se tasi pe toalua o taitai faale-ekalesia. O lenei mea e aofia ai uma ma tagata fou liliu mai.

O se fiafiaga le i ai o se pepa faataga ua sainia lea e mafai ona e faaali atu i soo se malumalu. O se pepa faataga ua tuuina mai ai foi ma se puipuiga paia. I le avea ai ma Peresitene o le Korama a Aposetolo e Toasefululua, na saunoa ai Peresitene Boyd K. Packer (1924–2015):

“E leai se isi galuega e sili atu ona avea ma puipuiga i lenei Ekalesia nai lo galuega o le malumalu, ma le sailiga o talafaasolopito o aiga lea e lagolago i ai. E leai se isi galuega e sili atu ona faaleleia ai faaleagaga. E leai se isi galuega o loo tatou faia tatou te maua atili ai le malosi. E leai se isi galuega e manaomia ai se tulaga maualuga atu o le amiotonu.

“O a tatou galuega i le malumalu e ufitia ai i tatou i se uffatafata ma se puipuiga, i le avea ai ma ni tagata taitoatasi faapea ma se nuu.”⁴

O la Tatou Matafaioi i o Tatou Tuua

O le talafaasolopito o aiga o se mataupu faaleaiga, ae e le o tagata uma o le aiga e tutusa le tulaga latou te feagai. O le toatele o o tatou tuua ua maliliu ae le'i faaipoipoina pe maua ni fanau. O nisi ua tatala faaipoipoga, ae o isi ua faafia ona faaipoipo. O le toatele sa i ai ni fanau sa i ai manaoga faapitoa po o e na maliliu o laiti. E tofu tagata uma ma se tala.

O tagata uma lava, soifua po o ua maliu, o le e mafai ona faamasoina mo ana lava amioga, e manaomia le faamanuiaga o sauniga paia o le malumalu, ma e mafai ona tatou fesoasoani i tagata o o tatou aiga ia latou mauaina. E le afaina pe e te nofofua, pe o lau tane po o le ava e le toaga i le lotu, po o oe lava foi ia e le toaga i le lotu, po o se tagata foi o le Ekalesia, e mafai foi ona e fesoasoani i le faaolataga o agaga. E le toe i ai se galuega e sili atu le taua, faamalieina, ma le matagofie.

O le taitai o lenei galuega o lo tatou Alii ma le Faaola, o Iesu Keriso. Ina ua mavae Lona maliu, sa Ia tatalaina le faitotoa i le falepuipui lea na taofia ai tagata ua maliu:



“Sa faatutu e ia mai totonu o e amiotonu, ana au ma tofia avefeau, ua faaofuina i le mana ma le pule, ma sa tofia i latou e o atu ma avatu le malamalama o le talalelei ia te i latou o e sa i ai i le pouliuli, i agaga lava o tagata uma. . . .

“Ma sa o atu avefeau filifilia e talai atu le aso talitali o le Alii ma folafola atu le saolotoga i e ua faatagataotauaina o e ua noanoatia, e oo lava ia i latou uma o e ua fia salamo mai ia latou agasala ma talia le talalelei” (MF&F 138:30–31).

E faigofie lava la tatou savali, ae e loloto. E le manaomia ai se faigalauga maotua po o mataupu faavae faigata. E faatatau i le i ai o se loto momomo ma se agaga salamo, ma se tautinoga e mulimuli i lo tatou Faaola.

I le avefa ai ma se Aposetolo a le Alii o Iesu Keriso, ou te folafola atu, afai e te vaavaai i tala atu o noataga o le olaga nei ma le olaga faitino, ae fesoasoani ia i latou o e e le mafai ona fesoasoani ia i latou lava, o le a faamanuiaina oe i le vavalalata atili ma le olioli i lou aiga,

faapea ma le pui-puiga faalelagi ua tuuina mai ia i latou o e e faamaoni i Lana galuega.

Ua faamanino mai e le folafolaga a Elia e faapea, ua i ai ia i tatou taitoatasi se matafaioi i augatupulaga na muamua atu ia i tatou ma tupulaga e mulimuli mai ia i tatou. Talosia ia maua e outou o matua, le autalavou, ma tamaiti le olioli ma ia faamanuiaina i isi vaega uma o lou olaga a o e faataunuaina le matafaioi na auina mai le lagi, ina ia auai i le galuega paia mo e ua maliliu. ■

Mai se saunoaga, “Our Father’s Plan Is about Families,” na tuuina atu i le Konafesi o Talafaasolopito o Aiga a le RootsTech i le 2015, i le Aai o Sate Leki, Iuta, i le aso 14 o Fepuari, 2015. Asiasi i le RootsTech.org e aoao atili ai e uiga i le konafesi a le RootsTech i le 2016.

FAAMATALAGA

1. Mo faamatalaga e uiga i le tamaitusi, *O Lo’u Aiga*, alu i le familysearch.org/campaign/myfamily.
2. Russell M. Nelson, “O Le Taimi O Se Seleselega Fou,” *Liahona*, Iulai 1998, 39.
3. O le faailoga o le Faamatalaga Faaiteite e faaali “ai taunuuga o se sailiga lautele o faamaumauga a le [FamilySearch] e sue ai ou tuua” (familysearch.org/blog/en/give-research-boost-record-hints/).
4. Boyd K. Packer, “O Le Malumalu Paia,” *Liahona*, Oke. 2010, 35.

O le taitai o lenei galuega o lo tatou Alii ma le Faaola, o Iesu Keriso. Ina ua mavae Lona malii, sa Ia tatalaina le faitotoa i le falepui-pui lea na taofia ai tagata ua maliliu.

Pe A Tuua e se Tamaitiiti le Ekalesia

E mafai ona tatou opoina le mataupu faavae e faapea, ua faamanuiaina a tatou fanau i le faitalia, e tusa lava pe a latou faaogaina e agai atu ai i itu tatou te le malilie i ai.

Saunia e Robin Zenger Baker

Ua mavae ni vaiaso talu ona siitia atu lau tama teine matua i se aai fou, ma o Aso Sa taitasi sa ia misia ai le lotu sa aumaia ai ia te au ni atugaluga masani. Mata e toe foi mai ea o ia i le lotu? Sa ou taumafaia mea uma sa mafai ona ou mafaufau i ai e ave ai o ia iina: faa-malosianga, finau, faatauana, fai ma ana uati faailo patino, tatalo, anapogi, e oo lava i le valaau atu i lona epikopo. Talu ai e 2,000 maila (3,220 km) sa ma nonofo valavala ai, o lea sa faigata ai ona ou auai faatasi ma ia, ae sa ou taumafaia foi lona mea!

Sa faaauau pea ona ou mafaufau e faapea, a mafai lava ona ou suia laitiiti le tulaga, o le a faapea ona toe faatulaga e lau tama teina lona auala faaleagaga. Sa ou manatu na pau lava le mea o lou manaomia o le tagata sao—o lona faiaoga asiati, lona epikopo, o se uo po o se tagata o le aiga—e tuu i lona ala e tau atu pe na o le fai o le mea e mafai ona toe foi mai ai o ia. Ae sa leai se mea na aoga. Sa taavilivili lou ulu i le popole, ma sa tumu lou loto i le tausilaga ma le ita ona sa le manuia [au taumafaiga] ia te ia i le aveai ai ma se matua.

E toatele isi e tutusa o matou aafiaga. Pe a tuua e tamaiti le ala o le talalelei, o se mea faigata tele i matua o e tumau faamaoni ona taulimaina. O se tasi tina sa matuai le fiafia lava i filifiliga a lana tama teine lea sa ia fai mai ai, e lagona le tiga pe a manava. Sa faasoa mai e se tama e faapea, sa

pei na teena o ia ma lona ituaiga olaga e lana fanau. Sa popole se tina talavou ina nei fesiligia e lana lava fanau laiti le Ekalesia ma filifili e o ese mai ai.

E faapefea ona tatou taulimaina ia nei lagona tiga, pe a filifili tagata o le aiga e o ese mai le Ekalesia? E i ai ni mea e mafai ona tatou faia.

Aoao mai i Isi o E Sa Tauivi

O nisi o aiga e sili ona amiotonu i tusitusiga paia sa tauivi ma ni fanau faalogogatata. O Sarai ma Lia e sa i ai ni fanau o e na lafoaia aoaoga a o latou matua (tagai i le 1 Nifae 2:8–12). Na faapena foi ia Atamu ma Eva (tagai i le Kenese 4:8). Sa faanoanoa foi o tatou matua faalelagi ina ua filifili e le tasi vaetolu o le la fanau agaga ia se isi ala (tagai i le MF&F 29:36). O le fuafuaga o le fiafia ua aofia ai le faitalia. Ma o lona uiga, e oo lava i tagata o aiga amiotonu, e mafai ona filifili e teena mataupu faavae o le talalelei. E mafai ona tatou maua le faamafanafanaga mai tala e uiga i aiga o loo tauivi o loo i tusitusiga paia. Tatou te maua ai se malamalamaaga sili atu i le faitalia ma le agaga malamalama, ma o lona malamalama e mafai ona fesoasoani ia i tatou ia faamalolo ma agai ai i luma.

Ia Iloa o a Tatou Fanau o Fanau Foi Ia a le Atua

Ina ua amata ona fesiligia e lana tama talavou ia ona talitonuga, sa oo ina lofituina se tasi o tina i lagona



o le tausalaina ma le toilalo. A o mafaufau po o le a se mea na ono mafai ona ese lona faiga i le aveva ma se matua, sa faapea ona ia maua se uunaiga alofa mutimutivale: “E le na o oe e ana le tama. E sili atu lou alofa ia te ia nai lo o oe, ae ou te le o lagona se tausalaina e uiga ia te ia po o soo se tasi o isi au fanau ua se.” Mai lava i lena taimi, sa mafai e le tina ona faamamulu ese le [lagona] tausalaina, ae taulai atu i se atalii lelei o le Atua sa aveva ai lona atalii.

Taulai Atu i le Manuia

O nisi taimi e faataupepe ai matua ona latou te le malamalama atoatoa i le aoaoga “e leai se isi lava manuia e mafai ona suitulaga i le toilalo i le aiga.”¹ O le manuia ma le toilalo e le faigofie ona faamatalaina. E pei ona faamatala mai e Elder John K. Carmack, o se tasi sa aveva ma Fitugafulu, “Ona o le faamatalaga lena sa faamoemoe e musuia ai matua ina ia aveva, pe ia tumau ona aafia i [olaga] o o latou fanau, [o lea] e le tatau ai ona faauigaina faapea, ua toilalo matua o e ua tuu atu se taimi tele, taumafaiga, ma osigataulaga i le tulaga faamatua, ae peitai e le o selesele lava i tau manaomia.”² E tatau ona tatou patipatia uiga lelei o o tatou fanau ma taimi fiafia sa tatou mauaina. E tatau ona tatou opogi le mataupu faavae, ua faamanuiaina tagata o o tatou aiga i le faitalia, e tusa lava pe o faapefea ona latou faaaogaina.

Fetuunaia o Tatou Faamoemoega

E ui tatou te faamoemoe o le a mulimuli tagata o le aiga i auala ua tatou filifilia, e ao ona latou filifili mo i latou lava ia maua faamanuiaga o le talalelei. Na fautua mai Elder Carmack, nai lo o le faasagatau atu i lena mea moni, atonu e manaomia e matua ona “fetuunai o latou faamoemoega ma metotia, talia ia mea e pei ona i ai nai lo o le faaauau ai pea i faigata.”³

Sa lagona e se tina le loto vaivai ma le faanoanoa ina ua ia iloaina o le a le alu se misiona a lana tama tama. Na iu lava ina ia iloaina, sa manaomia ona ia faagalo le manatu e faapea, e tatau lava ona alu lana tama tama i se misiona ina ia ona maua ai le fiafia. “Sa iu ina mafai ona ou iloa, o lena mea e le faatatau ia te au,” o lana tala lea. “O olaga o tamaiti taitoatasi o o *latou* a olaga ia. O au ua na o so latou tina. E le o ni au meatotino i latou.”

Maua le Malamalamaaga

E tele matua ua maua le faamafanafanaga ma faatumau se vaaiga mamao e ala i le tatalo, suesue i tusitusiga paia, ma le auai i le malumalu. Sa faasoa mai e se tasi o matua e faapea, o lana aafiaga i le tatalo, na aoaoina ai o ia ia

manatua e pele tele lana tama i le Tama Faalelagi, lea sa fesoasoani i le aveeseina o lona tiga. O le tatalo e aumaia ai malamalamaaga aoga i le mea e fai ma tautala atu ai. E fesoasoani foi ia i tatou e maua ai le faamafanafanaga.

O loo faamatala mai i tusitusiga paia tala i tagata sa faia ni filifiliga le lelei ma auala na mafai e tagata o le aiga ona taulimaina ai. “O le mea e lelei ai e le o tumu tusitusiga paia i tala e uiga i aiga atoatoa, o lona uiga atonu o le a tatou matuai lotovaivai ai e taumafai!” o le faasoa mai lea a se tasi o matua. O le tala ia Alema le Itiiti ua faamautinoia mai ai ia i tatou, e faafogaina mai tatalo a matua amiotonu (tagai i le Mosaea 27:14). O le faataoto i le atalii faamaumau oa, ua aoao mai ia i tatou i le olioli tatou te lagonaina pe a toe foi mai se tasi sa leiloa (Luka 15:20–24).

O le auai atu i le malumalu e mafai foi ona fesoasoani ia i tatou e maua ai se malamalamaaga aoga e taulima ai faafitauli o le aiga. “Ou te talitonu o le tagata pisi . . . e mafai . . . ona sili atu le lelei ma vave atu lona fofoina o faafitauli i totonu o le maota o le Alii nai lo o se isi lava nofoaga,” na saunoa mai ai Elder John A. Widtsoe (1872–1952) o le Korama a Aposetolo e Toasefululua. “I taimi e sili ona lei mafaufauina, i totonu po o fafo o le malumalu, o le a oo mai ai . . . o se faaaliga, le fofo [i] faafitauli e faafitiga ai [o tatou olaga].”⁴ A o auai atu matua i le malumalu, e mafai ona sili atu ona nofouta o latou loto ma mafaufau i le filemu o loo latou sailia.

Faaauau Pea ona Faaali Atu le Alofa

Sa le taumateina lava le alofa o Liae ma Sarai ia Lamana ma Lemuelu e pei lava ona la alofa ia Sama, Nifae, Iakopo, ma Iosefa. E ui e mafai ona sili atu ona faigofie le fegalegaleai ma tagata o le aiga e tutusa o tatou talitonuga ma sitaile o le olaga, ae e taua tele ia i tatou le aoao e faaali atu le alofa mo isi o e [e le tutusa o tatou talitonuga ma sitaile o le olaga].

Na faasoa mai e se tasi o tamaitai sa le toe alu i le lotu ao talavou, ia le aafiaga lena o le auala na faaauau ai e lona aiga ona alofa ia te ia. I lona aiga toatele o le AAG, sa patipatia ai misiona i se auala e iloagofie. O ata o faifeautalai uma o le aiga sa teuteuina ai puipui o le potu malolo o lona tinamatua. Fai mai o ia, o le “ogatotonu lea o le lalolagi o le matou aiga.” Sa ia iloaina e le alu lava sana misiona, ma sa ia lagonaina e tusa lava po o a mea lelei sa ia faia i le lalolagi, o le a le maua lava sona nofoaga i luga o le puipui a lona tinamatua.

I le 30 o ona tausaga, sa tonu ia te ia e auauna atu i le Au Pisikoa a le Iunaite Setete. Sa malaga atu o ia i Matakasa, ma tuuto atu lona malosi atoa e auauna atu



A o faaauau pea ona tatou alolofa i e e pele ia i tatou e pei ona latou i ai i le taimi nei, e mafai lava ona tatou pipiimau pea i le faamoemoe o le a latou toe foi mai i se olaga e tutotonu i le talalelei.

ai iina. O se vaitaimi o lona aafiaga, sa ia iloa ai, na faaafia e lona tinamatua lona ata i luga o le puipui. Ina ua uma le taimi faatulagaina o le avea ma se Pisikoa, sa fusifusi le tinamatua ma le tama teine a lana tama ma le maligi o loimata. “O le auaunaga o le auaunaga,” o le faamalalamala mai lea a lona tinamatua. Pe i ai pe leai se puipui o faifeautalai i totonu o o tatou fale, o loo tele lava auala e mafai ona tatou faaali atu ai i tagata *uma* o lo tatou aiga e alofaina ma faatauaina i latou.

Pipiimau Pea i le Faamoemoe

A o faaauau pea ona tatou alolofa i e e pele ia i tatou e pei ona latou i ai i le taimi nei, e mafai lava ona tatou pipiimau pea i le faamoemoe o le a latou toe foi mai i se olaga e tutotonu ai le talalelei. E masani lava ona toe foi mai tagata o le aiga pe a mavae se vaitaimi o le feosofai solo. E pei o le atalii faamaumau oa, latou te iloa o o latou olaga sa i ai muamua na aumai ai ia i latou ni savali ma ni mataupu faavae lelei, ma faapea ona latou toe opogiina ai na tulaga faatauaina. O le mea moni, ua folafola mai e perofeta e faapea, o tagata o aiga o e ua faamauina i matua, o le a lagonaina le tosoina atu e o latou tausiga amiotonu ma o le a i ai se aso e toe foi mai ai.⁵ O folafolaga faapena e aumaia ai ia i tatou le faamoemoe tele mo i latou e pele ia i tatou.

Faatumau se Vaaiga e Faavavau.

E ao ona tatou manatua, tatou te matuai le iloa mea o le a tutupu i e pele ia i tatou. Sa faasoa mai e se tamā o ni talavou fouvale e faapea, ua ia aoaoina e ui lava e le o ola amiotonu ona atalii i le taimi nei, ae e le tataua ona ia faapea

o loo folifoli mai ni faalavelave. Ua fautua mai Peresitene Dieter F. Uchtdorf, Fesoasoani Lua i le Au Peresitene Sili, o nisi taimi tatou te talitonu ai ua uma ona tusia le iuga o le tala, ae o le mea moni, faatoa tatou oo i mataupu i le ogatotonu.⁶ O le fuafuaga a le Atua e matuai eseese lava mai a tatou fuafuaga, ma tatou te le iloa po o a faaiuga o tala a tagata taitoatasi.

A na tatou iloa o le a iu ina toe foi mai tagata o o tatou aiga, mata e suia e lena mea le ala e faatino ai a tatou tala i le taimi nei? Ou te talitonu atonu tatou te ola i se

tulaga sili atu o le filemu, alofa, ma le taliaina. A o tatou galulue ia lelei faaiuga o a tatou tala, e fesoasoani le manatua e mafai ona tatou filifili e talanoa atu i e pele ia i tatou mai se tulaga o le filemu ma le alofa ae le o le ita ma le matau. E pei ona tusia e Paulo, “Aua ua le foaiina mai e le Atua ia te i tatou le Agaga e matau ai, a o le Agaga e faamalosi ai, ma alofa ai, ma mafaufau tonu ai” (2 Timoteo 1:7). E pei ona taunapa mai Elder Carmack: “Aua lava nei fiu. Afai e foliga mai ua le mafai ona e aapa atu i lou afafine po o lou atalii i le taimi nei, o le mea taulia ia e taumafai pea ma alofa pea ia i latou. . . . Aua nei e gauai atu i lagona gase o le tausala ma le leai o se faamoemoe. Saili se fesoasoani faaleagaga ma le toafilemu. Ia faamalosi ma lototoa. O le a mafai ona e onosaia ou tofotofoga.”⁷

E lei foi mai lava lau tama teine i le lotu. Ae ua manino lava a maua sini; o loo ma galulue uma ia ma vavalalata pea. E ma te talanoa soo, ma ou te iloa o lona tausiga o se tagata o le AAG, ua fesoasoani e avea ai o ia ma se [tagata] agalelei, amio pulea, ma magafagafa. E ui e le mafai ona ou manao ia te ia e ui i le ala o loo malaga ai nei, ae ou te faafetai mo lesona o loo ma aoaoina i le ala. Ma ua ou maua le toafilemu a o ou taliaina o maua tulaga faapitoa i a maua malaga toe foi atu i le aiga. ■

E alala le tusitala i Massachusetts, ISA.

FAAMATALAGA

1. David O. McKay, i le Conference Report, Ape. 1964, 5; sii mai i le J. E. McCulloch, *Home: The Savior of Civilization* (1924), 42.
2. John K. Carmack, “Pe a Se Ese a Tatou Fanau ma Aoaga o le Talalelei,” *Liahona*, Mat. 1999, 28.
3. John K. Carmack, “Pe a Se Ese a Tatou Fanau ma Aoaga o le Talalelei,” 28.
4. John A. Widtsoe, “Temple Worship,” *The Utah Genealogical and Historical Magazine*, vol. 22 (1921), 63–64, sii mai i le David B. Haight, “Malumalu ma Galuega e Fai ai,” *Liahona*, Ian. 1991, 61.
5. Tagai i le “Hope for Parents of Wayward Children,” *Ensign*, Sete. 2002, 11.
6. Tagai i le Dieter F. Uchtdorf, “Ia Iloa le Iuga mai le Amataga,” *Liahona*, Me 2006, 42–45.
7. John K. Carmack, “Pe a Se Ese a Tatou Fanau ma Aoaga o le Talalelei,” 28, 29.

TAITAIA O SE

Talanoaga Anoa Faalevaega



Saunia e Dustin West

Seminare ma Inisitituti

Pe a e taitaia se talanoaga o le talalelei, atonu e aoga le mafaufau o oe o se taitai o se au faili. O i latou o loo e aoaoina e le o le au maimoa e faalogologo i le koneseti. O loo i ai i latou i le au faili, e ta a latou vaega e fatu ai le musika. O le taitai e faamaopoopoa le au musika, e aumai i fafo le mea e sili ia i latou taitoatasi, ma fesoasoani i la latou musika ia avea ma se galuega faatufugaga musuia.

O talanoaga anoa o le talalelei e mafai ona pei o musika matagofie. O se talanoaga lelei e iu i se malamalama loloto atu o aoaoga faavae o le talalelei o loo talanoaina, faapea foi ma se mana o faamaoni e faaoga upumoni o le talalelei.

O talanoaga anoa o le talalelei e mafai ona pei o le taitaia o musika matagofie. O se tasi o tiute autu a le faiaoga o le faatautaia lea o le talanoaga, ina ia maua e tagata aoga le avanoa e lagona ai le Agaga ma iloa e i latou lava ia upumoni.

O nisi nei o ni nai mataupu faavae o le a faaleleia atili ai le talanoaga e te taitaia:

Aoa tagata, ae le o lesona. O i latou e te aoaoga o le a sili atu ona naunau e auai i talanoaga pe a latou lagona, e sili atu ona e manatu ia i latou nai lo le faaumaina o le lesona. E mananao tagata aoa e lagona ua e saunia oe lava e faamallosia ma faateleina lo latou faatuatua i le Alii, nai lo na o le tuina atu o ni mea moni. O tagata aoa o e lagona e alofagia i latou e faiaoga ma isi tagata o le vasega, o le a sili atu le naunau e faasoa malamalamaaga ma aafiaga.

Valaaulia musumusuga. O le taimi e faatasitasi ai, o se avanoa lea mo oe ma i latou e te aoaoga e maua ai faaaliga, ae e le na o se avanoa e te faasoa atu ai mea ua e iloa. O se tasi o tiute autu a le faiaoga o le faatautaia lea o le talanoaga, ina ia maua e tagata aoga le avanoa e lagona ai le Agaga ma iloa e i latou lava ia upumoni. Pe a solo mai faaaliga, e faamalalamaina ai tagata uma—le faiaoga ma tagata aoa—ma olioli faatasi ai (tagai i le MF&F 50:22). E mafai ona e iloa o loo faagaetia a outou

I LE FAIAOGA: “MATA E LAVA LE TAIMI E FAI UMA AI?”

Oanomea o lesona, o mataupu o mau, o malamalamaaga na e mauaina a o e suesue—o mea lelei uma lava, peitai, o itula na e suesue ai, e masani lava e le mafai ona toe faia i se taimi ua atofaina. O lau galuega e le o le faasoa atu o mea uma na e aoaoina, ae ia taitai le taimi o le vasega i se faiga e iloa ai e tagata aoa ia upumoni mo i latou lava—e pei ona sa e faia i lau lava sauniuniga. Tatalo mo se fesoasoani, ma o le a aoa o e le Agaga Paia i mea e [te] taulai i ai. A o e taulai atu i ni nai upumoni, e mafai ona tuu atu le avanoa mo se talanoaga e sili atu ona anoa e ati loloto i loto o i latou e te aoaoga.

talanoaga pe a e aoao mai i le Agaga faapea foi ma le aoao atu e ala i le Agaga.

Valaaulia tagata uma e auai. O le auai e le o le faapea, e tatau lava ona tali leotele mai tagata uma i se fesili. O nisi e mananao e auai e ala i le na o le faalogo po o le tusitusi o faamatalaga. O isi e naunau e faasoa mai o latou manatu pe a faapea e i ai se taimi e mafaufau loloto ma saunia ai. Atonu e te mafaufau e logo nisi o i latou o loo e aoaoa a'o le'i faia le lesona, ma fai i ai e o mai saunia e faasoa mai o latou manatu i se autu patino.

O loo i ai ni isi auala e fesoasoani ai i tagata aoao ia auai i le talanoaga. Mo se faataitaiga, e mafai ona e:

- Fai atu ia i latou e mafaufau loloto pe faapefea ona latou talia se fesili a o lei e talosaga atu mo ni tali.
- Fai atu ia i latou e tusi a latou tali i luga o se fasi pepa. Ona e fai atu lea i nisi o i latou e faasoa atu a latou tali i isi.
- Valaaulia i latou e tali i fesili ma se tasi o saofai i o latou autafa po o i ni vaega tolaiti.

O nisi taimi atonu e i ai se tagata o le vaega e fuaoa ina le talanoaga. Afai e tupu lenei mea, e mafai ona e fai atu,

“Sei o tatou faalogologo atu i se tasi e le'i faasoa mai.” O nisi o tulaga, atonu e tatau ai ona talanoa faalilolilo i lenei tagata e faafetai ia te ia mo le faasoa, ma faamalamalama i ai le taua o le uunaia o isi tagata auai e faasoa mai.

Aua le fefe i le filemu. O le filemu atonu e pei o se sãõ i la outou talanoaga, ae mo tagata aoao e mafai ona avea o se taimi taua o le mafaufau loloto.

Fai atu ni fesili anoa. Fai atu fesili e uunaia ai tagata aoao ia mafaufau loloto i le uiga o fuaitau o mau ma mataupu faavae o le talalelei. A o sauni lau lesona, mafaufau i fesili o le a fesoasoani ia i latou o loo e aoaoa ia malamalama ai ma faaoga upumoni o loo latou aoaoina. O ni nai fesili e lelei ona faaupuina e mafai ona faia ai se eseese tele.

Faalogo ma le toto'a. O le tele o taimi e popole ai faiaoga po o le a le isi mea o le a tau atu, ma latou le faalogo totoa ai i manatu faaalia. Afai e te faalogologo ma le faamaoni ia i latou e te aoaoa, o le a latou lagona le faatauaina ma e tele se avanoa e ono auai ai. Na saunoa mai Peresitene Thomas S. Monson: “O [tagata] uma lava o loo tofu ma se tala e faamatalaina. O le faalogo o se elemene taua a o tatou aoao atu ma a o tatou aoao mai” (“O Faataitaiga o Faiaoga Maoae,” *Liahona*, Iuni 2007, 76).



O tagata aoao o e lagona le alofaina e o latou faiaoga ma isi tagata o le vasega, o le a sili atu le naunau e faasoa malamalamaaga ma aafiaga.

Fai atu fesili tulitatao. A faasoa mai e tagata aoao malamalama ma aafiaga, atonu e te lagona e tele atu ni mea latou te fia faasoa mai. Mafaufau e fai atu fesili tulitatao e pei o nei: O le a se mea e taua ia te oe? O le a se taimi na e vaaia ai lenei mea i lou olaga? O le a le uiga o lenei mea ia i tatou i aso nei? O ai se isi tagata e i ai se manatu e uiga i lenei mea? O ai e i ai se manatu e faatatau i ai latou te fia faasoa mai? O a nisi fuaitau o tusitusiga paia o loo aoao mai i lenei upumoni?

Faailoa atu tali. Pe a tuu mai e se tasi se tali, e tatau ona i ai ni auala e faaali atu ai. E mafai ona fai lenei mea i le faia o se faamatalaga faafetai e uiga i le tali, po o le fai atu o se fesili tulitatao.

Tausia le mama o le aoaoga faavae. Ia manatua o le sini autu o le aoaoina atu o le talalelei, e le na o le faia o se

talanoaga lelei. Ae, ia aoao ai le aoaoga faavae ina ia mafai ona suia o tatou lotu, ma mafai ona tatou liua. I le taimi o le talanoaga, o se vaega o lou tiutetauave o le, ia mautinoa o loo aoao atu aoaoga faavae moni.

Afai e faasoa mai e se tagata se mea e le sa'o faale-aoaoga faavae, o loo ia te oe le tiutetauave e ta'u atu ai le aoaoga faavae sa'o. E mafai ona e faapoopo atu i se vaega sa'o o le tali, faasoa atu se mau po o se aoaoga mai le konafesi aoao, pe faasoa atu lau molimau.

O le faaaogaina o nei manatu, e mafai ona e maua ai nisi o talanoaga maoae o le talalelei. O le a e le faaaogaina talanoaga ia tau lava e faapasi ai le taimi. E mafai ona e taitaia ni talanoaga faamanuiaina, ina ia mafai e tagata aoao ona maua faaaliga patino, atina e le lotogatasi o le tasi ma le isi, ma faateleina o latou malamalama o le talalelei a Iesu Keriso. ■

I LE TAGATA AOAO: E TAUA LOU MANATU

O le mauaina o se talanoaga lelei e uiga i le talalelei o se tiutetauave e te lua faia faatasi ma le faiaoga. O nisi neio tulaga atonu sa e mafaufau e uiga i ai:

E i ai sa'u tala e fai atu, ae e le'i fesili mai le faiaoga mo ni manatu faaaliga. Pe tatau ona ou faalavelave?

Atonu e te faatali mo se taimi talafeagai e tilotilo mai ai le faiaoga ma faailo atu i ai lou manao e fia faaali atu lou manatu. Afai e te lagona le musuia e faasoa atu, fai le mea sili e te faia ai loa lena uunaiga.

Ou te le mautinoa pe taua ou manatu, pe tatau la ona sii lou lima?

O loo i ai sou manatu ma ni aafiaga atonu e le o i ai i isi. A o e saunia mo le vasega, e te maua malamalamaaga patino e mafai ona avea ma se faamanuiaga i isi tagata aoao.

Na aoao mai Elder Richard G. Scott (1928–2015) o le Korama a Aposetolo e Toasefululua e faapea, pe a sii o tatou lima i le taimi o se talanoaga o le talalelei, ua tatou "faailoa atu i le Agaga Paia [lo tatou] naunau e aoao." O lea la, afai

e talafeagai ou manatu faaaliga i le autu ma lava le taimi, e mafai ona e faasoaina atu. Ua faamatala mai e Elder Scott, "O le auai e mafai ai e tagata taitoatasi ona oo i le taitaiina e le Agaga" ("To Learn and to Teach More Effectively" [faigalotu Brigham Young University Education Week, 21 Aok., 2007], 5, speeches.byu.edu).

Ou te fefe e tautala i luma o ni tagata se toatele. O le a se mea e tatau ona ou faia?

A o e galue e faatoilalo lenei matau, atonu e te amata i se mea itiiti. Taumafai e ofo atu e faitau se mau po o se upusii. Ona vaai lea mo ni avanoa e tali ai fesili pe faasoa atu ni malamalamaaga. A o e faaaliga ai lou naunautai e auai, o le a faamanuiaina oe i le lototoa e tautala ai ma upu e fai atu. Pe a tatou "tatala o [tatou] gutu," tatou te iloa ai "o le a faatumuina" (MF&F 33:10).

Afai e te iloa e faigofie ona faasoa atu lou manatu, atonu e te manao e fesili ifo ia te oe lava pe, nai lo le toe faasoa atu o ou lava manatu, o loo i ai se auala e te uunaia ai se tasi o ou uso-a-tagata aoao e faaali lona manatu.

Toefaaipoipoina

O Se Malaga i le Onosai ma le Alofa



O le tuufaatasi o ni aiga e manaomia ai le faaluaaina o le onosai. Ae e mafai foi ona afua ai le faaluaaina o le alofa.

Saunia e Heidi Eljarbø Morrell Andersen

Sa lei avea lava le [upu] tatala o faaipoipoga ma se vaega o lau vaogagana seia oo ina tupu moni lava ia te au. Mo se taimi umi sa ou lagonaina ai le itu maasi-asi o le upu i taimi uma lava na fesiligia ai lou tulaga faaipoipo. “Ua tatala lau faaipoipoga.” Sa pei na tau le mafai

ona ou tauina leotele ia upu—sa pei na ou faia ni upu leaga.

E ui i lea, o le tulaga lea o lou olaga, ma sa faigata ona ou faataugamalie i ai. “O le a e maua se tasi [tagata],” na fai mai ai au uo. Ae sa ou le manao i ai, ma sa ou le toe fia faaipoipo. Sa faapisi au e lau fanau e toafa.

Ona oo lea i se tasi aso, e aunoa ma ni faamoemoega po o ni fuafuaga mo le lumanai, sa ou feiloai ai ia Arnfinn, ma o le mea na ou tei ai ona sa ma fesootai lelei lava ma sa faateleina lou fialia i lana faauoga. Sa atamai, aulelei, ma aga malie. Ina ua ia faamalamalama mai, sa ou le iloa po

o le a se mea o le a tupu i le lumanai, ae sa ou iloa sa ou manao i lena lumanai faatasi ma ia. Sa umi se taimi o “tau faamafolafola ia maanuminumi,” e pei ona tau ai e Arnfinn, ma ma faaipoipo ai i le Malumalu o Stockholm Suetena i le tautoulu o le 1997.

O le avea ma ulugalii fou i le toeitiiti 40 [tausaga le matutua] sa le tutusa ma le taimi muamua. O le faamamai



sa tutusa lava le matagofie o le fiafia, faapena ma le fiafia i se mafutaga fou, ae o lenei ua i ai o ma taitoalua sa i ai muamua e toalua, o se taifau le usitai, o se manulele malomaloā, ma ni tamaiti se toaiva, mai le vaitausaga o le 3 i le 17. O le mea na lelei ai, o le fou o le ma mafutaga mafana na lava lea ma te onosaia ai aso luitaaina i le lumanai.

O Le Ki i le Malamalama

“E foliga mai e le o taimi uma e tutusa ai o ma manatu e uiga i mea,” o le tala mai lea a Arnfinn i se tasi aso. O

le fasefulu tausaga o faiga masani ma le faia o mea i lau lava ala o le a tupu ai lena mea. Sa 19 ou tausaga i le taimi na ou faaipoipo muamua ai, ma sa faia ni faiga ma ni aga masani ao uia lena auala. Sa ma iloa ma Arnfinn, sa le afaina ma sa lelei foi le sili atu ma le tasi se manatu. Sa lei faapea ai a mea o le isi sa sao ae o le isi na sese. O manatu e mamanuina e le tele o mea i le olaga, ma

o le faaloalo ma le faalogo na avea ma upu autu e malamalama ai i le isi tagata.

Sa ma taumafai foi ia ma malamalama i auala e tuufaatasi ai o matou olaga—o fea e nonofo ai, auala e taulima ai le tamaoiga o le aiga, ma po o le fea tu ma aga masani i aso malolo ia tausisia pea. Sa i ai lava ni nai maanuminumi e faamafolafola i le aluga o le olaga, ae o le toe tepa i tua, o nisi e foliga mai e laiti i aso nei. O le lotogatasi ma le alofa i le aiga o sini ia sa matou taulai atu i ai.

O le i ai o se isi tina e aofia i lo matou aiga sa sili ona faigata ia te au. O le avā muamua a Arnfinn o se tina lelei tele ma popole mo le manuia o lana fanau. O tafaoga ma faaiuga o vaiaso sa fuafuaina faatasi ma ia, ma e i ai taimi, sa ou lagona ai na pei e leai sou leo i lou lava olaga.

Ae o le suiga atonu sa sili atu ona faigata mo Arnfinn, o lē ua see mai i se aiga e i ai ni tamaiti se toafa, o le toalua ua talavou—o tamaiti o o

latou uiga sa sili ona ulavavale nai lo le mea sa masani ai o ia, ma o ē na fai si ese o le tausiga mai le mea e manao i ai o ia.

Eeseese Auala, Tutusa Tali

Ona oo lea i se tasi afiafi, na fai si leva [o le aso] na tau le gaoioi lelei foi le mafaufau, na faapea ona luita ai au e Arnfinn i se suega e sue ai lou atamai. Sa saofai o ia i le tasi itu o le laulau ai, ma amata ona fai ni fesili e faaoga ai auala ma tulafono faamatematika e tali ai fesili. Sa ou i ai i le isi itu o le laulau, o tusitusi ata e tali ai numera

na tuuina mai. Na uma ona faatusatusa lea o tali o a ma suega, ae iloa ai na tutusa lava ma tali na i ai. O le taimi lena na ou iloina ai, o le suega sa pei lava o o ma olaga faatasi.

Sei ou faamatala atu: Na te faia ni mea i se isi auala, ae ou faia foi i se isi auala. Ae e tutusa lava le ma sini, e ui o le auala e ausia ai atonu e eseese. O le ausiaina o lena sini, e pei lava o le suega o le atamai: e ui na te faia faiga [faa-matematika] ae ou tusia ata, ae e tutusa lava a ma tali.

Ou te iloa e le mafai ona ou faia lana galuega o se loia, ma ou te iloa foi o le a faigata ia te ia lau galuega o se tusitala ma se tusiata i valivai. O le togafiti sa i ai, o le faaali o le lotomalie ia te ia, pe a ese lona faiga o ni mea, ae le o [lou] malomaloā. O eseese e mafai ona avea o se aafiaga malie faaleaoaoga pe a tatou faatagaina. Sa ou fai atu ia Arnfinn i se tasi aso, “Afa e mafai ona e aoao mai nisi o mea ia te au, ma atonu e mafai ona ou aoao atu ni mea ia te oe, e i ai se aso o le a ta iu manuia ai.” E tatau ona aoao gofie i taua uma, ma o se faagasologa faifai pea. O le faa-memelo ua avea ma se upu autu.

Afai e tele ni eseese o Tina ma Tama, e mautinoa lava o le a matuai vala i sini le eseese o ni fanauga se lua. Sa ma filifili e galulue malosi e foia faafitauli o aso taitasi, o faiga eseese o le aai, sitaili o lavalava, taimi e momoe ai,

ma galuega [i le fale], ua na o ni nai mea ua taua. Mo se taimi umi sa tau ai tamaiti o “la’u” ma “lau” fanau, ma sa lei manatu o le a matagofie le faafuasei ona tuufaatasi o tamaiti.

Na tau mai e le ulumatua e le toe mamao ae aluese ma le fale, ma sa manao ia ou fiafia; o isi teineiti e toalua sa pei e le fiafia le tasi i le isi; ae o le tasi o tama na tai lua faaiuga o vaiaso ma faamatuu atu lona potumoe ae moe i luga o le nofoa pe a o mai le fanau tama a lou toalua. E lei tomumu lava o ia i lena mea, ma ou te faafetai ai lava.

Faia o se Avanoa mo i Latou Tatou te Alolofa i Ai

E i ai lava pea le avanoa mo i latou e te alofa i ai. Sa ma toe faavasegaina le potu malolo e sosoo ma le potu tele e fai ma mea e sulufai i ai matua, ae tuu tamaiti i potumoe i le fogafale i luga. Sa oo ina avea ni televise se lua ma ni faleletaua se lua, o ni mea na tatau lava ona i ai ae le o ni mea e manaia pe a i ai. O ni nai aso e faatasi i le tausaga e tuua ai na o matua faatoa faaiipoipoina, sa avea foi o se teugaoa taua mo lo matou lumanai o se aiga.

Sa fuafua mamao ia faaiuga o vaiaso ma isi mea e tutupu; o taumafataga, taaloga, ma gaoioiga sa tatau ona fetau ma [manaoga] o le toatele o tamaiti. O le fanau toalima a Arnfinn sa nonofo ma lo latou tina i aso o le vaiaso, ma sa ou manao e faaaloalo i ona manaoga ma ia mautinoa sa fiafia tamaiti pe a asiasi mai i lo latou tamā. O lona uiga o nisi taimi na tatau ai ona ou filemu pe a i ai ni faatiga ulu laititi, ae ia taulai atu i mea e sili ona taua ina ia fiafia lo latou nonofo ai [ma i matou]. Sa ou faaaogaina le onosai ma le alofa—ma nisi pusa onosai, e faaopopo atu i le anoano o aga malie.

Feulaina o puta ma le toatolu o fanau a le ma fanau. Ua matutua le ma fanau ma o ese, ae latou te iloa e talia lava i latou i taimi uma e asiasi mai ai.



O se tasi o a matou tu masani o le auai atu i le Malumalu o Stockholm Suetena i taumafanafana taitasi faatasi ai ma le toatele o le ma fanau e mafai ai. O le tausaga na tea nei, e 10 itula na matou o ai i le taavale ina ia mafai ona matou o mai ma ia faamau i ona matua ia le tina o Arnfinn ua 90 tausaga le matua.

O le vevesi i taeao o Aso Sa sa o se tofotofoga tele. Sa ma taumafai e fai se siosiomaga i fatuga tuai o musika matagofie a o faasolo atu lea tamaitiiti ma lea tamaitiiti i totonu ma fafo o faletaele e lua ao lei oo i le taimi mo se malutaeao manaia. Ae, o le aveina atu o tagata uma i fafo mai le faitotoa ma o atu i le veni laitiiti ia fetau le taimi e oo ai i le lotu, sa faigata ai ona tausisia le agaga o le Sapati i Aso Sa uma. E oo ane i le taimi na matou o mai ai i le fale ma fiafia i se taumafataga manaia o le afiafi, ua toamalie ina ia matou fiafia ai e taaalo faatasi i ni taaloga.

O loo i ai le pototo tele i polokalama ma lesona ua aoaoina ai i tatou i le ekalesia. O tatalo faaleaiga, afiafi faaleaiga, ma le talanoaina o mataupu faavae o le talalelei e matuai aoga ai le taimi ma taumafaiga. Ua aumaia e le talalelei le olioli ia i matou, ma fesoasoani ia matou malamalama atili i le taua ma le pele o aiga.

E tele ni tu ma aga fou ua matou faia, ae o loo tausisia foi nisi mai o matou olaga sa i ai muamua. O taumafanafana uma lava matou te aumaia ai ni tamaiti se toatele matou te mafaia ai i le Malumalu o Stockholm Suetena. Matou te nonofo i se fanua o toluapiga i le itu i saute o le malumalu. Ua avea o se tu masani matou te fiafia i ai, ma o se [tu] ua faia foi e tamaiti ua faaipoipoina mo o latou aiga.

Pe a o mai nei le ma fanau e fesili mai mo se fautuaga e uiga i tafaoga faamasani ma faaipoipoga, ou te fai i ai, e le afaina pe afai o le isi e fiafia i le tamoemoe ae fiafia le isi e siva. O le mea e sili ona taua ia tutusa le maelega e auauna atu i lo tatou Faaola ma le naunau e tauivi i le sini ia avea o se aiga e faavavau.

Faaluuina le Onosai, Faaluaina Faamanuiaga

Pe a ou feiloai i ulugalii o e fetau i le tasi ma le isi mo se avanoa lona lua e faaipoipo ai, ou te fiafia mo i latou, fiafia



ua i ai ni a latou paaga ma uo lelei e mafuta faatasi. Ae ou te manatua foi nai tausaga muamua o le tuufaatasia o aiga e lua, sa le faapea na atoatoa le fiafia i taimi uma. E oo mai i se tau, ma o nisi aso matou te mafaufau ai pe aisea e manaomia ai ona matuai faigata.

I le taimi nei, o le ma fanau teine ia sa lei fiafia tele le tasi i le isi ao talavou, ua avea uma nei ma ni tina, ma fiafia e faatusatusa aafiaga pe a fai taumafataga faaleaiga, ma faapea foi ona mafuta faatasi i taimi o malologa i le fale [mo malologa] a le [matou] aiga. Na auina atu ni tusi faamalosiua i tama o loo auauna faamisiona, ma o nisi o le ma fanau na asiasi atu i le tasi ma le isi ao latou nonofo i atunuu mamao. Latou te maua le fiafia e le aunoa i le faatasitasi ai mo taumafataga tetele i aso fiafia, ma olioli i le logoina mai o le fanau mai o so latou tei fou.

O le taimi nei ua toe na o maua ma Arnfinn le fale. E i ai se ma taifau e fiafia e taaloga ma se tamai manulele fou. E masani ona asia e tamaiti o latou potumoe i le va o a latou aoga ma le faia o ni aiga fou. Latou te iloa e talia i latou i taimi uma ma o le a fafaga ma alofaina pe a latou o mai.

O le tuufaatasia o ni aiga se lua e manaomia ai le faaluaina o le faateleina o le alofa ma faaluaina le onosai. Sa tele naua ni faiga meaa, ma le anoano o uta o tagamea e tata, ae na aoga lava. Matou te alolofa i lo matou aiga toatele. O faamanuiaga o le i ai o ni tagata e faaluaina le toatele e alolofa i ai, e faaluaina foi le maoae.

Ma o loo tuputupu pea lo matou aiga. Ua i ai se tupulaga fou o ni pepe aulelei, ma o fanau uma a le ma fanau! ■
E alala le tusitala i Norway.

SA IA FAITAUINA LA'U MOLIMAU

O le taliina o la'u telefoni, sa ou faalogo ai i le leo fiafia o se tasi o faifeautalai i le lotoifale o ta'u mai ia te a'u se papatisoga o le a faia i ni nai aso. Ioe, o papatisoga, e masani lava o se mafuaaga lea o le fiafia o faifeautalai, ae peitai, o le igoa o le uso o le a papatisoina sa ou le iloina. Ae sa tausisi mai lava le alii faifeautalai ia ou auai atu i le papatisoga ona sa faatalitali mai se mea ou te te'i ai. Sa le mafai ona ia ta'u mai ia te a'u nisi faamatalaga.

I le aso o le papatisoga, sa ou vave taunuu ai i le falelotu e vaai po o le a lea mea e faate'ia ai. Ae sa ou le iloa le uso talavou—o Alesi—o le sa papatisoina, ma na te le'i tuuina mai se faailo e faapea na te iloina a'u.

I na ua siitia ese le pisinisi mai le poloka laitiiti, sa faatonu ai e le pule ia Alesi e tiai le tusi. Ae sa fia iloa Alesi, ma fesili pe mafai ona ave ma ia.

Ina ua mavae le papatisoga mata-gofie sa faatumulia i le Agaga, sa uu e Alesi se Tusi a Mamona a o ia molimau mai i lona moni, ma faailoa mai lona agaga faafetai mo ona aoaoga, ae maise lava i lana molimau i le Faaola. I lana molimau, sa ia faamatala ai le auala na oo atu ai le tusi ia te ia. Sa faigaluega o ia [i se pisinisi] sa faia i se poloka laitiiti i se faletele mo faatauga i le lotoifale. I se tasi aso na alu atu ai se tamaitai ma tuu atu le tusi i lona pule. Sa le manao i ai le pule ma [ia] tuua ai i luga o le fata.

I se taimi puupuu mulimuli ane, ina ua siitia ese le pisinisi mai le poloka laitiiti, sa faatonu ai e le pule ia Alesi e tiai le tusi. Ae sa fia iloa Alesi, ma autilo vave i le tusi, ma fesili pe mafai ona ave ma ia.

Sa ave e Alesi le Tusi a Mamona i le fale, faitau i ai mo ni nai vaiaso, ma sa faatalitonuina i lona moni. Ae na te le'i iloa le mea e fai. O ni nai masina mulimuli ane, sa maua ai se isi ana galuega, lea sa la faigaluega faatasi ai ma se tagata o le Au Paia o Aso e Gata Ai. Sa ia fesili atu ia te ia e uiga i le Tusi a Mamona ma le Ekalesia, ma sa la valaaulia ma lona toalua ia [Alesi] e feiloai ma faifeautalai.


Ona fai mai lea o lenei uso, na te fia faitauina le molimau o loo tusia i luma o lana Tusi a Mamona. O la'u molimau. Sa ou tuua i ai a'o le'i tuuina atu i le pule a Alesi i le poloka laitiiti.

Sa amata ona ataata fiafia ia alii faifeautalai. O le faate'i aupito manaia lenei na ou oo i ai i lo'u olaga! Ina ua maea le sauniga o le papatisoga, na telea'i mai lo'u uso fou i le talalelei e fusi a'u.

Sa ou fiafia e molimauina le papatisoga o Alesi ma faalogo i lana molimau faatauvaa, na maua e ala i le faitauina o le Tusi a Mamona ma tatalo e pei ona fautua mai ai Moronae: "Ma afai tou ole atu ma le loto faamaoni, ma le manatu moni i ai, ma le faatuatua ia Keriso, o le a ia faaali mai le moni o ia mea ia te outou" (Moronae 10:4).

O loo faatumulia pea a'u i se agaga faafetai loloto ona na mafai ona ou faia se vaega itiiti e fesoasoani ai i se tasi o fanau a le Atua ia maua faamanuiaga o le talalelei a Iesu Keriso. ■

Faith Watson, luta, ISA





Sa ou popole tele pe o le a faapefea ona ou fesoasoani i la'u fanau e totogi a la misiona.

TAUSI NI ATALII AGAVAA

I ni tausaga ua mavae, ao avea au ma se tina nofofua, ma lofituina i le vaaliga ma le tausiga o lau fanau e toafa, o se meaalofa tele mai lou tina ma lou tuagane na mafai ai ona ou toe foi i le kolisi. I taimi ou te tietie atu ai i le aoga, ou te mafaufau i ou faamoe-moega ma miti mo lau fanau. O au o se tagata liliu mai i le Ekalesia. O lou manaoga faavalea o le, ia latou maua le avanoa e aoao atu ai le talalelei i isi ma aumai ia i latou le fiafia na ou lagonaina.

I se tasi taeao, a o tietie atu i le aoga, sa ou mafaufau i lau fanau tama matutua e toalua, o e 22 masina e va a'i. Afai la te auauna atu, e uma mai le misiona a le matua ae faatoa amata [le misiona] a lona uso. Sa ou popole tele i lenei mea ma mafaufau pe o le a mafai faapefea ona ou fesoasoani ia i laua e totogi a la misiona. Sa ou le mautinoa e mafai ona ou maua ni tupe e auina atu ai le muamua, a'o le lona lua foi ia.

Sa faaauau pea lenei fesouaiga mo aso e fa, a'o ou tatalo mo se tali. I le aso lona lima na oo mai ai le tali:

“Tausi ni atalii agavaa. E faigofie ona maua tupe; ae e le faigofie ona maua ni atalii agavaa.”

Sa faatumulia lo'u loto i le toafilemu. Sa mamao lava le tali mai o'u atugaluga tautupe ma sa faapea ona faateia ai a'u. O la'u galuega o le tausii o ni fanau agavaa. E mafai ona ou faia afiafi faaleaiga, auai i le lotu, ave la'u fanau i le seminare, ma fesoasoani i o'u atalii i gaioioiga a Alii Talavou. E mafai ona ou faia le tatalo, anapogi, ma le faitauina o tusitusiga paia o se vaega o le olaga o le matou aiga. Sa ou iloina afai e fai lau vaega, atonu e maua e la'u fanau se avanoa e fai ai ni misiona.

E faaopoopo atu i le matou faiga masani, sa i ai sa matou faiaoga maoae o aiga o le sa alofa i lo'u aiga. Sa faamaoni o ia ma lona faletua e o mai i masina taitasi. Sa ia aoaoina la'u fanau i lesone, tuuina atu ia i latou ni faamanuiaga, ma auai i a latou taaloga. Sa avea e uo o'u atalii i fonotaga a le au perisitua a le siteki ma tolauapiga e alu ai ma le po. Sa i ai tagata o le siteki na tuuina mai ia i latou ni avanoa e faigaluega ai ma maua ni tupe, o ni tuaoi

o e sa pei o ni matua faaopoopo, ma faiaoga i aoga o e sa aoaoina i latou i le amio pulea ma ia tutusa le lelei i aoaoga, musika, ma taaloga.

Ina ua atoa le 19 o lo'u atalii matua, ua i ai le tupe iina mo lana misiona. Na ou iloa mulimuli ane, sa i ai lava iina le tupe mo la'u fanau uma e toafa e auauna atu ai. Sa latou auauna atu i Mekisiko ma Pasila ma i Carolina i Saute ma Virginia, ISA. O le toalua laiti sa iu ina auauna atu i le taimi e tasi!

O lena aafiaga e masani lava ona ou mafaufau ai i fetalaiaga a le Alii i le Isaia: “Aua o o'u manatu e le o outou manatu, o o'u ala e le o outou ala, ua fetalai mai ai leova” (Isaia 55:8).

E taliina mai tatalo pe a tatou mulimuli i le fautuaga tatou te maua, ma e masani lava ona sosoo mai ai ma faamanuiaga. Ou te iloa o le auaunaga na tuuina atu e la'u fanau i le Alii, na suia ai o latou olaga ma olaga o i latou na latou aoaoina. O a latou auaunaga ua faamanuiaina ai lo matou aiga, ma o le a faaauau ona faia ai faapea mo le tele o augatupulaga. ■

Janness Johnson, Kalefonia, ISA

NA O LE LUA PAPATISOGA?

A o ou auuana atu o le peresitene A o le Misiona a Kuatemala Aai o Kuatemala, sa ma maua ai ni nai faifeautalai fou. A o ou faailoa atu au lava i nei faifeautalai, sa ou faamatala atu ia i latou le tala i lou liliu mai ma [lou] papatisoga.

Sa ou faamatalaina o Elder David Tree ma Wayne Matthews sa aoaoina au i le talalelei ina ua iva ou tausaga ma ou nofo i Glendive, Montana, ISA. Sa ave atu au e faifeautalai e toalua ma se tagata o le Paranesi a Glendive i Williston, Dakota i Matu, ISA, i se aso malulu i le 1957, ina ia mafai ona ou papatiso

i le faatanoa mo papatisoga a se falelotu iina.

Ina ua uma ona faamatala atu lau tala, ma ou faatalanoaina faifeautalai fou, sa fai mai se tasi o i latou, o Elder Benjamin Pixton, ia te au, o lona tamamua ia David Tree. Oka se faatei ina a manaia! Sa papatisoina e Elder Tree se tamaitiiti e iva tausaga le matua i Glendive, Montana, ma o le toetiiti 50 tausaga mulimuli ane, na valaauina ai lena tamaitiiti e avea ma peresitene o le misiona a le atalii o lona afafine.

Ina ua o mai matua ma matuamatumua o Elder Pixton e ave o ia i le faaiuga o lana misiona, sa ou maua le

fiafia i le toe feiloai ai ia David Tree. I le taimi o le matou feiloaiga, sa ou faaali atu ia te ia le Tusi a Mamona—ma se savali ma le folafolaga na ia tusia—lea na ia tuuina mai ia te au i le aso na ou papatiso ai.

Sa fai atu le tina o Elder Pixton ia te ia, sa lei talanoa tele lona tama e uiga i lana misiona. Sa ia lagonaina, sa lei faamanuiaina tele o ia ona sa na o le toalua ni tagata na ia papatisoina: o se tamaitai nofofua ma se tamaitiiti e iva tausaga le matua.

I le agaga faafetai sa ou fai atu ai ia te ia, ona o ana taumafaiga, na iu ai ina auai uma lou aiga i le Ekalesia, ma

Sa ave atu au e faifeautalai e toalua ma se tagata o le Paranesi a Glendive i Williston, Dakota i Matu, ISA, i se aso malulu, ina ia mafai ona ou papatiso i le faatanoa mo papatisoga a se falelotu iina.



TATALO MA LE MANATU MONI I AI

o maua ma lou uso, faatasi ma o ma atalii e toaiva, na auauna atu faamisi-ona. Ona o lana auaunaga faafaifeautalai, sa ou fai atu ai, e le mafaitaulia tagata na aoaoina i le talalelei ma auai ai i le Ekalesia.

E toatele ni alii lelei, agavaa, ma tuuto na umia le perisitua, sa vaaia au i tausaga o lou tamaitiiti ma lou talavou, e amata atu ia Elder Tree ma lana soa o Elder Matthews. O le a ou faafetai e le aunoa ona sa laua aoaoina au i le talalelei a Iesu Keriso ma aumai au i le malo o le Alii, lea ua le mafuatiaina ona Ia faamanuiaina ai au. ■

Thomas R. Coleman, Kansas, ISA



I le 1960, sa ou feiloai ai i se alii talavou i se pati o lē na fai mai ia te au, sa asiati atu Iesu Keriso i le Atu Amerika ina ua mavae Lona Toetu. Sa ou faapea o se manatu manaia tele, ma sa ou fia iloa atili, o lea na amata ai ona ou suesue i faletusi ma fesilisi i aulotu i tapuaiga eseese i lou nuu o San Miguel, El Salvador.

Na toeitiiti atoa le tolu tausaga o ou saili, ae na leai se mea na ou mauaina. Ina ua ou tauina atu i taitai faalelotu na ou faalogo i le oo mai o Keriso i le Atu Amerika, sa latou fai mai na faaseseina au. Ona sa leai ni faamatalaga na ou mauaina i lau sailiga, o lea na iu ai ina ou talitonu na sao i latou.

I se tasi aso, na o mai ai i lou fale ni faifeautalai se toalua mai Le Ekalesia a Iesu Keriso o le Au Paia o Aso e Gata Ai, ma fai mai sa i ai se la savali taua mo lou aiga. Sa vave lava ona ou fesili i ai, “E te lua iloa pe na afio mai Iesu Keriso i le Atu Amerika?”

Sa fai mai se tasi o i laua, “Ma te molimau atu i lena mea.”

I lena taimi sa ou lagonaina ai se fiafiaga sili i lou mafaufau ma lou loto ma fesili atu, “E Faapefea ona e iloa lena mea?”

Sa ia aveese mai se tusi mai lana ato ma fai mai, “Ua ma iloa na afio mai Keriso iinei ona o le tusi lenei, o le Tusi a Mamona.”

O le mea na tau mai e faifeautalai ia te au i le taimi o le lesona muamua sa ou le mautonu ai, ma sa ou le talitonu i le tala i le faaaliga a le Perofeta o Iosefa e uiga i le Tama ma le Alo.

Ae peitai, sa ou fiafia i le Tusi a Mamona, ma sa faaaauau ona aoao au e faifeautalai. I se tasi aoauli sa laua fesili mai ai, “Ua e tatalo ea ina ia iloa ai pe moni mea ua ma aoao atu?”

Sa ou fai atu ia i laua, sa ou tatalo ae e lei maua lava se tali.

“E tatau ona e tatalo ma le manatu moni i ai,” sa la fai mai ai.

Sa ou faitauina le Tusi a Mamona mo ni nai po. Sa ou faitau ma talitonu i le faaali mai o Keriso i sa Nifae. Ae sa ou le talia lava le faaaliga a Iosefa Samita. Sa faaletonu lava lau tauiviga i le loto.

I se tasi po na ou tootuli ai na o au ma tatala atu lou loto i le Atua. Sa ou fai atu ia te Ia, e manaomia ona ou iloa pe na Ia faaali moni mai o Ia lava ia Iosefa Samita. Afai sa Ia faaali mai, sa ou folafola atu ia te Ia, o le a ou papatiso i le Ekalesia ma auauna atu ia te Ia i lou olaga atoa.

Ina ua ou alapo ae i le taeao na sosoo ai, na oo mai le tali ia te au e ala i le Agaga Paia. Sa manino lou mafaufau ma sa faatumulia lou loto i le toafilemu. Mai lena lava taimi e oo mai i le taimi lenei, e lei toe i ai lava se mea na ou le talitonu ai o Iosefa o se perofeta moni a le Atua, ma o le Tusi a Mamona o se tasi molimau ia Iesu Keriso, ma o Iesu Kreiso o lo tatou Faaola ma le Togiola. Ua ou iloa na afio mai Keriso i le Atu Amerika ina ua mavae Lona Toetu. Ua fiafia lou agaga i lenei malamalama ofofofia na aoaoina ai au e le mana o le Agaga Paia. ■

Carlos Rene Romero, El Salvador

O A ni Mea e Mafai
ona Aoao mai e le
Tusi a Mamona ia i
Tatou e uiga i le

Fiafia?

Saunia e Hank R. Smith

Faiaoga o Aoaoa Faalelotu,
Iunivesite o Polika laga

Na aoao e Liae lona atalii
o Iakopo, “Ua i ai tagata,
ina ia latou maua le olioli”
(2 Nifae 2:25).

Tatou te mananao uma lava ia
fiafia. E masani ona tatou moomoo
mo le fiafia, filemu, ma le faamalieina
tatou te vaaia i tagata o o tatou aiga
ma uo, o o latou olaga e foliga mai e
faatumulia i le fiafia. E i ai ni taimi ese-
ese na lagona ai e tagata uma le leai
o se fiafia i o latou olaga. O nisi atonu
ua tau mafaufau, “Mata o le a ou maua
ea le fiafia?”

Na saunoa Peresitene Henry B.
Eyring, Fesoasoani Muamua i le Au
Peresitene Sili: “Ua tuuina e le Alii
i [le Tusi a Mamona] Lana savali ia
te oe. Sa iloa e Nifae, Mamona ma

Moronae lene mea, ma o i latou na
tuufaatasia na tuuina i ai savali mo
oe.”¹ Ona e finagalo le Atua i Ana
fanau uma ina ia fiafia i lenei olaga,
ua Ia tuuina ai mataupu faavae e faa-
vavau o le fiafia i le Tusi a Mamona.
E ui lava e mafai ona e maua nei
mataupu faavae i le tusi atoa, ae e
lua mataupu faapitoa lava—2 Nifae 5
ma le 4 Nifae 1—o loo i ai ni taiala
manino, o le a taitai atu ai i tatou i le
faateleina o le fiafia pe afai tatou te
naunau e ola ai.

2 Nifae 5

E lei lava ona uma le maliu o
Liae, ae lapataia e le Alii ia Nifae,
o le a taumafai Lamana ma Lemuelu
e fasioti o ia. Na tau atu e le Alii ia
Nifae, e ave i latou o e o le a o faatasi
ma ia ma sosola atu i le vao. E ui e
mautinoa lava sa i ai faigata i lenei

**E fitu ni mataupu
faavae e mafai ona
tatou malamalama ai
mai i mataupu e lua
i le Tusi a Mamona,
o loo aoao mai ia
i tatou le mea e
manaomia e [maua
ai le] fiafia moni.**

malaga umi ma le faavaeina o se nuu
fou, ae i le 2 Nifae 5:27, na faamala-
malama mai ai e Nifae, “Ma sa oo ina
matou ola e tusa ma le ala o le fiafia.”
O lenei mataupu ua faatulaga ai se





O lagona ausia o se mea, lea e masani ona o mai faatasi ma le galue malosi e aumai ai le fiafia.

mamanu o le fiafia e mafai ona tatou mulimuli ai i o tatou lava olaga.

Faatumauina o Fegalegaleaiga Faagaetia

Ua tau mai e Nifae ia i tatou, o e na sosola atu i le vao faatasi ma ia, o i latou o e “sa talitonu i lapataiga ma faaaliga a le Atua” (fuaiupu 6). O se punavai taua o le fiafia o lo tatou lio o faagafesootai. E taua mo i tatou ona faaalua se taimi ma isi o e tutusa o tatou talitonuga, ma o lo latou i ai e faagaetiaina. E le gata i le faaalua o taimi faatasi ma tagata o le aiga, e mafai ona tatou faia ni fegalegaleaiga faagaetia faatasi ma ni uo o e

faamalosa lo tatou faatuatua. O na fegalegaleaiga ma mafutaga e i ai se aafiaga taua i lo tatou fiafia. Sa tusia e Christine Carter, o se tagata e suesuea amioga faagafesootai a tagata i le Iunivesite o Kalefonia, Berkeley, “O le tele ma le lelei o fesootaiga faaga-fesootai o se tagata—faauoga, sootaga

ma tagata o le aiga, vavalalata i tuaoi, ma isi—e latalata lava le fesootaiga i le manuia ma le fiafia patino, toetiiti a tutusa le lua lea.”²

Faaōgatusa o Faatinoga ma Talitonuga

I le fuaiupu 10, o loo tusia ai e Nifae sa tausia e lona nuu “poloaiga a le Alii.” O le usiusitai i poloaiga o se vaega taua lea o le ola i se olaga fiafia. Sa faamalosiaina e le Tupu o Peniamina lona nuu ia “manatunatu i le tulaga manuia ma le fiafia o i latou o e e tausi i poloaiga a le Atua” (Mosaea 2:41). E faigata ona tatou maua le fiafia pe a tatou talitonu i poloaiga a le Atua ae e le ola ai. O le usiusitai e aumaia ai le filemu o le mafaufau ma le filemu o le iloaitino. E faapea na tusia e le taitai faaleagaga ma faaleupufai Initia o Mahatma Gandhi e faapea, “O le fiafia o le taimi lea e ogatasi ai mea e te mafaufau i ai, mea e te tautala ai, ma mea e te faia.” Afai e le ogatasi o tatou talitonuga ma faatinoga, o le salamo o le ki lea i le toe faatulagaina o le ogatasi i o tatou olaga.

Ausiaina o Galuega Faigata

I fuaiupu 11 ma le 15 o le 2 Nifae 5, ua tusia ai e Nifae, sa totolina ma selesele e lona nuu ia laau, fafaga lafu ma fagaga, fau fale, ma galulue i oa eseese. Sa ia fai mai, “Ma sa oo, ina faia e a’u o Nifae, ia toaaga o’u tagata, ma ia galulue i o latou lava lima” (fuaiupu e 17). Mai nei fuaiupu ua tatou iloa manino ai, o le galue o se vaega taua lea i le mauaina o le fiafia. O aso uma e oo mai ai avanoa e galulue ai i o tatou aiga, i talaane

o o tatou aiga, ma i o tatou afoaga, po o a tatou galuega. Na saunoa mai Peresitene Thomas S. Monson: “Na tuu e le Atua le lalolagi e le uma ona fai mo le tagata e faaoga ai ona tomiai. Sa Ia tuua le eletise i ao, o le suauu i le eleele. Sa Ia tuua vaitafe e le'i sosooa ma le vaomatua e le'i tatuuina ma aai e le'i fauina. Ua tuuina mai e le Atua i le tagata le luitau o mea mai le natura, ae le o le faigofie o mea ua uma ona fai. Sa ia tuua ata e lei valiina, ma musika e lei usuina, ma faafitauli e lei foiaina, ina ia mafai ona iloa e le tagata le olioli ma mamalu o le foafoaga.”³ I se faaupuga faigofie, o le fiafia tele i le fatufatuai ma le lagona ausia o se mea, lea e masani ona o mai faatasi ma le galue malosi e aumai ai le fiafia.

Tulai atu i le Malumalu

Ua ta'u mai foi e Nifae ia i tatou, sa faaalu e ia ma lona nuu le taimi e fausia ai se malumalu (fuaiupu 16) a o latou faavaeina lo latou nuu fou.

O faamanuiaga o le malumalu ma le fiafia e le mavavaeeseina. O le malumalu o loo aoao mai ai ia i tatou le ata o le faaolataga, ma faamanatu mai ai le mafuaaga ua tatou i ai iinei i le lalolagi. Tatou te aoao ai o i tatou o fanau a le Tama Faalelagi ma o loo i ai ni faamoemoega maoae o o tatou olaga i Lana fuafuaga. I le malumalu tatou te lagona ai le latalata atu ia te Ia; tatou te lagonaina Lona i ai, Lona mana, ma Lana faamaoniga. E tusa lava pe le mafai ona tatou auai atu e le aunoa i le malumalu, o le i ai o se pepa faataga aoga o le malumalu ma le i ai o se ata o le malumalu i o tatou fale, e mafai ona faamanatu mai ai ia i tatou ia aafiaga o le malumalu sa tatou mauaina ma upumoni ua tatou aoaoina ai iina.

4 Nifae 1

I le 4 Nifae, o loo tau mai ai e le perofeta-tusitalafaasolopito o Mamona, mea na tupu i tagata ina

ua mavae ona asiati atu le Faaola i le nuu o Nifae. A o ia faamatalaina mai nei tagata, sa ia taua, “E le mafai ona i ai o ni tagata e sili atu ona fiafia i totonu o tagata uma na foafoa e le aao o le Atua” (4 Nifae 1:16).

Faasoa Atu Mea ua Tatou Maua

I le fuaiupu 3, ua tusia ai e Mamona o nei tagata sa “tuutele mea uma i totonu ia te i latou” ma “sa leai se mauoa ma se matitiva.” A o tatou saili le fiafia i o tatou lava olaga i aso nei, e taua ona tatou aoao e faasoa atu mea ua tatou maua i isi.

Ua faaalua i suesuega o le tele o taimi e faaalu e auauna atu ai ma tupe e faaalu i isi, e i ai se aafiaga tuusao i lo tatou fiafia.⁴ E leitioa, la, tau atu e le Tupu o Peniamina i lona nuu, “Ou te mana'o ia outou faasoa atu a outou mea i e matitiva, ia taitasi le tagata ma faia e tusa ma mea ua ia te ia, e pei o le fafagaina o e ua fia aai, faaofuina o e ua lē lavalava, asiati atu i e mamai ma auauna atu



mo lo latou mapusaga, faaleagaga ma faaletino, e tusa ma o latou manaoga” (Mosaea 4:26). E i ai ni avanoa se tele tatou te fesoasoani ai ia i latou o manaomia le fesoasoani e ala i au-aunaga, taulaga anapogi, ma isi tupe eseese e pulea e le Ekalesia.

Sa saunoa Elder Jeffrey R. Holland o le Korama a Aposetolo e Toasefululua: “I le talafaasolopito atoa, o le mativa ua mafaufaaina o se tasi o faafitauli silisili ma sili ona taatele i tagata. O ona mafatiaga manino lava e masani ona faaletino, ae o faatamaiaaga faaleagaga ma faalelagona na te aumaia atonu e sili atu ona faataumaai. I soo se tulaga lava ua tuuina mai ai e le Faaola sili se valaau naunautai ina ia tatou aufaatasi ma Ia i le aveesea o lenei avega mai tagata.”⁵ A o tatou tuu atu taumafaiga sili atu, taimi, ma soo se mea e fesoasoani ai i isi, o le a tatou maua se faateleina i lo tatou lava fiafia.

Auai i se Aiga

Ua tau mai e Mamona o nei tagata “sa latou faaipoipo, ma tuu atu ia

faaipoipo” (4 Nifae 1:11). O le faaipoipo ma tausia se fanau (tagai i le fuaiupu 10) e mafai ona avea o se punavai maoae o le fiafia mo i latou e i ai nei avanoa. Na saunoa mai Peresitene James E. Faust (1920–2007), Fesoasoani Lua i le Au Presitene Sili, “O le fiafia i le faaipoipoina ma le avea ma matua e sili faaife atu ai i lo soo se isi lava fiafiaga.”⁶

Ae e le faapea seiiloga tatou te faaipoipo pe maua ni a tatou lava fanau, e maua ai ni mafutaga ma tagata o aiga e aumai ai le fiafia. O tagata nofofua matutua, autalavou, ma tamaiti e mafai foi ona saofaga i nei faamanuiaga. Ina ia maua le fiafia i le olaga faaleaiga, e tatau ona tatou taumafai e ofo atu i tagata taitoatasi o le aiga la tatou faauoga, malamalama, ma le alofa. E mafai e aiga ona tuuina atu le saogalemu faalelagona ma faaletino ma se lagona o le aofia ai, lea e taua i le mauaina o le fiafia.

O le Avea ma Sē e Faatupu Filemu

E faafa ona tau mai e Mamona i le 4 Nifae, o nei tagata sa “leai se ni

finauga” i totonu ia te i latou (tagai i fuaiupu e 2, 13, 15, ma le 18) “ona o le alofa o le Atua sa mau i loto o tagata” (fuaiupu 15). O finauga ma le fiafia e matuai faafeagai lelei lava—o le tasi e aluese mai le isi. Na lapatai e le Faaola sa Nifae i le matautia o finauga ina ua Ia fetalai, “O le e i ai le agaga o le finauga ua le mai ia te au o ia, ae ua mai le tiapolo ia, o le o le tamā o le finauga” (3 Nifae 11:29). E tatau ona tatou mautinoa tatou te faia se taumafaiga tele ina le faia po o le fai atu o soo se mea e aumaia ai se agaga o le finauga i totonu o tatou falefaigaluega, aoga, ma aiga. Ae e tatau ona tatou faia mea uma tatou te mafaia ina ia uunaia se alofa o le Atua i o tatou lava loto.

E masani lava o finauga e tulai mai i le le onosai. Faatasi ai ma le fesoasoani a le Agaga, e mafai ona tatou suia o tatou natura ma avea ma tagata sili atu ona onosai. Na saunoa mai Peresitene Dieter F. Uchtdorf, Fesoasoani Lua i le Au Peresitene



Sili: “O le le onosai . . . o se āuga o le manatu faapito. O se uiga o le faaloloto. E tulai mai mai le tulaga taatele lea e taua o le faamai o le ‘fia tagata’, lea e taitai atu ai tagata ia talitonu o i latou o tagata e sili ona taua i le lalolagi, ae o isi tagata uma ua na o ni tagata e fesoasoani ia i latou i le olaga lenei, lea e na o i latou lava e autu i ai.”⁷

E i ai se auala e sili atu ona lelei. Na valaaulia i tatou e Peresitene Gordon B. Hinckley (1910–2008) e “atiina ae le uiga auauumama o le tali filemu. O le a manuia ai o outou aiga, o le a manuia ai o outou olaga.”⁸

O se Valaaulia e Saili le Fiafia

O loo i ai i le Tusi a Mamona mataupu faavae o le fiafia. Ua na o se vaega ua tatou talanoaina o mea o loo maua i nei mataupu e lua. O a ni mea e mafai ona tatou maua i le vaega o totoo o le tusi? O le a atamai le amata o a tatou lava sailiga patino o le Tusi a Mamona mo nisi o taiala i se olaga e sili atu le fiafia. Na folafola mai e Peresitene Ezra Taft Benson (1899–1994) i le Au Paia: “O le taimi lava e te amataina ai se suesuega anoa o le Tusi a Mamona . . . o le a matuai faateleina ona e maua [faamanuia] o le olaga.”⁹ Ua tuuina mai e le Alii ia i tatou lenei meafaigaluega maoae. E mafai ona tatou aoao e faaaoga e faamanuia ai o tatou lava olaga ma olaga o i latou tatou te alolofa i ai. ■

FAAMATALAGA

1. Henry B. Eyring, “O Le Tusi a Mamona o le a Suia ai Lou Olaga,” *Liahona*, Fep. 2004, 15.



Amata lau lava sailiiliga o le Tusi a Mamona mo nisi taiala i le fiafia.

2. Christine Carter, “Happiness Is Being Socially Connected,” *Oke*, 31, 2008, greatergood.berkeley.edu.
3. Thomas S. Monson, “O le Sailiga o le Ola Atili,” *Ensign*, Aok. 1988, 2.
4. Tagai, mo se faaitaiga, Dunn et al., “Spending Money on Others Promotes Happiness,” *Science*, vol. 319 (2008), 1687–1688; Netta Weinstein and Richard M. Ryan, “When helping helps: Autonomous motivation for prosocial behavior and its influence on well-being for the helper and

recipient,” *Journal of Personality and Social Psychology*, vol. 98 (2010), 222–24; and Aknin et al., “Prosocial spending and well-being: Cross-cultural evidence for a psychological universal,” *Journal of Personality and Social Psychology*, vol. 104 (2013), 635–52.

5. Jeffrey R. Holland, “Pe Le o i Tatou Uma Ea o Ni Tagata Aisi?” *Liahona*, Nov. 2014, 40.
6. James E. Faust, “O le Faaoaina o le Faaipoga,” *Liahona*, Ape. 1978, 11.
7. Dieter F. Uchtdorf, “Faauau i le Onosai,” *Liahona*, Me 2010, 56.
8. Gordon B. Hinckley, “Cornerstones of a Happy Home” (saunoaga na fofogaina i se faasalalauga faasatelite mo tane ma ava, Ian. 29, 1984), 8.
9. Ezra Taft Benson, “O Le Tusi a Mamona—o le Maa ‘Au’au o Lo Tatou Faatuatua,” *Liahona*, Ian. 1987, 5.

Mafuaaga e Tava ai le Faauuga o le Inisitituti

E mafai ona faaleleia atili lou aoaoina o le talalelei a o e aveina ia vasega faavae fou e fa o le inisitituti.

Saunia e Matthew Porter Wilcox

Seminare ma Inisitituti

“O le mea ua tatou manaomia nei o le tupulaga silisili o talavou matutua i le talafaasolopito o le Ekalesia,” o le saunoaga lea a Elder M. Russell Ballard o le Korama a Aposetolo e Toasefululua i le autalavou matutua i le konafesi aoa o Aperila 2015. “O talavou matutua ua tatau ona lesitala i se inisitituti o mataupu faalelotu. O vasega . . . inisitituti o le a maua ai le paleni o lou olaga ma faaopopo atu ai i le aotauina o oe i le poto salalau, e ala i le tuuina atu ia te oe o se isi avanoa e faaalu ai se taimi e suesue ai tusitusiga paia ma aoaoga a perofeta ma aposetolo.”¹

Ina ia faalolotoina malamalama o le talalelei o talavou matutua, faamalolosia a latou molimau ma tautinoga ia Iesu Keriso, ma maua le taitaiga faaletagata lava ia mo o latou olaga, ua faamamafaina ai e le polokalama o le inisitituti le manaomia ona faaleleia atili le aoaoina o talavou matutua uma. O lenei faaleleia atili ua atagia mai i ni auala tetele se tolu: e ala i le ofoina atu o ni kosi faavae fou se fa, ma e ala i le tuuina atu o le faataua sili atu i le faauu mai

le inisitituti, ma e ala i le valaauliaina o tamaiti aoga uma e faia se matafaioi aoga sili atu i o latou aoaoga faaleagaga e ala i le faamaeaina o faitauga atofaina ma faavasegaga o le aoaoina.





O a ia vasega faavae fou e fa?

E ui o le a faaauuina pea ia vasega e pei o le Feagaiga Tuai, Feagaiga Fou, o le Tusi a Mamona, ma le Mataupu Faavae ma Feagaiga, ae o ni vasega faavae fou se fa ua avea nei ma ogatotonu o galuega fai o le inisitituti. Ua aofia ai le (1) Jesus Christ and the Everlasting Gospel [O Iesu Keriso ma le Talalelei e Faavavau], (2) Foundations of the Restoration [O Faavae o le Toefuataiga], (3) The Eternal Family [O Le Aiga e Faavavau], ma le

(4) Teachings and Doctrine of the Book of Mormon [O Aoaoga ma Aoaoga Faavae o le Tusi a Mamona]. E pei ona fautuaina mai e igoa, o nei vasega faavae e talanoaina ai aoaoga faavae autu, talafaasolopito, ma aoaoga o le talalelei, e pei ona maua i tusitusiga paia ma saunoaga a perofeta soifua.

“[O nei vasega faavae fou] e mafai ona taitai atu ai i suesuega loloto o





O vasega o le maatulimau o le a mau i le tusa ma le 30 gagana.

O A MEA E MANAOMIA ONA OU FAIA IA FAAUU AI?

Ua talosagaina oe ia e taulamua ma faia le faauuga o le inisitituti o se mea e ave i ai le faamuamua ma se vaega o lou faavae o le talalelei. O se taunuuga, o le a faateleina ai lou malamalama ma faalolotoina ai lou liua, a o e ausia togi manaomia e 14.* Ina ia maua nei togi, e tatau ona e:

- Aveina ia vasega faavae taitasi e tai lua togi o loo lisiina atu i lalo.
 1. O Iesu Keriso ma le Talalelei Faavavau
 2. O Faavae o le Toefuataiga
 3. O Le Aiga e Faavavau
 4. O Aoaoga ma Aoaoga Faavae o le Tusi a Mamona
- Ia maua nisi togi se ono e ala i le aveina o isi vasega e te filifilia lava e oe.
- E le gata i lea, o le a manaomia ona e maua se faamaoniga faalekalesia mai lou epikopo po o le peresitene o le paranesi.

* Ina ia maua se togi mo se vaega, e manaomia ona e auai ia le itiiti ifo ma le 75 pasene i le taimi o le vasega, maea ia faitauga atofaina, ma maea le faavasegaga o le kosi aoaoina.

tusitusiga paia, nai lo o kosi e aoao faasolo ai tusitusiga paia atoa pei sa i ai i le taimi ua mavae,” o le tala mai lea a Brent L. Top, o le faaao o aoaoga faalelotu i le Iunivesite o Polika Iaga. Na faaopoopo mai Chad Webb, o le pule mo Seminare ma Inisitituti o Mataupu Faalelotu, “O tusitusiga paia e latalata lava le fesootaiga, ma a o latou tuputupu ae faatasi, o loo i ai ni malamalamaaga loloto ma malamalama ma malosiaga lea e sau mai i se suesuega o tusitusiga faavae uma.”²

E ioe i ai le tamaitai talavou lenei: “Sa ou mafaufau i le tele o mea e mafai ona ou aoaoina moni e uiga i le Toefuataiga lea ou te lei iloa, ae sa ou maua se malamalama i mataupu faavae ma autu e faatatau i ai, lea ou te lei faia muamua lava. O le kosi e aofia ai autu e pei o faaipoipoga autautononofo, perisitua i alii agavaa uma, ma le Fasiotiga Tagata Faalealofa i Mountain Meadows. O nei talanoaga a le vasega na ou maua ai faamatalaga na faavae i le faatutua nai lo le masalosalo. O le kosi e faatatau ai foi le Toefuataiga i mea e tutupu i le taimi nei, o lea na ou iloa ai o au moni lava o se vaega o le Toefuataiga. E le na o le Perofeta o Iosefa Samita, Peresitene Polika Iaga, ma isi paionia. O au foi!”

Aisea e tatau ai ona ou faia le faauuga o le inisitituti o se sini?

O faamatalaga nei a nisi o tamaiti aoga e uiga i le faauu mai le inisitituti:

“Sa ou faia se sini ia faauu mai le inisitituti, ma e ui ina sa ou faia ni osigataulaga se tele, na tauia au i le malamalama, atamai, ma se molimau malosi atu.”

“Ina ua uma le faauuga, sa ou lagona le malosi sili atu ma saunia mo ni aafiaga fou. O le a ou faamalosi atu foi i isi ia faauu.”

“O le faauuga sa o se ausiga faaleagaga o loo uunaia ai pea au i luma i lau sini o le faaolataga e faavavau.”

A o e faaleleia atili lou aoaoina e ala i le galue agai i le faauuga, o le a e iloa ai ona faamuamua le suesueina o le talalelei ma faaleleia atili lou atamai i le talalelei. O le a e vaai ai i le lalagaina faatasi o nei upumoni i se ielalaga maoae o le molimau. Aua o le mea lava ia, o le faauuga o le inisitituti e faatatau moni i lou ave ma [tagata] malosi atu faaleagaga. ■

FAAMATALAGA

1. M. Russell Ballard, “O Le Tupulaga Silisili o Talavou Matutua,” *Liahona*, Me 2015, 68.
2. I le Marianne Holman Prescott, “Four New Classes Added to Curriculum for Church Schools,” *Church News*, Nov. 11, 2014.

MAFAUFAU I NI SINI TETELE

“Aua ne’i faatagaina isi e faatalitonu oe faapea, e tapulaa mea e te mafai ona faia.
Ia e talitonu ia te oe lava ma ia ola lea ina ia ausia mea e te gafatiaina.”

Peresitene Thomas S. Monson, (“Ola i se Olaga Faamanuiaina,” *Liahona*, Ian. 2012, 5.





O L E A L E
T U P U T U P U A E
F A A F U A S E I
**LO OUTOU
FAATUATUA,**
A E E A L A I A
O U T O U F I L I F I L I G A .

Elder Neil L. Andersen
Korama a Aposetolo e Toasefululua
Konafesi aoao ia Oketopa 2015



LESONA I ASO SA

O le autu o le masina lenei:
**O Le Ata o le
Faolataga**

Saunia e Sara N. Hall

na ua 17 ou tau-
saga, sa iloa e lou
tina na maua o ia
i le kanesa o le susu.

O le tetei na lofituina ai
lou aiga, ma na ou alu
ifo ai i ou tulivae i le tatalo
loloto. Na toeitiiti atoa le
itula o ou tagi, ma fesili atu
i le Atua pe aisea o le a Ia
faataga ai lenei mea e tupu,
ma pe o le a Ia faamalolo i
lou tina. Na amata ona oo mai
le toomaga i ni nai aso mulimuli
ane, ina ua logo tala i ai tagata
o le uarota, aiga lautele, uo, ma
tuaoi. Sa latou faanatinati mai e
fesoasoani ia i matou. Na aumai ni
taumafataga, fai mai ni upu agalelei
ma ni galuega alofa, ma faailoa mai
le popole ma le tiggalofo. Sa loloto
le alofa sa matou lagonaina mai ia
te i latou.

Ae e ui ina sa matou maua le tele o
le fesoasoani, ae sa ou oo i se tulaga o le
matuai le fiafia lava. Sa ou le popole i mea
na tutupu ia te au. Sa ou le toe faia mea sa
ou fiafia i ai. Sa oo ina ou paie ma faatalale
i feau, meaaoga, ma lou valaauga o le Eka-
lesia. Sa ou vaai i lou tulaga ma le tiutetauave
faaopoopo na tuu mai ia te au o se avega
mamafa tele. Sa ou manatu e mafai ona ou
faia na o au ia mea uma, ma sa le manaomia
se fesoasoani a se tasi.

O LOU POTU FAAMALOLO

O lou tina o le tagata lea na gasegase, ae sa ou manaomia foi le faamaloloina.

Sa faapitoa ona galue malosi Satani ia te au, ma fai mai e tatau ona ou lagona le mamafatu, sa finagalo le Atua ia ou faanoanoa, ma e le o au o se tagata faapitoa. O le mea e faanoanoa ai, sa ou talitonu i ai mo se taimi. Sa le mafai ona ou vaai i le itu lelei o soo se mea. Ou te lei vaai ia te au lava o se afafine o le Atua. Sa faatauasoina au e le mautonu, ma sa le mafai ona ou vaai i ou faamanuiaga e tele. Sa le mafai foi ona ou tilotilo i le faata. Sa ou lagonaina le matuitui ma le lototiga.

O le mea e faafetai ai, sa faaalu e se uo mamae le tele o taimi e fesoasoani mai ai ia te au, ma sa lagolagoina foi au e nai ou tei. Sa amata ona faamaoni ona ou talanoa atu i ou matua, o e na amata foi ona faamaoni le talanoa mai ia te au. Ae sa ou tauivi pea lava.

E masani ona faamafanafana au e lou tina pe a ou faanoanoa. Pe a ou lagonaina na pei ua leai se faamoemoe, sa manaia le i ai o se tasi e talanoa i ai ma fesoasoani mai ia te au. E sau o ia i le fale i le va o ana togafitiga ma auli o matou lavalava, saunia ni taumafataga, ma aumai faamafanafanaga ma fautuaga ia i matou. Sa ou ofo i le ala na te onosaia ai ni tofotofoga faapena, ae leai ma se manatu faapito.

Ina ua ou talanoa atu i ai i se tasi aso e uiga i lou faanoanoa tele, sa ia fai mai ia te au, e le faapea na ou tagi ma ioe sa ou manaomia le fesoasoani, ona faapea ai lea ou te vaivai. Sa ia vaaia au ae sa tatau ona ou vaaia o ia.

Ina ua mavae se tasi o ona mau taotoga, sa i ai lou tina i le potu e faamalolo ai ia toe maua se faasiligamalosi. I le taimi lea, sa le mafai ona taofiofi lou mafaufau faapea, e manaomia sou lava potu faamalolo. Sa ou le iloa po o fea e amata ai le faagasologa o le faamalologa, ae sa tatau ona ou faia se mea.

O lea sa amata ai ona toe faafou au taleni ma tomai, faapea foi ma le atiina ae o ni taleni ma tomai fou. Sa ou kuka ma fai tagamea. E tele ni au savaliga sa alu e mafaufau ai. Sa ou usuina ni pese taitoatasi. Sa faateleina lou

iliina o le pu [clarinet] ma le taina o le piano ma sa amata ona lelei atili. Sa tele ni tusi sa ou faitauina. Sa amata ona ou faalogologo i musika e sili atu le musuia. Sa ou siomia au lava i fautuaga mai taitai o le Ekalesia ma isi punaoa taua. Sa oo ina ou latalata atili atu ai i le Atua ma lou Faaola, e ala i tatalo patino, anapogi, ma le suesueina o tusitusiga paia.

Ae sa ou lagonaina lava le pei na fai ma mou atu lou toafilemu. Sa faigata i nisi o aso pe a ou manao ia ou maua le toafilemu, nai lo lena, ou te lagona lava le faanoanoa. Sa oo ina atili faigata le suisui soo o faalogona. Sa foliga mai na faatoa amata lau malaga mo le toafilemu.

Ona ou alu lea i le malumalu e faia papatisoga mo e ua maliliu faatasi ma lau vasega o Tamaitai Talavou. Sa ou mafaufau i ou faafitauli ao ou i ai i le malumalu, ma ao ou susueina itulau o au tusitusiga paia. Sa faapea ona ou faitau ai e uiga i le Faaola i le Isaia 53:4, “E moni, ua na tauave o tatou tiga, ma na tauave o tatou faanoanoa.”

I ni nai minute mulimuli ane, na mou ese atoa ai le fenu-miai lea na faatauasoina ai au, ma mafua ai lou tiga tele. Na aveese e le Alii le pouliuli ma le atuatuvaale o lou loto, ae tuua ai le filemu o le Agaga. Sa ou maua se lagona manino ma le fiafia lea na umi se taimi ou te lei toe lagonaina. Sa ou vaaia le anoano o faamanuiaga na ou mauaina, ma le tele o mea na faia e tagata uma mo au ma lou aiga. Sa ou vaai i le vavalalata na matou oo i ai ma lou aiga, ma uo. Sa ou vaaia au lava o se afafine lalelei moni o le Atua.

O iina i le malumalu na ou maua ai lou potu faamalolo.

O le toe tepa i tua i lenei aafiaga, ua ou iloa ai, i le taimi nei ua tele atu lou agaga malamalama ma le agaalofo mo i latou o e e sili atu ona limavaivai nai lo o au. Ua ou iloa le mea e faamalolo ai. O le tausaga sili ona faigata o lou olaga, sa avea ma tausaga sili ona lelei o lou olaga. ■

E alala le tusitala i Iuta, ISA.



*E te manao i se
galuega, aiga, ma se
molimau maoae? E mafai
ona e filifilia i le taimi nei
le ala i le manuia!*



O LOU LUMANAI

O Le Fuafuaga Lava Ia e Matagofie

O le faia o filifiliga i le taimi nei ina ia ausia au miti mo le lumanai e mafai ona foliga mai e faigata, ae o faaiuga lelei i ou tausaga o le talavou, o le a maua ai taunuuga manuia. O lenei auala e mulimuli i le fautuaga lenei mai se perofeta: “O a tatou amioga ma filifiliga i aso taitasi e tatau ona ogatusa ma a tatou sini” (Quentin L. Cook, “Filifili ma le Atamai,” *Liahona*, Nov. 2014, 49).

O tala nei e fa ua faaalua ai, po o a lava au sini faapitoa patino, e mafai ona e ausia le manuia i le lumanai e ala i sauniuniga tuuto i le taimi nei.

Faataitaia o Tagata Autu: Clint Taylor

O Clint sa ola a'e i Iuta ma o loo faigaluega i le taimi nei i Kalefonia, ISA, i le Nickelodeon Studios o se tagata e vaai e tostitosia ata i luga o pepa.

O a nisi o ausiga ua e mitamita ai?

Sa avea a'u ma se faatonusili i le Warner Brothers Animation, ma sa ou faigaluega mo le Disney, Warner Bros., DreamWorks Studios, Marvel Comics, ma le Sony Pictures Entertainment. Sa ou galue i faaaliga o ata komi mai le *Teenage Mutant Ninja Turtles* ma le *X-Men* e oo i le *Dora the Explorer*.

Na faapefea ona e lelei i mea e te faia?

A o ou laitiiti, sa ou fiafia e tusi ata o mea sa ou fiafia i ai. Sa ou faaaluina ni taimi se tele i le tusiina o ata o fitaifita po o tagata autu po o manuveafa po o soo se mea lava sa ou fiafia i ai i lena aso. O le tele lava o lo'u faataitai soo, o le lelei foi lea o lau tusi ata. Sa ou iloa na tuputupu ae la'u taleni e ala i le maelega, maitau, ma le filiga. Sa ou lagona ina na tuuina mai e le Atua ia te au se meaalofo matagofie, ma sa ou mana'o ia sili ona ou lelei i ai.

Na faapefea ona fesoasoani lau misiona e saunia ai oe mo le manuia i le galuega?

O la'u misiona i Korea sa taua i lena mea, sa fesoasoani ou te aoao ai i le faatuatua, loto pulea, ma le tuuto i le tulaga aupito lelei silisili. Sa ou sau mai la'u misiona ma se lagona faateleina o le lototele. Sa ou faia se mea faigata ma sa faamanuiaina ai. E mautinoa lava na fesoasoani ia te au ia avea ma se tamaitiiti aoga sili atu i le kolisi.

O le a le vaega na faia e au aoaoga i lou tulaga faamanuiaina?

Ina ua uma la'u misiona ona ou aoga lea i le valiina ma le tusiga o ata i le Iunivesite o Iuta i le Kolisi o Faatufugaga. Ona ou faaaluina lea o se semesa i fafo i Farani i le suesueina



o faatufugaga ma le aganuu i Europa, lea sa mafai ona vaai ma iloa ai le tele o isi galuega o faatufugaga.

Ona o nei aafiaga, sa faapea ona ou maua ai se faila tele o a'u lava faatufugaga. O le taimi lava na ou faauu ai mai le iunivesite, sa faafaigaluega a'u e se tamaloa sa sueina ni tagata tusiata e faigaluega i le *Marvel Spider-Man and His Amazing Friends*. [Tama-Apogaleveleve ma Ana Uo Maoae].

Avea ma se Tagata Atamai i Komepiuta: Ioana Schifirnet

Sa ola ae Ioana i Romania ma o loo aoga i faamatalaga o polokalama [komepiuta] i le Iunivesite o Polika Iaga.

O le a se mea sa e faia a'o e talavou na saunia ai oe mo lenei galuega?

Sa leai se taimi na faapea, na faafuasei lava ona ou ala a'e ua ou lelei i le faiga o le polokalamaina po o mamanu, lea ua tele ina ou faia i aso nei. Ou te iloa ua ou faia le galuega o loo ou faia ona o le anoanoai tele o faaiuga laiti i le ala.

Sa ou le fefe e ave vasega faigata, ma sa ou faaaluina le taimi e susesue ai mataupu eseese ma tagata e i ai. Sa ou aapa atu foi i tagata tomai faapitoa ma maua mai fautuaga ia i latou. Latou te iloa itu lelei ma itu leaga o le galuega, ma mafai ona fesoasoani e aumai ni taiala ia te oe.

O a mataupu faaleaoaoga sa sili ona aoga?

I lo'u aafiaga, o mataupu e sili ona aoga i le aoga maualuga, ae maise i le kolisi, sa i ai vaega e faatatau i le tekinolosi. O le aoaoina o se gagana ese (mo au, o le faa-Peretania) na fesoasoani foi, aua na aoaoina ai a'u ia malamalama atili ma faaaloalo i isi tagata ma aganuu. O le gagana ese atonu e le faatatau sa'o i se matata, ae e fiafia pule o galuega e iloa o loo i ai sau vaaiga lautele i le lalolagi.

O a ni ou atugaluga sa i ai?

A o ou laitiiti, sa ou popole ina ne'i o'u le maua tonu se mea o le a ou fiafia e fai. Ma a ou maua foi se mea, sa ou fefe ona sa le'i i ai ia te a'u agavaa manaomia e faamanuiaina ai.

O le mea masani lava le lagonaina o le lofituina a'o e taumafai e tau mafaufau i mea e te fiafia i ai, ae aua ne'i faatagaina e taofia ai oe.

Na faapefea ona e faatoilaloina ou popolega?

O le mea sili ona lelei sa fesoasoani ia te au, o le alu



e fai ni gaioiga anoa, e pei o le faia o vasega i luga o le initoneti ma auai i kalapu. O le auala lena e oo mai ai le manino, malamalama, ma le lototele. O se vaega o ni uo po o se kalapu o ona tagata auai e tutusa mea tou te fiafia i ai, e mafai ona avea o se punaoa mamana tele. E fesuisuia lava le lalolagi i taimi uma, ma e i ai lava i taimi uma se mea fou e aoaoina, ae afai e i ai sau au lagolago mautu ma ni tomai maoae, o le a malie le taumafai e pipii atu pea i ai i [na suiga].

Atiina Ae o se Alofa mo le Talalelei: Jess McSweeney

Ua talanoa mai Jess, o se talavou matua mai Egelani, e uiga i ana taumafaiga i le aveai ai ma se tagata talavou ia tumau malosi i le talalelei.

Na faapefea ona e faamallosia lau molimau?

I le aveai ai ma se tagata talavou, sa ou susesueina tusitusiga paia ona sa fautuaina a'u e taitai e fai. A o ou susesue i le faatuatua, ma faamoemoe ia tuputupu ae la'u molimau, o le mea tonu lava lena na tupu.

O lenei la, i le aveai ai ma se talavou matua, ua ou iloa ai, o lo'u naunau e aoao ma tuputupu ae i le talalelei e sau mai le ala e mafai ona ou faaogaina ai e faatosina ai isi. Ou te iloa o mea uma ua ou aoaoina e mafai ona fesoasoani ai i se isi tagata faapea ma au lava.

Na e faia ni sini e fesoasoani ia te oe?

A o ou i ai i le seminare, sa ou faia se sini e faitau i tusitusiga paia i aso uma. Ae peitai, ao faasolo ona aveai a'u susesuega o tusitusiga paia o se mausa, na suia le [agaga] na faaosofia ai a'u. Sa amata ona ou faitau e le o le tau ina ia ausia se sini, ae ona sa ou fiafia i tusitusiga paia ma manao e faamallosia la'u molimau. O lena tau e le faaletino, ae o se mea e mafai ona teuina e faavavau.

Ua faapefea ona fesoasoani lou fialia i le talalelei ia te oe i lou olaga?

O le atiina ae o se fialia e aoao i le talalelei, e le na o le mauaina o le atamai e faatatau i ai; e faatatau i le malamalama ma le faaogaina o mataupu faavae o le talalelei. A o ou atiina ae se mausa o le faia o fesili ma le sailia o tali mai i tusitusiga paia, sa ou maua se molimau faapea foi ma le lototele e faasoa atu mea sa ou aoaoina i isi.

O le a le taua o le galue malosi ma le filiga?

O le mauaina o le atamai i soo se vaega o le olaga e manaomia ai le taimi ma taumafaiga. Ae ia te au, o le aoaoina o le talalelei a Iesu Keriso o se tasi o mea aupito sili ona taua e galue malosi i ai. E tatau ona e aoao e uiga ia Keriso ina ia maua ai se molimau ia te Ia.

Tausia o Tamaiti Laiti: Han Lin

O Han Lin sa fanau ma ola ae i Taiuani. Sa faamauina i lona lona toalua i le Malumalu o Laie Hawaii, ma o loo nonofo nei i Hawaii, ISA, ma le la fanau e toalua.

O le a lau faauigaga o se tama lelei?

O se tama lelei e le o se tagata atoatoa, ae o ia o se tasi e lava le lotomaulalo e talia ai fautuaga mai isi ma saili i taimi uma ia faaleleia atili o ia lava. O se tama lelei na te faamuamua lona aiga ma o latou manaoga. E nau-nau o ia e ositaulaga lona taimi, mea patino e fialia i ai, ma isi mea uma ina ia faia ia lelei lona aiga. E taumafai

ia iloa le ala e fesoasoani ai i tagata taitoatasi o le aiga ia ola ma avea e faapei o Keriso.

O le a se mea na e faia a o talavou na saunia ai oe ina ia e oo mai i le tulaga ua e i ai nei?

Sa ou faia le mea sili e tasi i poloaiga uma ma faia fili-filiga lelei. O le alu i le seminare sa matuai fesoasoani tele foi. Sa o se tautinoga tele, ona sa ou ala i le 5:00 i le taeao. Ae ui i lea, ou te manatu o le i ai o ni uo sa tutusa a matou sini, sa fesoasoani tele lea ona sa siitia e le tasi le isi. Ou te manatu o gaoioiga uma sa matou faia o ni talavou ma i le avea o se vaega o ni uo lelei i le Ekalesia, sa fesoasoani tele ia i matou.

O a ni savali mai le lalolagi sa tatau ona e faatoailoina ia avea ai ma se tama lelei?

E ta'u mai e le lalolagi i tagata e tatau ona tele ni taimi latou te faia ai ni gaoioiga malie ae itiiti ia tiutetauave, ae o le galue malosi e taua i le faamanuiaina i soo se mea e te faia. O le avea ma se tamā lelei e manaomia ai mea uma e mafai ona e tuuina atu; o le tuputupu a'e agai atu i le atoatoa o se faagasologa o le olaga atoa—ou te tuputupu ae faatasi ma lo'u aiga.

O le a sau tala e fai atu i lou tagata talavou ma isi tupulaga talavou?

E manaomia e tagata uma ni uo, o lea, fai ni uo lelei. Ia faauo ma tagata o e e “auai ma le naunautai i se faamoemoega lelei” (MF&F 58:27). Aoao mai i nei uo lelei, ma o le a faatosinaina ai oe e ala i a latou faataitaiga, ma

i ai le manao ia avea e faapei o i latou ma alualu ai i luma oe lava.

Fai le mea sili e te mafaia i mea uma e te manao e fai— aua le tuua se mea. O le auala lena o le a e le faanoanoa ai pe a e toe tepa i tua. ■



JESS



HAN



Saunia e Elder
Chi Hong (Sam)
Wong
O Le Fitugafulu

Fesoasoani e ala i le Agaga Paia

O le Agaga Paia e mafai ona fesoasoani ia te oe i le aoga, aiga, ma le galuega faapea foi ma mea faaleagaga.


E mafai ona fesoasoani le Agaga Paia i vaega uma o o tatou olaga. Sa ou aoaina lenei mea i se auala moni lava a o ou aoga i le kolisi i le Iunivesite o Polika Iaga-Hawaii.

O le taimi lea, sa ou faigaluega ma ave uma au mataupu i vasega. Sa i ai foi se ma pepe laititi ma lou toalua sa taus. Faatasi ai ma nei manaoga uma i au fuafuaga faatulagaina, sa tau leai ai sou taimi mo suesuega. Sa ou tatalo i aso uma mo le mafutaga a le Agaga Paia. Sa ou manaomia se taitaiga e fesoasoani ai ia te au e faaoga lelei ai lou taimi. Sa ou manaomia le fesoasoani ia malamalama i meaoga faapea ma le manatuaina mulimuli ane i taimi o suega.

Fesoasoani Faalelagi mo se Suega a le Aoga

I se tasi aso i le taimi o le vasega, sa tusi ai e se polofesa ni vaega o ni fesili faigata i luga o le laupapa paepae e faamanino ai se manatu. O nei fesili faigata sa lei faatatau i lena vasega, ae sa manao e talanoa puupuu e uiga i ai. Ina ua mavae ni nai minute sa titina ese e le polofesa [tusitusiga] mai le laupapa.

O le isi au vasega na sosoo ai o le saienisi o komepiuta, ma sa fai se matou suega i le aso lena. Sa i ai i le suega ia fesili tonu



E LUA AUALA IA NOFOUTA AI

I le Tama Faalelagi, o mea uma e faaleagaga—o vaega uma o o tatou olaga. Ua la silafia le mea e sili ona lelei mo i tatou ma finagalo e aoao ma taiala i tatou i le olaga. O lea e taua ai lo tatou nofouta i le taitaiga faaleagaga a le Agaga Paia ina ia mafai ona maua lena taitaiga. O auala nei e lua ua ou iloa e fesoasoani ia te au e nofouta ai i le Agaga Paia:

1. Faitau le Tusi a Mamona i aso uma.

A o ou laitiiti, sa aoao mai e le Peresitene o le Ekalesia, o Ezra Taft Benson (1899-1994), le taua o le faitauina i aso taitasi o le Tusi a Mamona. Sa amata ona ou faia lena mea, ma sa ou faia lena mea i le mamao i tua e mafai ona ou manatua ai. O aso taitasi ou te suea ai se taimi filemu e faitau ma mafaufau loloto ai. A o ou faitau, e tele taimi e aoao mai ai e le Agaga Paia se mea fou ia te au.

2. Aloese mai mea faalavefau a le lalolagi.

O outou le autalavou e ese le talenia i le tele o auala. E ese le tou atamamai ma e mafai ona maoae lo outou nofouta faaleagaga. Ae e taumafai malosi le lalolagi e faalavelave ia te outou. Afai e te naunau e faalogo lelei ma punitia mea faalavefau, o le a faapea ona e maua le taitaiga e te manaomia mai le Agaga Paia.

mai le laupapa i lau vasega na muamua atu! O le mea na mataina moni ai, matou te lei aoaina muamua nei mea i le matou vasega saienisi o komepiuta. Sa toe foi mai ia te au mea uma e manatua mai le isi vasega lea sa ou auai, ma sa mafai ona ou taliina le fesili.

Ina ua togi e le polofesa o le saienisi o komepiuta ia suega, sa ia mautinoa lava e leai se isi na sao lona taliina o lena fesili faapitoa, o lea sa otometi lava lona maka faaseseina o pepa a tamaiti aoga uma. Ae ina ua toe aumai lau pepa ia te au, sa ou faaali atu ia te ia o le tali sa ou tusia i le pepa sa sao. Sa manaia tele.

Sa fesoasoani le Agaga Paia ina ia ou faaoga lelei avanoa uma o au suesuega i le taimi atoa i le kolisi. Sa mafai ona ou ausia ni togi maualuluga ma maua ni sikolasipi, lea na fesoasoani ia te au e totogi ai le aoga.

Taitaiga i le Olaga

I le tau faaiiuga o au aoga, e toatele au uo sa fuafua e faaauau a latou aoaoga ma ausia se faailoga o le matuaofaiva. Sa ou fiafia e aoga ma manao e fai foi lea lava mea e tasi, ae sa manino lava le tau mai e le Agaga ia te au, ua maea lau misiona i Hawaii. Ua oo i le taimi ou te toe foi atu ai i Hong Kong.

Sa ma mulimuli ma lou toalu i le unaiga. I le taimi lea, sa ou le malamalama pe aisea na taitai ese mai ai au mai le faaauauina o au aoga. Ae

o nisi taimi tatou te mulimuli ai i le Agaga e aunoa ma le iloaina o faamatalaga uma. E ui ina sa ma le iloa ma lou toalu le mea e faamoemoeina a o ma sueina ni galuega ma se fale ma-totogi, sa faamanuiaina i maua ma e lei umi ae manuia.

A o ou toe tepa i tua i le taimi lenei, ua ou malamalama ai i le pogai na matua malosi ai le Agaga i le unaiga o i maua e toe foi i Hong Kong. Sa taua tele ia te au ma lou aiga le faamalosia i le Ekalesia i totonu o tagata iina. Sa ou auauna atu o se epikopo, o se fesoasoani i le au peresitene o le siteki, ma o se peresitene o le siteki a

o lei valaauina o se Fitugafulu Eria. Ina ua ou litaea mai lau galuega, sa mafai ona ou maua se faailoga o le matuaofaiva. O na aafiaga uma sa fesoasoani e saunia ai au mo lou valaauga i le taimi nei.

Ou te molimau atu ia te outou, o le saili ma le mulimuli i le taitaiga a le Agaga Paia o taimi uma lava o le auala sili lea ona lelei e fuafua ma ola ai lou olaga. Ua uma ona tuuina atu ia te oe le meaalofo o le Agaga Paia ina ua faamauina oe o se tagata o le Ekalesia, ma afai o le a e faaogaina lena meaalofo, o le a avea ma se fesoasoani tele i mea uma e te faia. ■

“E manatu nisi o au uo, o le alu i le lotu e maumau ai le taimi. E mafai faapefea ona ou fesoasoani ia latou iloa e mafai ona avea o se faamanuiaga maoae?”

Atonu o le a fesoasoani se faatusatusaga i au uo. E mafai ona e faamalamalama i ai, e pei ona tatau i lou tino ona ai ma inu ma moe, ma tatau foi i lou faiai ona aoao, o lea e tatau ai foi ona fafaga lou agaga. O le alu i le lotu e fesoasoani e te fafagaina ai lou agaga.

E faia lenei mea e ala i le aoaoina o le talalelei, ma taumafa i le faamanatuga, faafouina o folafolaga paia na e osia ma le Tama Faalelagi. O lenei toe tomanatu ma le toe tautino, e fesoasoani e te maua ai faamanuiaga na folafola mai ia “maua pea lona Agaga e faatasi ma [oe]” (MF&F 20:77). O le faatasi o Lona Agaga ma oe e faamalosia ai lou faatuatua ma fesoasoani e te avea atili ai faapei o Keriso.

E mafai foi ona e talanoa i au uo e uiga i isi faamanuiaga e te maua. E mafai ona e tau i ai e uiga i le tofilemu e te lagona i le lotu, faasoa i ai se mea aoga na e aoaoina i le lotu, faamatala e uiga i se avanoa sa e maua e auaua atu ai, pe molimau atu o le alu i le lotu e fesoasoani e fai ai le aso Sapati o se mea fiafia (tagai i le Isaia 58:13–14).

Atonu o le auala sili ona mamana e fesoasoani ai i au uo, o le valaaulia o i latou e o mai ma vaai mo i latou lava. A o latou auai faatasi ma oe i sauniga faamanatuga ma isi sauniga, o le a mafai ona latou lagona le mana o le Agaga Paia, aoao le talalelei, ma vaaia ona faamanuiaga i olaga o tagata o le ekalesia.



Tuu Atu i le Agaga e Taitai Mai

E mafai ona tuu atu i ai lau molimau e uiga i le alu i le lotu. E mafai ona e faamatala i ai le manaia o ou lagona ma le taua o mea e te aoao i ai. A o tuu atu lau molimau, o le a fesoasoani le Agaga ia e iloa mea e fai atu, ma o le a iloa e au uo, e moni mea o loo e fai atu ai. O le tele o mea latou te iloa, atonu o le tele foi lea o le latou fia iloa. E mafai foi ona e valaaulia i latou tou te o mai faatasi i le lotu.

Mikelle M., 13 tausaga, Iuta, ISA

Valaaulia i Latou i le Lotu

E faigata le i ai o ni uo o e manatu o le alu i le lotu e maumau ai le taimi, e ui, e mafai ona tatou lagona le fiafia mo i latou a o tatou fesoasoani ia latou iloa mea o loo faapolopolo e le Tama oi le Lagi mo i latou taitoatasi. E mafai ona tatou fesoasoani ia i latou e ala i le valaaulia o i latou i le lotu, ina ia mafai ona latou lagona le olioli i le i ai se falelotu ua faapaiaina, ma faatuatua e mafai ona latou lagona le alofa i le Tama Faalelagi ma nofouta i faamanuiaga tatou te maua e ala i le o i le lotu.

Oscar Y., 19 tausaga, Monagas, Venesuela



Taulai atu i le Faamanatuga

O le sau i le lotu e taua ona o le nofoaga lea e mafai ona toe faafou ai a tatou feagaiga o le papatisoga ma feagaiga uma lava e ala i le faamanatuga. Ua folafola mai e le



Alii o le a faatasi pea Lona Agaga ma i tatou pe a tatou talisua ma le agavaa i le faamanatuga ma faataunuu la tatou pitolaau o le feagaiga. O le pui-puiga, taitaiga, ma le faamafanafanaga lea tatou te maua mai le Agaga e taua mo o tatou olaga o aso taitasi. O nei faamanuiaga tulaga ese e le mafai ona maua i se isi lava auala ae na o le alu i le lotu ma talisua i le faamanatuga.

Diana R., 16 tausaga, Oregon, ISA



Ia Lotototoa

E mafai ona e fesoa-soani ia latou malamalama e ala i le na o le talanoa atu ia te i latou, valaaulia i latou, ma tuu

atu ia te i latou tusitusiga paia, po o le valaaulia foi o faifeautalai i o latou fale. Aua le ma. Ia fiafia aua atonu latou te auai lava i le Ekalesia.

David H., 12 tausaga, Mekisiko Fou, ISA

Fai Lau Vaega

O le alu i le lotu e le o se maumau o le taimi pe afai e te auai malosi ma taumafai e aoao ma malamalama i mea o loo tautalagia pe o aoaoina. E mafai ona e lagona le Agaga, ma o nisi taimi e mafai ona e feiloai atu i tagata fou.

Ethan H., 15 tausaga, Iuta, ISA



Ia Faasusulu Atu Lou Malamalama

I le avea ai ma tagata o le Ekalesia, tatou te faasusulu atu mea na tatou aoaoina i le talalelei a

Iesu Keriso. O le faia o se faataitaiga lelei ma faaali atu i au uo o loo e fiafia

i faamanuiaga ua e mauaina e ala i le alu i le lotu, e ono mafai ona aoao ai i latou o le alu i le lotu e matua aoga lava.

Johanna R., 20 tausaga, Surigao del Sur, Filipaina

Ia Tausisia Pea le Vaaiga e Faavavau

O le iloaina o le Ekalesia o le malo o le Atua i le lalolagi, tatou te o ai i le lotu i Aso Sa uma e faia se laasaga e agai atu i le atoatoa ma agai atu i le malo selesitila. O le alu i le lotu i Aso Sa uma, tatou te latalata atili atu ai i le Tama Faalelagi e ala i le faafouina o a tatou feagaiga (talisua i le faamanatuga), ma tatou te iloilo ai i tatou lava e iloa ai pe o faapei i tatou faaleagaga.

Esther M., 17 tausaga, Itumalo o Kasai-Oriental, Temokalasi Ripapelika o Congo



O SE ASO O LE FIAFIA

“Ua faia e uarota ma paranesi o le Ekalesia se mafutaga faalevaiaso o se toomaga ma se faafouga, o se taimi e faataatia ese ai mea o le lalolagi—o le Sapati. O se aso e ‘te fiafia ai oe lava ia leova’ [Isaia 58:14], ia maua ai le faamalologa faaleagaga lea e sau mai le faamanatuga, ma mauaina le folafolaga toe faafou ia maua Lona Agaga e faatasi ma i tatou.”

Elder D. Todd Christofferson o le Korama a Aposetolo e Toasefululua, “E Manaomia I Se A le Ekalesia?,” Liahona, Nov. 2015, 109.

FESILI O LE A SOSOO MAI


“E faapefea ona ou faaavanoa le taimi mo gaioiga faalevaiaso a le autalavou, afiafi faaleaiga, ma le suesuega o tusitusiga paia faaleaiga ma faaletagata lava ia ae ua tele lou taimi e alu i le aoga ma meaaoga?”

Auina mai lau tali ma se atapue sili ona manino, pe a e manao i ai, a o lei oo i le aso 1 o Mati, 2016, i le liahona.lds.org, po o le imeli i le liahona@ldschurch.org, pe lafo mai i le meli (tagai i le tuatusi i le itulau e 3).

O faamatalaga nei ma le faatagaga e tatau ona aofia mai ai i lau i-meli po o le tusi: (1) igoa atoa, (2) aso fanau, (3) uarota po o le paranesi, (4) siteki po o le itu, (5) lau faatagaga tusitusia, ma, afai e i lalo ifo o le 18 ou tausaga, o le faatagaga tusitusia a ou matua (e talia foi le i-meli) e lolomiina ai lau tali ma lou ata.

E ono faapupuina tali mo le uumi po o le manino.





**Saunia e Elder
Dallin H. Oaks**
O Le Korama a
Aposetolo e
Toasefululua

AUALA E MAUA AI LE OLIOLI

Uso ma tuafafine, matutua ma talavou, ou te aioi atu ia te outou ia **manatua o le amioleaga e le o le fialia lea** ma o le agasala e oo atu ai i le faanoanoa. Le au talavou e, aua le suea le fialia i mea feilafi ae le taua o le lalolagi. E le mafai ona tatou ausia le fialia tumau e ala i le tulituli-matagauina o mea sese. Sa fai mai se tasi tagata, “E le mafai ona faamalieina oe i mea e te le manaomia, aua o mea e te le manaomia e te le maua ai le lotomalie.”

I le talavou ma e matutua, **ia liliu ese o outou mata ma o outou loto mai savali taufaasese a ala o faasalalauga.** E leai se fialia i le ava malosi po o fualaa faasaina, na o le faapologaina. E leai se fialia i le faasua, na o le tiga lava ma le faanoanoa. E leai se fialia i faiga feusui ma aafiaga faaletino i fafo atu o noataga o le faaipoipoga, na o le faalumaina ma le faateleina o le saosasoa i le ala o le oti faaleagaga.

E leai se fialia tumau i mea ua tatou maua. **O le fialia ma le olioli e sau mai le ituaiga tagata e i ai se tagata,** e le mai mea ua ia *mauaina* pe *foliga mai ua ia mauaina*. Le autalavou, **pipiimau i ou tulaga faatonuina. Suesue ma faaoga** lena tamaitusi faaola, **Mo le Malosi o le Autalavou.**

O le amiotonu e uunaia le amiotonu. O aafiaga o faataitaiga amiotonu e faatosinaina ai augatupulaga i le lumanai. O tulaga lelei faamatua e maua ai talavou o e ave ma ni matua lelei. E pei lava ona faamalosi le toatele o i tatou e ala i faataitaiga faatamalii a o tatou tuua paionia i le tele o atunuu, e mafai foi e filifiliga amiotonu ma osigataulaga o o tatou aso ona faamanuia ai o tatou aiga ma a tatou uo ma o tatou atunuu i tausaga uma o lumanai.

Ou te molimau atu ia te outou i le fialia tumau ma le olioli sili o i latou o e faaali le faatuatua i le Atua ma tausi Ana poloaiga. Ou te fautuaina outou taitoatasi ia **saili le olioli lea e oo mai i le tausaga o poloaiga a le Atua ma faaoga i ai se faatosinaga amiotonu** mo le manuia o i latou tatou te alolofa i ai. ■

Mai se lauga o le konafesi aoao ia Oketopa 1991.



NA FAAPEFEA ONA E FAAOGAINA LENEI MEA?

O le tausaga na tea nei i le aoga, sa ou filifili ai e taumafai e fai ni mea se tele ma nisi o au uo. Ae ua ou iloa nei o le mea moni, sa amata ona ou faalelalolagi ma vavae ese mai au mai lou aiga ma au uo moni. O lenei mea na mafua ai le tele o le loto tiga le talafeagai, lea sa mafai lava ona ou taofia. O le tausaga lenei sa matele ina ou tulaia atu i le lotu. Ua ou maua le fialia ma le olioli moni, o se taunuuga o le taumafai e atiina ae le alofa mama ma uiga auaumama faa-Keriso. Ou te iloa o lenei faamanuiaga o loo avanoa mo soo se tasi pe afai o le a latou saili i ai ma le filiga.

**Ephream James O., 17
tausaga, Ausetalia**

O Lou AAFIAGA FAAFAIFEAUTALAI NA TOEITIITI LAVA A MISI

Mo se sini o le Alualu i Luma o le Tagata Lava Ia, sa amata ona ou tatalo ina ia maua se aafiaga faafaifeautalai. Sa ou taumafai e mafaufau po o ai o au uo o le a sili ona manao e auai i le Ekalesia.

Na mavae atu masina, ma sa ou faapea o le a ou le maua se aafiaga sa ou sailia—seia oo ina ou feiloai ia Peleta. O lona tausaga muamua lea i le matou aoga.

A o faagasolo pea le tausaga, sa ou ina avea i maua ma se uo mamae i le aoga, ae sa lei tau lava lou mafaufau e valaaulia o ia i le lotu, seia oo ina valaaulia e se tasi o au uo ia Peleta i lana lotu. Sa ou mafaufau, “Ou te le talitonu! Sa tatau ona ou mafaufau i lona mea.”

O le vaiaso na sosoo ai sa fai mai Peleta sa fiafia e alu i le lotu a le ma uo ma e toe fia alu i ai. Sa ou mafaufau, “Ua ou faiaina.” E le faapea o se tauvaga, ae sa ou manao e ave atu le talalelei i fanau a le Tama Faalelagi.

I le taimi lona na toe faafou ai lo matou falelotu ma sa fuafuaina e toe faapaiaina i ni nai masina. Sa tufa mai e le epikopo ni tusi valaaulia mo se fale tatala ma le faapaiaga. Sa ou valaauliaina au uo uma o e sa nonofo lata-lata i le falelotu. Na pau lava le tagata na taliaina o Peleta. Sa ou fiafia lava.

I ni nai aso a o lei oo i le fale tatala, na fai mai ai Peleta atonu o le a le mafai ona alu ona sa lei manao i ai lona tina. Sa ou le fiafia, ae sa

ou malamalama, ma fai atu i ai, o le a i ai isi avanoa e aoao ai e uiga i le Ekalesia.

Ae peitai, i le fale tatala, sa ou tei i lou vaai ai iina ia Peleta. Sa talanoa o ia i lona tina, o lē na iu ina faatagaina o ia e alu. Sa ou faafeiloai atu o ia i faifeautalai. Sa ma o i potu taitasi i le falelotu ma faalogologo i se faamatalaga puupuu o faalapotopotoga taitasi o le Ekalesia. Mulimuli ane, na ma o atu ai i le fale faafiafia ma aumai ni tamaitusi e uiga i le Toefuataiga, talafaasolopito o aiga, faaiipoipoga e faavavau, ma isi autu o le talalelei. Na fai mai Peleta, “Ou te talitonu i le mea lenei!”

I le Aso Sa sa auai o ia i le lotu. I le Aso Gafua sa auai o ia i se galuega fesoasoani o Mamona Lima Fesoasoani.

O le fatu na totoina i le lotu o Peleta, sa tuputupu ae i aso taitasi e mavae atu. Sa amata ona suia ona mausa ina ia ogatasi ma polaoiga ma sa lei umi ae papatisoia.

O le taimi nei, i ni nai tausaga mulimuli ane, e fai mai lava o ia e uiga i lona fiafia i le mauaina o le talalelei moni, ma lona faafetai ona sa ou fesoasoani i lona mauaina.


O le tele o taimi e faigata ai ona talanoa i tagata e uiga i le talalelei, ae afai tatou te tatalo, suesue i tusitua-siga paia, faalogo i le Agaga Paia, ma naunau e talanoa atu i se tasi, o le a fesoasoani le Alii ia i tatou. ■


E alala le tusitala i Sergipe, Pasila.



Saunia e Anne Laleska

*Sa ou manao e faa-
soa atu le talalelei,
ae po o ai o au uo e
ono fia faalogo i ai?*





Saunia e Peresitene
Russell M. Nelson

Peresitene o le
Korama a Aposetolo
e Toasefululua

E mafai faapefea ona ou faia le ASO SA o se aso faapitoa?

Sa tuaina mai e le Atua ia
i tatou leni aso faapitoa
e malolo ai mai galuega,
ma ia ola latalata
atili atu ai ia te la.

E mafai ona sili atu
lo tatou fiafia pe afai
tatou te o i le lotu ma
talisua i le faamana-
tuga i le Aso Sa.

O le Aso Sa o se aso
sili lea e faaalu ai le
taimi ma lou aiga.

Ia fai le Aso Sa o se aso
fiafia e ala i le auauna
atu i isi, aemaise i
latou o e mamai pe
ua tuulafoaiina.

E faaali atu lou
alofa i le Alii e ala
i mea e te filifili e
fai i Lona aso.

Mai le "O Le Sapati o se Aso
Fiafia, Liahona, Me 2015,
129–32.

A Ou Faalogo ma Lou Loto

(Ua Faafaigofeina)

Filemu ♩ = 88-104

Upu ma le fati na saunia e Sally DeFord

G C D G Em D

1. A na ou lai - titi a o soi - fua Ie - su i le la - lo - la - gi, Ou te
 faa - logo i pe - ro - feta soi - fua i u - pu a Ke - ri - so A na
 go - na le A - ga - ga Pa - i - a o tau mai upu - mo - ni Na te

G C D G Em Am B

fia sa - va - li ma Ia ma faa - lo - go i A - na u - pu, A fai -
 i ai o Ia i le lalo - la - gi ma te ta - la - ta - la - no - a. Tau mai
 faa - ma - fana - fa - na mai ma mo - li - mau mai ia Ke - ri - so. Fe - ta -

Em B7 G Cm G Em

tau tusi pa - ia te la - go - na lo - na fi - le - mu,
 pe - ro - fe - ta ia a - mio - to - nu ma fi - le - mu, A faa - lo - go ma
 lai mā - lū ma tu - mu ai a'u i le fi - le - mu,

Am D7 | 1, 2. G Am D G Am7 D

lo'u lo - to te lagona le Faa - o - la. 2. Ou te
 3. Te la

3. G Am D C Cm G

lagona le Faa - o - la.

Faasoaina Atu o Tulaga Faatonuina

Saunia e Hilary Watkins Lemon



Ou te nofo i Sineva, Suitiselani. Pe a ou matua, ou te manao e avea ma se tagata suesue o toega o meaola ma laau po o se fomai manu. Ou te fiafia e tamoe ma taaalo ma lau taifau, o Fiafia.



Na o i matou ma lou uso ma lou tuafafine ia tagata o le Ekalesia i le matou aoga. E toatele a matou uo lelei, ae o nisi o i latou e le tutusa ia tulaga faatonuina. Ua ou filifili e tu atu i taimi uma mo mea ou te talitonu i ai, e tusa lava pe le o le mea lauiloa lea e fai.

Talofa! O lou igoa o Isaako.



"LEAI" I LE LAUTI

O le lauti faaaisa e lauiloa tele i Suitiselani. I le pati o lou aso fanau, sa fesili mai ai se tasi o au uo mo se ipu lauti faaaisa. Sa ou fai atu ia te ia, e le o i ai se mea. Sa ia fesili mai pe aisea. Sa ou faamalamalama faalelei atu i ai e le inu lauti lo matou aiga.

AUAUNA ATU I LOU TUAFAFINE

O lou tuafafine o Mayla, e le atoatoa lona mafaufau ma lona malosī. Na te faaogaina se nofoa faataavalevale, ma o nisi taimi e manaomia ai le fesoasoani e faanofo i luga po o le feaveai solo i le fale. Ou te fiafia e fesoasoani ia te ia. A tuua le aoga, o maua ma Samuelu e aumaia o ia i fafo o le aoga e o i le fale ma lo matou tamā.



O SE FAIFEAUTALAI TOA

E le fefe lou tuafafine e tautala e uiga i mea e talitonu i ai. Ua uma ona fua-fuaina e Mayla lona papatisoga ma e manao e valaaulia ana uo!



GALUEGA LELEI

Ou te fai i au uo e aua le fai upu leaga pe a ou i ai, ae e fai lava e nisi. Sa luina au e se tasi tamaitiiti e fai se upu leaga. Sa ou fai atu, "Leai, ou te le faia." Sa tei o ia, ae e le o toe taumafai e faaso au ia au ma ia.

O SE UO AGALELEI

O lou uso o Samuelu, o se faaitaiga lelei. I se tasi taimi na sau ai se tamaitiiti fou e igoa ia Meki i le aoga. Sa tautala o ia i le faa-Korea ma faa-Peretania, ae le o le faa-Farani. Sa fesoasoani Samuelu ia Meki ia lagona le taliaina ma sa fesoasoani i ai e aoao le faa-Farani. O lenei ua la taaalo faatasi i le tuua o le aoga, ma sa i ai se aso sa matou o ai ma Meki i se gaioiga a le Ekalesia.

MOTUGA AFA A ISAAGO MO LE TU MAUALUGA

Usitai i ou matua ma le Faaola.
 Alu i gaioiga i le lotu.
 Alu i le lotu i Aso Sa ma ai ma inu i le faamanatuga.
 Faaaloalo i isi. ■



Oa o le Molimau

Saunia e Leonardo Rodrigues

E faavae i se tala moni

*“Ma o lenei ua ou iloa mo au lava ia . . . ona o le Alii le Atua na ia faailoa mai nei mea ia te au e ala mai i lona Agaga Paia”
(Alema 5:46).*

Sa vaavaai atu Sabrina a o savavali Satu Tina i le faitotoa ma o latou tuaoi. “Faafetai lava mo le tusi lenei,” o le tala lea a le tamā. Sa ia uuina se Tusi a Mamona.

“Tina, aisea e te talanoa ai i tagata uma e uiga i le Ekalesia?” Na fesili ai Sabrina mulimuli ane, a o la fufulu ipu faatasi.

“Ona o lau molimau i le Ekalesia e pei o se oa taua,” o le tala lea a Tina. “Ou te maua ai le fiafia. Ma ou te manao e faasoa atu i isi ina ia mafai foi ona latou fiafia!”

Sa vaai faalemafaufau Sabrina i le asoa iila a Tina o loo i lana pusa o

teuga mea feilafi. “O le a le uiga o lau tala e pei o se oa taua?”

“Ia, o se molimau e taua tele,” o le tala lea a Tina. “O se meaalofa mai le Tama Faalelagi e fesoasoani tatou te iloa ai po o le a le mea moni.”

“Na faapefea ona e mauaina?” Sa manao ai Sabrina ia iloa.

Sa tuu atu e tina ia Sabrina se ipu mama manaia e solo faamago. “Sa ou mauaina sina mea itiiti i lea taimi ma lea taimi. Pe a ou tatalo pe faitau i tusitusiga paia, ou te lagona le toafilemu ma le mafanafana i totonu. E pei lava o loo ou faapoopo atu i oa o lau molimau.”

Sa luelue lemu le ulu o Sabrina. Mata e mafai ona ia maua se oa o le molimau?

*O a ituaiga
o oa e faateleina
pe a e faasoaina
atu?*



“O le taimi lenei ma le aso lenei
e aoao ai . . . mo outou lava le moni
o le talalelei.”

Elder Craig C. Christensen o le au Peresitene o Fitugafulu, “Ua Ou Iloa Nei Mea mo Au Lava Ia,” *Liahona*, Nov. 2014, 52.



I le Aso Sa, sa faamatala ai e le faiaoga o Sabrina se tala e uiga ia Iesu Keriso. Sa faalogologo ma le totoa Sabrina. Na fai mai Uso Lopez sa valaaulia e Iesu ia tamaiti laiti uma e o mai ia te Ia. Sa ia faamanuina ma aoao i latou. Ina ua mafaufau Sabrina e uiga ia Iesu, sa amata ona ia lagona le mafanafana i lona loto.

Sa faatopetope atu Sabrina e sue Tina ina ua tuua le Peraimeri. “Tina, mate mai la?” Sa ia faamatala atu ia Tina e uiga i le lagona mafanafana.

“Tai manaia,” na fai mai ai Tina. “O le lagona lena, o le taimi lea e pai mai ai le Agaga Paia i o tatou loto ma faailoa mai ia i tatou e moni le talalelei.”

Sa ataata atu Sabrina ia Tina. “O le mea lena na tupu! Sa fiafia lou loto.” Sa matuai filemu le Agaga Paia o lea na iloa ai e Sabrina, semanu na te le iloaina o Ia pe ana faapea e le faaloalo.

Sa fusi mau o ia e Tina. “O lena ua maua la oe lava oa o le molimau.” Sa fusi mai foi e Sabrina ia Tina. Sa manao o ia e faasoia atu lana oa i tagata uma—e pei lava ona sa faia e Tina! Ae e faapefea ona ia faia lena mea?

O le po lena na maua ai e Sabrina se kata fepasiai o loo i ai i luma se ata o Iesu. Sa ia momonoina i totonu o lana ato faafafa.

O le aso na sosoo ai i le taimi o le malologa puupuu, na manatua ai e Sabrina le kata. Sa ia aumaia i fafo ma alu loa e sue lana uo o Carla. “Ia, Carla, o le mea lea mo oe,” na fai atu ai Sabrina.

Sa uumau e Carla le kata. “Faafetai! Ou te fiafia lava i ata o Iesu.”

Sa faasino e Sabrina ia Carla le uepisaite i le pito i tua. “E mafai ona e aoao atili e uiga i le Ekalesia a Iesu ii.”

“O le a le ekalesia lena?” Na fesili ai Carla.

“O Le Ekalesia a Iesu Keriso o le Au Paia o Aso e Gata Ai,” na fai atu ai Sabrina. “O le alu i le lotu ma le aoao e uiga ia Iesu ou te maua ai le fiafia.”

Sa tuu e Carla le kata i lana taga. “O le a ou tago nei e faaali atu le kata lea i lou tina.”

I ni nai vaiaso mulimuli ane, sa tamoe atu ai Carla ia Sabrina a o

lei amataina le vasega. “E i ai se mea ou te fia tau atu ia te oe!” o lana tala lea. Sa i ai se ataata lapoa i ona foliga.

Sa fiafia lava Sabrina. O le a lea mea? Sa ataata Carla. “Na o lou aiga i le tou lotu! Ma sa pei lava ona e fai mai ai—sa ou lagona le fiafia iina.”

“Sa ou iloaina o le a e lagona le Agaga Paia!” O le tala lea a Sabrina.

“Ma ou te manatu o le a matou papatiso i se taimi e le o toe mamao!”


Sa osooso Sabrina ma fusi ia Carla. O lea la o le a mafai ona faasoia faatasi a la oa o le molimau! ■
E alala le tusitala i Amazonas, Pasila.



Tusitusiga Paia mai le Lalolagi Tuai ma le [Lalolagi] Fou

A o malaga mai Nifae ma lona aiga mai Ieruselema (le “Lalolagi Tuai”) i le nuu o le folafolaga (le “Lalolagi Fou”), sa latou aumaia ia tuistusiga paia. Sa taua o papatusi apamemea. I le Lalolagi Tuai, o nei tusitusiga paia na avea ma se vaega o le Tusi Paia.

I le nuu o le folafolaga, sa tusia ai e Nifae mea na aoao mai e lona tama, mea na tutupu i lona aiga, mea na ia aoaina mai le Tama Faa-lalagi, ma mea na ia aoaina mai i papatusi apamemea. O mea na tusia e Nifae sa avea ma se vaega o le Tusi a Mamona. ■



LALOLAGI FOU rld



Alema



Mose

PEROFETA I NUU ESEESE

Faitau mau nei ma faafetaui i perofeta i luga o le faafanua.

1. Esoto 19:20

2. 2 Tupu 20:14


3. 1 Nifae 2:1-2

4. 1 Nifae 18:22

5. Mosaea 18:7

6. Upu a Mamona 1:9

7. Mamona 8:1, 4




Nifae



Liae



Isaia



Tali: 1. Mose; 2. Isaia; 3. Liae; 4. Nifae; 5. Alema; 6. Mamona; 7. Moronae


Sa AGAGA TATALO Enosa

Sa tatalo Enosa e uiga i mea sa popole ai o ia. Sa tatalo foi o ia mo isi. Sa faapea foi ona tatalo mo ona fili!
E mafai faapefea ona e faapei o Enosa i lenei masina?



Ao i ai i se tafaoga faaleaiga, sa faapea ona matou o eseese ai mai lou tama ma lou uso laitiiti. Sa faasolo ina pogisa. Sa le iloa e le isi vaega atoa o le aiga le mea o le a fai. Sa ou fai atu i ai e tatau ona matou tatalo. Sa fai le matou tatalo, ona amata lea ona matou savavali atu i nisi o faleoloa. Sa matou autilo atu i luma atu o le alatele ma vaaia ai lou tama ma lou uso laitiiti! Sa ou fiafia lava. Sa ou iloa na alofa le Atua ia i matou ma fesoasoani ia i matou i le sueina o lo matou tama.

Oliver P., 8 tausaga, São Paulo, Pasila



"Enosa o loo Tatalo" saunia e Amanda F., 11 tausaga, Arisona, ISA

ATA NA TUSIA E JARED BECKSTRAND

Oti, gaugau, ma teu le kata lenei o le lui! 



E Mafai Ona Ou Agaga Tatalo!


- Tauloto le Enosa 1:4.
- Tusi i lau api o talaaga e uiga i se taimi na tali mai ai e le Tama Faalelagi au tatalo.
- Matamata i le mataupu e 11 o le ata komi o tala o le Tusi a Mamona i le [scri pturestories.lds.org](https://scripturestories.lds.org).
- Ua ou luiina au lava ina ia . . .

E MAFAI ONA OU FAITAUINA LE TUSI A MAMONA

O Mau o le Masina Lenei

A uma ona e faitaua se fuitau o mau, ona valivali lea o vaega o fuainumera e tutusa i luga o le vaa!

- 1 1 Nifae 17:7–10, 17–18
- 2 1 Nifae 18:4–12, 20–23
- 3 1 Nifae 19:1–6, 18
- 4 2 Nifae 2:25–28
- 5 2 Nifae 5:5–8, 12–16
- 6 Iakopo 5:3, 58–62
- 7 Iakopo 7:1–2, 13–20
- 8 Enosa 1:4–8, 15–17

**Folau atu i le Laueleele na Folafolaina**

Na fau e Nifae se vaa ina ia mafai ona malaga ai lona aiga i le laueleele na folafolaina. Faitau e uiga i la latou malaga i itulau e 76–78. I le laueleele na folafolaina, na taua ai tagata amiotonu o sa Nifae. Sa taua tagata amioleaga o sa Lamanā. I nei mataupu, tatou te aoao ai mai le uso o Nifae o Iakopo ma le atalii o Iakopo o Enosa. Vaavaai mo se isi lui o le faitau i le isi lomiga e sosoo mai. ■



Ua Sopoia e le Aiga o Nifae le Vasa



E valu tausaga na malaga ai le aiga o Nifae i le vao. Mulimuli ane na latou tau ai i se nofoaga matagofie. Sa latalata i le sami, ma sa tele ni fualaau aina ma meli e aai ai. Sa matuai fiafia tagata uma!




Ae peitai, sa lei uma ai le latou malaga. Na faatonu e le Tama Faalelagi ia Nifae e fau se vaa. Sa ia faaali mai ia Nifae ia foliga [o le vaa]. Sa Ia folafola mai, o le a ave i latou e le vaa i se laueleele fou matagofie.

Sa muamua lava fai e Nifae ni mea faigaluega. Ona amata ai lea ona ia fauina. Sa muimui uso o Nifae o Lamana ma Lemuelu. Sa lei talitonu i laua e mafai ona ia fauina se vaa.

Na iloa e Nifae e mafai e lo latou aiga ona talitonuina le Tama Faalelagi.




Ina ua uma le vaa, sa amata loa e le aiga o Nifae la latou malaga i le vasa. I se tasi aso sa feita ai Lamana ma Lemuelu ia Nifae ona la saisaia ai lea o ia. Na oo mai se afa tele ma toe tulei i tua le vaa. Na salamo le au uso, ma na toe taitai saogalemu e Nifae le vaa i lona ala.




Na iu lava ina taunuu le aiga o Nifae i matafaga o se laueleele fou. Sa fiafia Nifae ma lona aiga ona sa latou iloaina na taitai atu i latou e le Tama Faalelagi iina.

E tausia e le Tama Faalelagi Ana folafolaga i taimi uma! ■



E Taua o Tatou Aiga





Saunia e Peresitene
Howard W. Hunter
(1907–95)

Peresitene Lona
Sefulufa o le Ekalesia

MAOAE MONI

E le manaomia ona tatou vaai mamao e iloa ai toamagumagu e le o matauina ma ua faagaloina o le olaga i aso taitasi.

Talu ai e le o utuva lo tatou faalogo pea i le faauigaga e le lalolagi o le manuia ma le maoae, ua malamalama lava, atonu e tele taimi tatou te faia ai ni faatusatusaga i le va o ituaiga tagata ua tatou i ai ma ituaiga tagata ua i ai isi, pe e foliga mai o loo i ai, faapea foi ma le va o mea ua tatou maua ma mea ua maua e isi. . . . E masani ona tatou faatagaina faatusatusaga lē talafegai e faatamaia ai lo tatou fiafia, pe a mafua ai ona tatou lagona le le faamalieleina po o le le agavaa po o le le faamanuiaina. O nisi taimi, ona o nei lagona, e faapea ona taitai atu ai i tatou i le sasi ma nopiai i o tatou toilalo ae faagalologo i vaega o o tatou olaga atonu o i ai elemene o le maoae moni. . . .

. . . E moni o loo aofia ai mea e ao ona faia ina ia mafai ona avea ai ma se tamā lelei po o se tina lelei, ae, i le vaaiga lautele, o loo i ai foi le faitau afe o mea laiti ma galuega o auau-naga ma le ositaulaga, o loo faavae ai le tuuina atu po o le foai atu o le ola o se tasi mo isi ma mo le Alii. E aofia ai le mauaina o se malamalamaaga i lo tatou Tama o i le Lagi ma Lana tala-lelei. E aofia ai le aumaia o isi i le faatuatua ma fegalegaleaiga i Lona malo.



O mea nei e le masani ona amanaia pe faaeaea i ai le lalolagi. . . .

E moni lava e le manaomia ona tatou vaai mamao e iloa ai toa e le o matauina ma ua faagaloina o le olaga i aso taitasi. O loo ou tautala e uiga ia i latou ua outou silafia ma i latou ua ou iloa o e faia ma le le leoa ma i taimi uma ia mea e tatau ona latou faia. O loo ou tautala e uiga ia i latou e avanoa i taimi uma ma naunau i taimi uma. O loo ou faatatau atu i le lototoa e masani ai o le tina o lē—o le a nofo ma tausi se tamaitiiti mai i lea itula ma lea itula, i le ao ma le po—po o le tagata e i ai manaoga faapitoa o loo tauivi ma mafatia e aunoa ma se faasēā. O loo ou faa-aofia ai i latou o e e volenitia i taimi uma e foai atu [o latou] toto. . . . O loo ou mafaufau ia i latou o e atonu e le avea ma ni tina ae ui i lea o loo “faatina” i tamaiti o le lalolagi. O loo

ou tautala ia i latou o e e i ai i taimi uma e alofa atu ma faafailele.

O loo ou tautala atu foi e uiga i faiaoga ma tausi soifua ma faifaatoaga ma isi o e faia le galuega lelei o le lalolagi, o e aoa ma fafaga ma faalavalava, e le gata i lea, ae o e foi, e faia le galuega a le Alii—o i latou o e sii ae ma alofa atu. O loo ou faasino atu ia i latou o e faamaoni ma agalelei ma galulue malosi i a latou galuega o aso faisoo, ae o i latou foi o ni auauna a le Matai ma leoleo o Ana mamoe. . . .

Ia i latou o e o loo faia le galuega masani a le lalolagi, ae o loo tau mafaufau i le taua o mea ua latou ausiaina; ia i latou o e galulue malosi o lenei Ekalesia, o e o loo faalauteleina le galuega a le Alii i le tele o auala le leoa ae taua; ia i latou o e o le masima o le lalolagi ma le malosi o le lalolagi ma le ivitu o atunuu taitasi—ia te outou, tau lava o le faailoa atu o lo matou faamemelo. Afai tou te tumau e oo i le iuga, ma afai tou te lototoa i le molimau ia Iesu, o le a outou ausia le maoae moni ma o le a [outou] nonofo i le afioaga o lo tatou Tama o i le Lagi. ■

Mai le “O le Maoae Moni,” Ensign, Iulai 1982, 19–20.

MALAMALAMAAGA



E faapefea ona tatou vaai atu i o tatou taitoalua?

“E leai se tasi o i tatou e faaipoipo i se tasi ua *atoatoa*; tatou te faaipoipo i se tasi ua i ai le *gafatia*. O le faaipoipoga sa’o e le faatatau i mea ou te manao i ai na o a’u; e faatatau foi i mea e manao i ai o ia—o le o le a avea ma a’u soa—ma manao ia ou avea ai.”

Elder Robert D. Hales, o le Korama a Aposetolo e Toasefululua, “Fetaiai ma Luitau o le Lalolagi i Lenei Vaitaimi,” o le *Liahona*, Nov. 2015, 46.

E I Ai Foi i le Lomiga Lenei

MO TALAVOU MATUTUA

O Le A se Mea e Mafai ona Aoao Mai
e le Tusi a Mamona ia i Tatou e uiga i le

Fiafia?


Tatou te mananao uma lava ia fiafia. O mataupu
faavae nei e fitu mai le Tusi a Mamona ua faailoa
mai ai le auala tatou te mafai ai.



i.44

MO LE AUTALAVOU

i.56



O LOU LUMANAI

O Le Fuafuaga Lava Ia e Matagofie

O tala moni ua faaalua ai auala e mafai ona faia ai lou
lumanai ia matagofie e pei ona e manao ai, e ala i le
galue i ai i le taimi nei.

MO TAMAITI



Oa o le Molimau

Na fai mai le tina o Sabrina o lana molimau
sa pei o se oa taua. Mata e mafai foi e
Sabrina ona maua leni oa taua?

i.70

4



1

SAMOAN

O LE EKALEZIA A
IESU KERISO
O LE AU PAIA O ASO
E GATA AI